

萬 有 文 庫

第一編五種百種

王雲五主編

四庫全書總目提要

(三十)

永瑤等撰

商務印書館發行

省立新竹高中國書館



00010700

萬有文庫

第一集編五種

地編著  
王雲五

商務印書館發行

四庫全書總目提要

(三十)

永瑤等撰



國立基本叢書

010700

# 四庫全書總目提要

## 卷五十九

### 史部十五

#### 傳記類存目一

【孔子世家補十二卷】永樂大典本。宋歐陽士秀撰。士秀廬陵人。仕履未詳。是書成於淳祐辛亥。大抵據皇極經世以駁史記孔子世家之譌。然邵子精於數學。不聞精於史學。所書先聖事蹟。亦未必盡確。自序又稱慮夫事之精粗隱顯大小本末。錯糅其間而不易見。則著年表以提其綱。列世本以類其族。且綴弟子年名於其終。於以稽其是非。用決羣疑而祛己惑。今考永樂大典所載。已無所謂年表世本弟子年名者。則已非完書矣。

【孔氏實錄一卷】永樂大典本。不著撰人名氏。末一條云。大蒙古國領中書省耶律楚材。奏准皇帝聖旨。於南京特取襲封孔元措。令赴闕里奉祀。案元措以金承安二年襲封衍聖公。此書或卽元措等所撰。歟。首錄歷代褒崇之典。凡碑文詔旨。皆載其略。末載孔氏鄉官甚詳。然敘次頗無體例。如首載聖母顏氏。及聖配亓官氏。而孔子以上歷世之事。獨不一敘。疑或傳寫佚脫。非完帙也。考明文淵閣書目。有孔子實錄一冊。永樂大典所載。則作孔氏。未詳孰是。然文淵閣書目。傳寫多譌。未足盡據。今仍從永樂大典之名。著於錄焉。

【孔子論語年譜一卷】編修程晉芳家藏本 舊本題元程復心撰。復心字子見，婺源人。皇慶癸丑，江浙行省以所撰四書纂釋進於朝，授徽州路教授，致仕給半俸終其身。是編以論語各章分隸於孔子年譜之內，而又雜採左傳諸事附會之。如云九歲見季札，觀樂於魯，三十五歲從昭公出亡，留齊七年，此因旁文而牽合孔子者也。又云五十三歲，孔子聘於齊，執圭鞠躬如也，云云。此因論語而妄生旁文者也。又云六十三歲，厄於陳蔡，不得已浮海至楚，曰道不行，乘桴浮於海，云云。陳蔡之閒，何由浮海？郢都又豈海道可通？尤夢囈之語，可資笑噓者矣。至所分隸之論語，以子釣而不綱，章為三十一歲，以子以四教，章子所雅言，章子罕言，章子不語，章自行束脩以上，章為三十四歲，以八佾雍徹，諸章為三十五歲，以君子食無求飽，章為四十三歲，道千乘之國，章為四十八歲之類，不可殫數。均不知其何所據而云然。復心師朱洪範、友胡炳文，雖亦講學之家，原不究心於考證，然不應繆妄至於如是。考篇末辨季本聖蹟圖考之妄，本王守仁之弟子，元人何自見其書，殆明季妄人所為，而傳錄者偽題復心之名歟。

【孟子年譜一卷】編修程晉芳家藏本 舊本題元程復心撰。復心既作論語年譜，更取孟子七篇為編年，其以某章為某年之言，謬妄與孔子年譜相等。其謂孟子鄒人，乃陳邑，非鄒國也。語極辨而不確，亦好異之談。蓋與孔子年譜一手所偽撰也。考朱彝尊經義考載譚貞默孟子編年略一卷，今未見其書，然彝尊所載貞默自述一篇，則與此書之自述不異一字，疑直以貞默之書詭題元人耳，偽妄甚矣。

【闕里誌二十四卷】浙江汪啟淑家藏本 明陳鎬撰。孔允植重纂。鎬會稽人，成化丁未進士官至右副都御史，巡撫湖廣，允植孔子六十五世孫，襲封衍聖公。闕里向無志乘，僅有孔庭纂要、祖庭廣記諸書，宏

治甲子重修闕里孔廟成。李東陽承命致祭時，鎬爲提學副使，因屬之編次成志。崇禎中，允植重加訂補，是爲今本。以圖像禮樂世家事蹟祀典人物林廟山川古蹟恩典弟子蹟述藝文分類排纂，而編次完雜，頗無愷例。如歷代誥敕御製文贊不入，追崇恩典志而另爲提綱，碑記本藝文中一類，乃別增蹟述一門，均爲繁複。

【孔顏孟三氏誌六卷】兩江總督採進本。明劉濬編。濬永嘉人。成化中官鄒縣教諭。鄒孟子所生地。孟廟在焉。濬因考證孔顏孟三氏世系，以及褒崇諸典彙輯成書。先以地圖，次以世系年譜，次以廟制，次以誌事，附述聖於卷後，而前列提綱一卷，則壬子四月紫陽楊奐所述東遊記也。壬子爲元憲宗二年，而濬於壬子下註云：元憲宗淳祐十二年，紀年既誤，而又以宋理宗年號移之於元，殊爲疎舛。卽此一端，其他可概見矣。

【孔孟事蹟圖譜四卷】浙江汪啓淑家藏本。明季本撰。本有易學四同，已著錄。是書前說後譜，於孔孟事實頗有考核。如云孔子未嘗至楚，見昭王。孟子先至齊而後梁，此一二條皆有所見。然其餘大抵習聞者多。

【素王記事】無卷數。浙江朱彝尊家藏書亭藏本。舊本卷首題明浙江嚴州府通判太原傅汝楫校。正則非汝楫所撰。卷末楊奐東遊記之首，又題河南開封府知府西蜀黃濬輯錄，則似爲濬之所撰。然不列名於書首，而綴於書後，體例叢脞，殊不可曉。其書則摭拾闕里志爲之，亦茫然無緒。蓋當時書帕之本，本不以著書爲事者也。案顧炎武日知錄曰：昔時入觀之官，其饋遺一書一帕，謂之書帕。又曰：歷官任滿，

則必刻一書以充饋遺此亦甚雅而南莽就工殊不堪設陰深金齋祀閣亦稱有司刻書祇以供饋贈之用其不工反出坊本下今藏書家以書帕本爲最下蓋由於此

【夷齊錄五卷】浙江范懋柱家天一閣藏本 明張玘撰玘字席玉石州人嘉靖乙未進士官至南京戶部右侍郎永平府城西十八里孤竹故城有清德廟以祀夷齊玘守永平時因蒐輯歷代祀典諸家藝文編爲一帙據目錄原本有闕此本無之蓋爲傳寫者所佚矣

【孔聖全書三十五卷】晉聖公孔昭煥家藏本 明蔡復賞編復賞巴陵人卷端自題恩貢出身南京戶部修職郎不知其爲何官也前有自序稱是書始成就正於兵部侍郎姜廷頤廷頤適次爲六卷上卷曰經書中卷曰子史下卷曰雜說首卷曰帝王崇重盛典尾卷曰經術經理世務六卷內復條分爲四十卷云云案序稱上中下卷首卷尾祇有五卷不應稱六卷又書三十五卷與四十卷之數亦不合其間鄙俚荒唐龐雜割裂鬼神怪誕之語優伶褻諷之詞無不載入謂之侮聖人可也

【尊聖集四卷】浙江范懋柱家天一閣藏本 明陳堯道編堯道里籍未詳嘉靖末官大埔縣教諭是書分圖像世家事蹟遺澤制敕撰述封事七門多勸襲祖庭纂要諸書無所考證

【仲志五卷】兩淮馬裕家藏本 明劉天和撰天和字養和麻城人正德戊辰進士官至兵部尚書提督團營諡莊襄事蹟具明史本傳是編乃天和官總督河道都御史時以濟寧仲家淺有先賢仲子祠故志其建置之由而并及其生平行事大略名之曰令名志崇禎中仲子裔孫于陞等復增損舊本易以今名又繪像列圖於卷首殊不雅馴

【閔子世譜十二卷】安徽巡撫探進本 明張雲漢撰。雲漢字倬侯，宿州人。是編兼及閔子後裔之事。故

曰世譜。首姓氏，次里居，次特傳列傳，次祀典，次修葺，次官生，次世系，次遷徙，次復業，次列女，次藝文，次家約，宿州舊有閔子墓，歷代祠祀不絕。蓋閔子本宿人，春秋時宿屬青州，為齊地，故家語以為齊人云。

【夷齊考疑四卷】浙江巡撫探進本 明胡其久撰。其久崇德人，隆慶丁卯舉人，官龍南知縣。是編以好

事者所傳夷齊世系名字，皆據韓詩外傳呂氏春秋而附會之，竝以叩馬恥粟等事，亦多不實。因各為駁正，而以先賢論定之語及傳記詩文附其後。其議論亦頗博辨，然傳聞既久，往事無微，疑以傳疑，可矣。不必盡以臆斷也。

【夷齊志六卷】浙江巡撫探進本 明白瑜撰。瑜字紹明，永平人。萬歷乙未進士，官至刑部左侍郎。事蹟

具明史本傳。此書乃因張玘夷齊錄損益而成，所載視舊錄加詳。

【道統圖贊一卷】浙江巡撫探進本 不著撰人名氏。據卷首樊維城序，蓋衍聖公家所刻。維城為萬歷

己未進士，則此書出於明季也。即聖蹟圖舊本，而前增以伏羲神農黃帝堯舜禹湯文武周公十像，後附以顏曾思孟林廟八圖，雖以圖贊為名，而僅圖前有說數行，無所謂贊，尤不可解。

【聖賢圖贊】無卷數 兩江總督探進本 此書摹仁和縣學石刻，而不著刊書人姓名。首冠以明宣德

二年巡按浙江監察御史海虞吳訥序，謂像為李龍眠筆。高宗於紹興十四年，即岳飛第作太學，三月臨幸，首製先聖贊，後自顏回而下亦撰詞。二十六年十二月，刻石於學。又稱舊有秦檜記磨而去之，則是石刻之題證，非木本之跋語。故顏曾二子後，皆有高攀龍贊，知為近時人刻也。考玉海，紹興十四年三月十



一日己巳幸太學。覽唐明皇帝及太宗真宗御製贊文。令有司取從祀諸贊。悉錄以進。二十四日乙亥。御製御書宜聖贊。令揭於大成殿。刻石頒諸路州學。二十五年。又製七十二賢贊。親札刻石頒降焉。二十六年十二月戊午。廷臣請頒諸州郡學校。從之。據此。則高宗所撰宜聖贊。刊石在紹興十四年。七十二賢贊。刊石在紹興二十五年。訥序謂先聖及七十二賢贊。俱於三十六年十二月刊石。殊誤。所列七十二子較史記及唐六典所載七十七人。少十人。增五人。與宋史禮志所載八十二人。則少十人。與唐宋典制皆異。考玉海卷一百十三。又云高宗七十二子贊。去史記公良孺公夏首公肩定顏祖鄒單句井疆罕父黑申黨原亢顏何公西輿如十一人。增申根蘧伯玉陳亢林放琴牢申堂續六人。遂爲七十二人。與此書人數正合。然玉海謂所去十一人。內有申黨。而此書仍列申黨。玉海稱增申堂續。而此書於申黨之外。乃增申根。互相刺謬。又如顏子封復聖公。曾子封宗聖公。皆始於元至順中。紹興中作贊。安得標此。又考唐開元二十七年。贈顏子竟公。閔子以下至卜商九人皆侯。曾參以降六十七人皆伯。宋詳符二年。贈閔子以下至卜商九人皆公。曾參以下七十二人皆侯。今書標爵皆襲開元。高宗作贊。亦不應近廢祥符。而遠從唐制。疑非宋之原石。且李公麟北宋人。安得至紹興中作圖。其圖畫諸賢。多執書卷。既非古簡策之制。而樊須名須。卽作一多髯像。梁鱣字叔魚。卽作手持一魚像。尤如戲劇。其妄決矣。

【闕里書八卷】兩淮馬裕家藏本

明沈朝陽撰。陳之伸補。朝陽江寧人。天啟閒貢生。官池州府學教授。

之伸海鹽人。仕履未詳。是編雜採聖賢事蹟。湊合成篇。每篇各繫以贊。詞意膚淺。考訂甚疎。如越絕書所

載子貢事之類。皆無所辨正。

【聖門志六卷】江蘇巡撫採進本

明呂元善撰。元善字季可，號冠洋，海鹽人。天啟中，官山東布政司都

事。後殉流寇難。其書一卷爲聖門表傳，二卷爲從祀列傳，三卷爲四氏封典，四卷爲禮樂，五卷爲古蹟，六卷爲東野氏仲氏世系，分子目六十有五。蓋元善官山東時，所得孔氏諸家譜牒爲詳，因輯其宗系，述爲此編。又取後代理學諸儒，附於弟子之後。然如魁名內閣，無關道統，而詳悉臚列，別次於從祀諸儒之末，殊爲不倫。又以諸儒未入祀典者，別載擬祀三十五人，中如岳飛之精忠，不在乎闡明理學，錢唐之直諫，亦未聞其銓釋聖經，乃欲例諸歷代儒林，擬議亦爲失當。元善書成未梓，其子兆祥重加校訂，海鹽令樊維城爲列入鹽邑志林中，末附崇禎初曲阜祠祀。元善及四氏子孫等給匾案牘，冗雜尤甚。

【三遷志五卷】安徽巡撫採進本

明呂元善撰。蓋因史鸚胡繼先二家舊本，爲之訂補，未脫稟而元善

殉寇難。其子兆祥，孫逢時，乃續成之。所載孟廟事蹟，每卷之中，又各分三子卷，凡二十一類，每類前爲四言贊一首，紀載頗詳，而體例標目，俱未能雅馴。

【宗聖志十一卷】浙江汪啟淑家藏本

明呂兆祥撰。案曾子祠墓，在今山東嘉祥縣。嘉靖中，詔錄其後

爲五經博士，世襲。求得其裔孫賢粹，居江西之永豐，令還嘉祥，世守祠廟。而歷代崇祀本末，記載未備。兆祥始修訂成書，卷一爲像圖志，卷二爲世家志，卷三卷四爲追崇志，卷五卷六爲恩典志，卷七卷八爲事蹟志，卷九至卷十二爲藝文志。書成於崇禎中，而世家志述其譜系，乃載及國朝康熙中事。恩典志內，亦載及順治初年，不知何人所增，蓋非盡兆祥之舊矣。

【陋巷志八卷】兩淮馬裕家藏本

明呂兆祥撰。顏子陋巷，相傳在曲阜孔廟東北六百步，舊無記載。正

德中提學副使陳鏞始爲作志。高歷中御史楊光訓又續編輯之。而兆祥是編。蓋因二家之本。重爲訂定。所載皆歷代崇祀典禮。而冠以退省從行諸圖。

【東野志四卷】浙江巡撫採進本

舊本題海鹽呂兆祥撰。裔孫東野武訂考。兆祥與武皆明末人。而是

編二卷之末。附錄順治康熙中奏議。詳載聖祖仁皇帝恩授東野沛然爲五經博士。蓋卽沛然因兆祥舊志稍爲續補也。前有呂化舜方應祥原序。而粘本盛跋則作於康熙壬寅。陳良謨序則作於康熙丙寅。亦續刻所加也。考元和姓纂載伯禽少子別爲東野氏。則東野氏系出周公。更無疑義。世承厥職。原非濫膺。惟是所敘世譜。稱第三代生二子。長暉。次曙。六代生二子。長縉。次紳。其人皆在春秋以前。則兄弟聯名。已在應場應璩之前。又二代東野宗於田中勝處。建祠以安先靈。則大夫之廟。可不建於家。十六世東野稷。字稷德。號白雲。則別號已見於戰國。二十一代東野賈。遭楚滅魯。負子攜譜。竄於東吳。是別族不必於太史。而戰國之末。尙延吳祚。蓋譜牒之學。古來卽不一說。司馬遷敘五帝世系。往往與載籍牴牾。而白居易自敘世系。亦與左傳相違。記載異同。固不足怪也。

【孔子年譜綱目一卷】兩江總督採進本

明夏洪基撰。洪基字元開。高郵人。其書成於崇禎中。於先聖

事蹟分年編輯。各提其要爲綱。而詳載其事爲目。於諸書異同。稍有訂正。而亦未一一精核也。

【孔子弟子傳略二卷】兩江總督採進本

明夏洪基撰

其書合家語史記所載孔門弟子。得八十人。卷

首凡例。稱家語弟子解。止記姓名邑里。而言行散見別卷。史記雜撮經書語無倫次。四書人物考及備考。收錄羣書。龐亂無紀。是編各傳。首敘聖賢教學。次及行事。終以評語。於經史典確者。大書列爲正傳。事瑣

文異者。小書附焉。妄誕者。雜錄備覽。其蒐擇頗勤。然論語禮記之文。人人習讀。亦一字一句。備錄不遺。未免冗贅。卷末附錄者九人。爲仲孫何忌。仲孫說。左丘明。伯魚。子思。孟子。顏涿聚。公罔之裘。序點。其辨仲孫說與南宮适爲二人。顏涿聚與顏譚由爲二人。論語左丘明與傳春秋者爲一人。皆爲典核。至公伯寮之列於弟子。雖據史記。然明代已罷其祀。洪基仍濫載入。則不免失考也。

【聖門志考略二卷】

兩江總督採選本。不著撰人名氏。惟書中自稱其名曰涓。檜樹一條。後稱崇禎三年庚午春。隨其大父登岱。詣孔林祀典一條。後稱康熙八年。以廷對留京。則國朝人也。而考康熙庚戌進士題名碑。是科無名涓者。殆貢生也。其書雜鈔闕里諸志爲之。殊不足以資考證。

【闕里廣志二十卷】

浙江汪啓淑家藏本。國朝宋際慶長同撰。際字峨修。慶長字簡臣。俱松江人。闕里志自前明陳鑄後。屢有修輯。皆蕪雜不足觀。康熙十二年。際爲孔廟司樂。慶長爲典籍。相與蒐求典故。因舊志而增損之。分圖像世家禮樂林廟山川古蹟恩典弟子職官聖裔賢裔藝文十二門。所載於故實較詳。然亦不能有所考訂也。

【三遷志十一卷】

江蘇巡撫採選本。國朝孟衍泰王特選仲蘊錦同撰。書成於康熙壬寅。以呂元善舊志歲久漶漫。而國朝尊崇之典。及子孫世系。林廟增修。亦未纂錄成編。乃以次輯補。分爲二十一門。特選滕縣人蘊錦濟寧人衍泰爲孟子六十五代孫。世襲五經博士。

【孟子生卒年月考一卷】

江蘇巡撫採選本。國朝閻若璩撰。若璩有古文尙書疏證。已著錄。是編博引諸書。考孟子出處始末。初辨孟子所生之鄒。是邾非鄆。次考來往梁齊滕宋之年。月中間旁及萬籟百籟。

之數。與所以去齊不入燕之故。而於生卒年月。卒無的據。案山堂肆考。具載孔孟生卒。謂孟子生於周定王三十七年四月二日。卒於赧王二十六年正月十五日。年八十四。若瓊獨不引之。蓋先儒註經。多不取雜書。鄭元註禮記。南風之詩。不引尸子。郭璞註爾雅。西王母。不引穆天子傳。山海經。皆義取謹嚴。非其疎漏也。

【孔子年譜五卷】直隸總督採進本 國朝楊方冕撰。方冕字東陽。號鶴巢。磁州人。是書中三卷爲年譜。

以天地人分紀之。其前一卷曰卷首。末一卷曰卷尾。中間於史記世家歷聘紀年闕里舊志諸書。頗有糾正。然註太冗瑣。又參以評語。皆乖體例。至卷首本祖庭廣記。作麟吐玉書圖。殊未免俗。卷尾泛引雜史。爲身後異蹟。如魯人泛海。見先聖七十子遊於海上。及唐韓滉爲子路轉生諸事。連篇語怪。尤屬不經矣。

【至聖編年世紀二十四卷】江蘇巡撫採進本 國朝李灼黃晟同編。灼字松亭。嘉定人。晟字曉峯。歙縣人。是書成於乾隆辛未。一卷至十六卷爲至聖年譜。十七卷至二十四卷爲歷代至國朝尊崇之典。冠以

灼所作孔子生日說。孔門出妻辨。增祀孔璇論。三篇。其生日說。謂公羊穀梁二傳。與史記所記。差一年。公穀記其懷妊之年。司馬遷記其誕生之年。殊爲穿鑿。自古及今。未聞以懷妊之年。筆之於書者也。至孔門出妻。謂之記載舛誤。則可。必謂庶氏之母爲庶子之母。子思嫡長。安得謂之庶子乎。書中辯野合之說。病亦同此。周道衰微。百氏橫議。造作言語。以誣聖者。不可殫陳。史遷妄採張華誤述。不過斷以一語。斥諸名教之外耳。乃附會其詞。以爲禱於尼山。野宿懷孕。故曰野合。是又愈鑿而愈舛矣。

【洙泗源流】無卷數 編修勵守謙家藏本 不著撰人名氏。前有自序。亦不署年月。序稱所採始於堯

舜以爲洙泗之源。終於顏曾思孟。爲洙泗之流。今考其書。僅自唐虞訖孔門弟子二十餘人。至子思而止。未及孟子。蓋不全之本。前有錢會二印。一曰虞山錢會遵王藏書。一曰雒陽忠孝家。篆刻拙惡。朱色猶新。蓋庸陋書賈所贗託也。

右傳記類聖賢之屬三十二部。二百三十一卷。內三部無卷數。皆附存目。

案孔子稱伯夷叔齊爲古之賢人。孟子亦曰伯夷聖之清者也。故孤竹之錄。得入聖賢。其餘非親炙鄒魯之堂者。概不濫預焉。蓋聖賢之名。惟聖賢能論定之。司馬遷敘仲尼弟子爲列傳。而七十子之門人不及焉。孟子弟子亦不及焉。慎之至也。

【別本晏子春秋六卷】內府藏本。舊本題齊晏嬰撰。其書原本八卷。已著於錄。此本爲烏程閔氏朱墨版。以外篇所載已見內篇者。悉移綴其文。附於內篇各條之下。與梅士享所刻管子同一竄亂古書。然今代所行。大抵此本。恐久而迷其原第。因附存其目。以著其失焉。

【王文正公遺事一卷】浙江巡撫探進本。宋王素撰。素字仲儀。且之幼子也。舉進士。官屯田員外郎。歷工部尚書。諡曰懿。事蹟具宋史本傳。是編所述。且事雖子孫揚胡之詞。然大概與史傳相出入。且本賢相故也。惟記真宗東封西祀之後。令近臣編錄符瑞。且言兩爲大祀使。所奏符瑞。一一非臣目覩。令堂吏取司天監邢中和狀。稱有此瑞。乞令編修官實錄。臣奏不可漏落一事云云。於事理殊爲不近。蓋且於符瑞齋醮。不能匡正。論者有遺議焉。故素以此陰解之。非實錄也。晁公武讀書志作四卷。註稱凡五百條。此本僅一卷。蓋非完書。然陳振孫書錄解題已稱一卷。則南宋末已行此節本矣。

【韓魏公家傳二卷】江蘇巡撫採進本 不著撰人名氏。記宋韓琦平生行事。陳振孫書錄解題以爲是其家所傳。晁公武讀書志則以爲其子忠彥所撰。錄公武去忠彥世近。當有所據也。其書隨年排次。頗爲繁冗。公武引陳瓘之言。謂魏公名德在人耳目如此。豈假門生子姓之閒。區區自列其說當矣。

【韓魏公別錄三卷】浙江范懋柱家天一閣藏本 宋王巖叟撰。巖叟字彥霖。清平人。鄉舉省試。廷對皆第一。調樂城簿。歷樞密直學士。簽書院事。事蹟具宋史本傳。巖叟嘗在韓琦幕府。每與琦語。輒退而書之。琦歿後。乃次爲別錄三篇。上篇皆琦奏對之語。中篇乃琦平日緒言。下篇則雜記其所聞見也。讀書志稱以國史考之。歲月往往抵牾。蓋失之誣。其書讀書志作四卷。書錄解題載有語錄一卷。亦稱與別錄小異。而實同。別錄分四卷。此總爲一篇。皆與此本三卷不合。其爲何時所併。不可考矣。

【韓忠獻遺事一卷】內府藏本 宋強至撰。至字幾聖。錢塘人。諸書不詳其始末。此書結銜稱羣牧判官。尚書職方員外郎。以其祠部集中詩文考之。則登第之後。謁選得泗州掾。以薦歷浦江東陽元城三縣令。終於三司戶部判官尚書祠部郎中。其上河北都運元給事書。所謂四歷州縣三任部屬者。雖不盡可考。參以此書所題。尙可見其大略也。至嘗佐韓琦幕府。故此編敘琦遺事頗詳。世所傳琦重陽詩。不嫌老圃秋容淡。且看黃花晚節香句。諸家詩話。遞相援引。其始表章者。實見至此編焉。

【豐清敏遺事一卷】浙江范懋柱家天一閣藏本 宋李朴撰。朴字先之。興國人。紹聖中進士。官至國子

祭酒。事蹟具宋史本傳。是書編次其師禮部尚書豐稷事蹟。宋志著錄一卷。與今本同。末有紹熙二年朱子後序。并附墓誌本傳於後。稷歷仕神宗哲宗徽宗三朝。屢著議論。時稱名臣。朴所敘錄。較史傳爲詳。書

末又有稷註孟子三章。幸學詩一首。及曾鞏所贈歌行。袁桷祠記。則明景泰中其十一世孫河南參政慶所搜討增入也。

【种太尉傳一卷】浙江鄞大節家藏本。宋趙起撰。起字得君。自稱河汾散人。河汾地廣。不知其里貫何所也。其書專記龍驤四衛指揮使知延州种諤事蹟。諤爲世衡次子。與兄古弟診。號關中三種。頗著威名。宋史附載世衡傳後。起所敘述。較史加詳。末云次其行事。作种諤傳。而此本前題种太尉傳。考史不言諤官大尉。此傳亦無此文。蓋自唐以後。武臣顯貴者。往往加至太尉。遂習爲尊稱。不必實居是職。如李煜歸宋後。祇爲特進。隴西郡公。而徐鉉奉詔往謁。乃語闕者。稱願見太尉。蓋當時流俗。有此等稱謂。意其猶宋人舊題也。史稱諤雖名將。而喜事貪功。實開永樂之釁。今傳中無貶詞。殆亦不無溢美矣。

【三蘇年表二卷】永樂大典本。宋孫汝聽撰。陳振孫書錄解題載三蘇年表三卷。右奉議郎孫汝聽編。卽此本也。然永樂大典所載。惟存蘇洵一卷。蘇轍一卷。蘇軾則別收王宗稷年譜。而汝聽之本。遂佚。蓋當時編錄。不出一手。故去取互異如是。今仍以三蘇年表著錄。從其本名也。

【東坡年譜一卷】永樂大典本。宋王宗稷撰。宗稷字伯言。五羊人。自記稱紹興庚申。隨外祖守黃州。到郡。首訪東坡先生遺蹟。甲子一周矣。思諸家詩文。皆有年譜。獨此尙闕。謹編次先生出處大略。敘其歲月。先後爲年譜云云。今刻於東坡集首者。卽此本也。迨國朝查慎行補註蘇詩。於此譜多所駁正。皆中其失。蓋創始者難工。踵事者易密。固事理之自然耳。

【范文正年譜一卷補遺一卷附義莊規矩一卷】浙江巡撫採進本。年譜一卷。宋樓鑰撰。鑰字大防。鄞



縣人。隆興元年進士官至參知政事。除資政殿大學士。提舉萬壽觀。卒諡宣獻。事蹟具宋史本傳。補遺一卷。不知何人所作。前有自識一條。謂取舊譜所未載者。見之各年之下。所摭前譜闕遺頗多。亦足以互相考證。元天曆三年。仲淹八世孫國僑與文正奏議同刊行之。其義莊規矩一卷。則仲淹嘗買田置義莊於蘇州。以贍其族。創立規矩。刻之版牘。後其法漸墜。治平中。其子純仁知襄邑縣。奏乞降指揮。下本州許官司受理。遂得不廢。南渡後。其五世孫左司諫之柔。復爲整理。續添規式。其本爲范氏後人所錄。凡皇祐二年。仲淹初定規矩十條。又熙寧元豐紹聖元祐崇寧大觀間。純仁兄弟續增規矩二十八條。其慶元二年十二條。則之柔所增定。書中稱二相公者。謂純仁三右丞者。謂純禮五侍郎者。謂純粹。皆其子孫之詞也。【葦崇禮年譜一卷】水樂大典本 宋葦煥撰。煥崇禮孫也。仕至通直郎。知饒州德興縣。主管勸農事。是譜詳敘歷官。而繫以所作詩文。崇禮有北海集。歲久散佚。近始蒐永樂大典所載。編次成帙。此譜頗可考其著作年月之前後焉。

【呂忠穆公遺事一卷】水樂大典本 不著撰人名氏。陳振孫書錄解題載之。亦不云誰作。所記呂頤浩言行。每條必曰公於某事云云。蓋其後人所述也。

【呂忠穆公年譜一卷】水樂大典本 不著撰人名氏。中頗載頤浩詩句。與他家年譜體例小異。

【涪陵紀善錄一卷】浙江巡撫探選本 宋馮忠恕撰。忠恕臨汝人。紹興初官黔州節度判官。其父理師

事伊川程子。與尹焞爲同門友。忠恕又師事焞。焞自金人圍洛。脫身奔蜀。紹興四年止於涪。時忠恕官峽中。及遷黔州。往來必過涪。紹興六年。焞被召赴都。明年忠恕以鞫獄來涪。因袖釋舊聞。輯而錄之。以成此

編忠恕之侍焯多在涪。涪爲程子謫居之地。而是書之成。又適在涪。故以涪陵紀善錄爲名。前有忠恕自序。宋史尹焯傳稱焯言行見於涪陵記善錄爲詳。則修史時卽採此書也。

【尹和靖年譜一卷】水樂大典本。不著撰人名氏。和靖尹焯諡也。據書中稱謂。蓋其門人所編。焯講學

以存養爲先。著述無多。又立朝不久。亦無所表見。故是譜所記事蹟。殊甚寥寥。又不及涪陵記善錄矣。

【周子年譜一卷】浙江鄞大德家藏本。宋度正撰。正字周卿。合州人。紹熙元年進士。官至禮部侍郎。事

蹟具宋史本傳。是編乃嘉定十四年。正官於蜀時所作。自云於周子入蜀本末爲最詳。其他亦不能保其無所遺誤。此本前有像贊。後附行錄誌銘。及宋史本傳。蓋後人又有所增入。非正原本矣。明張元禎嘗與朱子年譜合刻之。

【二梅公年譜二卷】兩淮鹽政探進本。梅詢年譜一卷。宋淳熙中陳天麟撰。梅堯臣年譜一卷。元至元

中張師曾撰。二人皆籍宣城。與梅氏爲同里也。明萬歷中梅一科合而刻之。又於詢譜後載詩略一卷。附錄一卷。堯臣譜後載文集拾遺一卷。附錄一卷。

【韓柳年譜八卷】編修汪如藻藏本。韓文類譜七卷。宋魏仲舉撰。仲舉建安人。慶元中書賈也。嘗刊韓

集五百家註。輯呂大防程俱洪興祖三家所撰譜記。編爲此書。冠於集首。柳子厚年譜一卷。宋紹興中知柳州事。文安禮撰。亦附刊集中。近時祁門馬曰瑤得宋槧柳集殘帙。其中年譜完好。乃與韓譜合刻爲一編。總題此名云。

【朱子年譜一卷】江西巡撫探進本。宋袁仲晦撰。案朱子年譜。宋洪友成刻者爲洪本。閩省別刻者爲

閩本明李默刻者爲李本。此本前有朱子後裔懷慶序。謂因各本不同，因訂正重刊。然校以王懋竑本，此本猶多漏略，不能一一精核也。

【君臣相遇錄十卷】浙江汪啟淑家藏本。不著撰人名氏。載宋韓琦事蹟。考晁陳二家書目，自今所傳韓魏公家傳、韓魏公別錄、韓忠獻遺事外，尙有韓魏公語錄一卷。又韓忠彥所撰辨欺錄一卷。語錄卽別錄之文，而顛倒其先後。惟卷末多一條辨欺錄爲忠彥記其父嘉祐末命事，與文富諸人辨。今雖未見其本，而書中大旨皆可考。惟此書晁陳皆不著錄，不知何人所作。蓋南宋時其家子孫所爲合辨欺錄別錄所載，實爲一書。觀書末載曾孫名十二人，而無侂胄。蓋諱而削之，知其成於開禧後矣。

【鄱陽遺事錄一卷】浙江巡撫採進本。宋陳貽範撰。貽範天台人。初范仲淹嘗守鄱陽，有善政。饒人爲之立祠。紹聖乙亥，貽範爲通判，因取仲淹在饒日所修創堂亭遺蹟，及其游賞吟詠之地，採而輯之，以志遺愛。自慶朔堂至長沙王廟記，凡十有三目。前有貽範自序。

【范文正遺蹟一卷】浙江巡撫採進本。不著撰人名氏。輯范仲淹生平遊歷，自其出於吳中，長於山東，以及洛陽陝西睦池饒澗諸地，爲仕宦所經。後人傳爲遺蹟者，採其名目，共爲一編。間附以前人題詠碑刻。至於西夏堡寨，亦并載之。中有文正書院等六圖，爲仲淹裔孫安崧所繪。蓋亦其後人所編也。

【言行拾遺事錄四卷】編修程賢芳家藏本。不著撰人名氏。記范仲淹言行事蹟，爲行狀墓誌所未載者。故曰拾遺。大抵取諸實錄，長編東都事略九朝通略諸書，而說部之可採者，亦附列焉。其第四卷所錄，則仲淹子純祐純仁純體純粹四人遺事也。

【道命錄十卷】內廷藏本。宋李心傳編。心傳有丙子學易編。已著錄。是書載程子朱子進退始末。備錄其褒貶。譏薦舉彈劾之文。宋史心傳本傳作五卷。此本十卷。與本傳不合。考卷首元至順癸酉新安程榮秀序。稱宋秀巖先生李公道。道命錄五卷。刻梓在江州。燬於兵。榮秀嘗得而讀之。疑其爲初藁。尙欲刪定而未成者。齋居之暇。僭因原本。略加釐定。彙次爲十卷。如左云云。然則此爲榮秀所編。非心傳之舊藁矣。永樂大典載有心傳原本。然所記惟程子事。與此本前六卷相同者過半。此本所有。而永樂大典不載者。凡二十八條。永樂大典所有。而此本不載者。凡八條。第七卷以下。永樂大典全無之。則榮秀大有所增刪。并所記朱子諸條。亦疑爲榮秀所附益。則所謂略加釐正者。特諱不自居於改竄耳。非其實也。其大旨不出門戶之見。其命名蓋以孔子比程朱。然於道命之義。亦未得其解。御製詩序及讖語。已闢之至悉。茲不具論焉。

【饒雙峯年譜一卷】永樂大典本。不著撰人名氏。雙峯。宋饒魯號也。魯自稱從黃榦李燾遊。距朱子僅再傳。當時重其淵源。多相趨附。歷主講於東湖白鹿西澗安定諸書院。故是譜所記。亦惟講學之事爲詳。案周密齊東野語。深致不滿於魯。且稱其自詭爲黃榦弟子。疑以傳疑。蓋莫能明。然亦不足深辨也。

【許魯齋考歲略一卷】永樂大典本。元耶律有尙撰。有尙字伯強。號迂齋。東平人。以伴讀功授助教。歷昭文館大學士。諡文正。事蹟具元史本傳。世祖時。許衡除中書左丞。固辭不受。因上奏取舊門生十二人爲伴讀。有尙其一也。是編載衡言行。較史爲詳。然大端已具於史矣。

【劉文靖公遺事一卷】浙江范懋柱家天一閣藏本。元蘇天爵撰。天爵有名臣事略。已著錄。是編乃所

述容城劉因行實也。考天爵名臣事略第十五卷，卽紀因事。然此卷所述，皆事略所未言。天爵於事略既成之後，別採舊聞，補其所闕，故命曰遺事。元史劉因本傳，多採用此卷，亦以後來搜輯較爲詳備歟。

【寧君政績書二卷】水樂大典本

元陶凱撰。凱字中元，江都人。以至正七年丁亥鄉試，授永豐教諭。適永豐令寧中受代去，縣之父老子弟，願以中善政刻諸石。凱因序中政績爲此書，以贈言學記等篇附焉。

【思賢錄五卷續錄一卷】浙江范懋柱家天一閣藏本

元謝應芳撰。應芳字子蘭，武進人。至正中，薦授三衢清獻書院山長，阻兵不能赴。明洪武中，歸隱橫山以終。自號龜巢老人，事蹟具明史儒林傳。是編爲其鄉宋寶文閣直學士鄒浩所作。正錄成於至正十五年，分爲五目，曰事實、曰文辭、曰祠墓、曰祠墓廢興、曰古今題詠。有楊惟楨鄭元祐二序。續錄則皆應芳及知府張度等祭墓之作。成於明洪武十二年。其中又載有洪武十三年以後祭文碑記諸篇，迄於正統十年，則後人所附入也。

卷六十

史部十六

傳記類存目二

【草廬年譜二卷附錄二卷】編修汪如藻家藏本

明危素撰。素字太樸，金溪人。元至正中，官至禮部尙

書，參知政事。翰林學士承旨，出爲嶺北行省左丞。後退居房山。淮王監國起爲承旨，如故。明洪武二年，授

翰林侍講學士。後因御史王著等論，素不宜列侍從。謫居和州以卒。事蹟具明史文苑傳。初吳澄孫常嘗編次其祖生平事蹟爲年譜。素爲澄之門人，因重加訂正，刻於至正乙巳。至明嘉靖甲寅，澄裔孫朝禎復增入行狀、神道碑、列傳、祭文一卷，及歷代褒典、奏議、文移一卷，鄒守益爲之序，卽此本也。

【褒賢集五卷】浙江巡撫採進本。不題撰人名氏。取宋元人著作有關范仲淹者及朝廷所降文牒等類，合爲一書。一卷爲傳、碑、銘、祭文，二卷爲優崇典禮，三四卷爲碑記，五卷爲諸賢贊頌論疏。中間載至元順帝至正間，則明初人所編也。

【滁陽王廟歲祀冊一卷】左都御史張若淮家藏本。不著撰人名氏。明初追封郭子興爲滁陽王，立廟滁州，令有司歲時奉祀。此本前列洪武十五年敕諭一通，具載祀典規條及守廟人戶，次爲太常寺丞張羽所撰滁陽王廟碑文，蓋卽從廟中碑刻鈔出別行者也。

【鐘鼎逸事一卷】浙江范懋柱家天一閣藏本。明李文秀撰。文秀，昆明人，熙寧王沐英之闈豎也。是編皆紀英行事，前列祠堂碑記三篇，後爲言行拾遺錄十一條，各爲之論。末附唐愚士贈文秀詩一篇，而冠以張紱劉有年王汝玉王驥序四篇。驥序題洪武壬午，汝玉序則書元年十二月，而劉去年號二字。蓋汝玉作於革除以前，而刻於革除以後，故削建文年號。驥序作於燕王篡立以後，故奉仍稱洪武三十五年之詔耳。閣寺之作本不足錄，而英本名臣文秀所錄，尙與史傳相出入，無詭詞夸飾，變亂是非之事故姑存其目焉。

【直道編八卷】兩江總督採進本。明陳怡編。怡，吳縣人，仕履未詳。其祖祚，字永錫，永樂辛卯進士，授河

南布政司參議。坐事落職。洪熙初起爲監察御史。終於福建按察司僉事。歷官俱有直聲。怡因輯其年譜。行狀。墓表。輓詩之類。以成此書。吳寬爲題此名。與明史祚本傳亦大致互相出入。案千頃堂書目載有孫堪直道編紀御史陳祚事。堪嘉靖中人。今未見傳本。其與此書爲一爲二。莫之詳矣。

【翊運錄二卷】江蘇周厚培家藏本

明劉應編。屬誠意伯基之孫也。是書成於永樂中。集其祖父所得

御書詔誥及行狀事實。以爲此錄。取誥文中開國翊運之語爲名。同郡王景爲之序。成化中。巡按浙江御史戴用。以版久漶漫。因增輯重梓。楊守陳爲之序。嘉靖初。從處州府知府潘潤之請。以基九世孫瑜襲爵。瑜因復增入襲封誥敕及部議題本謝恩表之類。自爲後序。二卷之首。雜入基表頌五篇。頗爲不倫。以序文考之。卽瑜所增入。蓋徒欲侈陳祖德。爲闕閱之光。而未知著述體例者也。

【崔清獻全錄十卷】兵部侍郎紀昀家藏本

明崔子璉編。其書成於永樂中。皆其五世祖與之遺事

遺文也。與之字正子。廣州增城人。紹熙四年進士。理宗時累官廣東安撫使。拜參知政事。右丞相。致仕卒。諡清獻。事蹟具宋史本傳。與之所著有菊坡文集。佚於兵火。又有嶺海便民榜。海上澄清錄二書。皆記其當時政事。後亦不傳。僅存其言行錄三卷。奏劄詩文五卷。子璉因哀爲一編。又以理宗御劄及諸家詩文爲附錄二卷。其言行錄三卷。林鉞跋稱宋太社司令李公哀輯。而不載其名。宋端儀序稱略爲更定。甘鏞跋又稱旁考史傳。補其脫略。然則已非原本矣。又蔣曾榮家別有寫本。分爲二集。內集二卷。前卷爲言行錄。後卷爲奏劄詩文。外集三卷。上卷爲所賜詔札。中卷爲宋史本傳。及續通鑑綱目諸書所記與之事。下卷爲題贈詩文。題其十世孫燾所重編。成於嘉靖庚申。前有測引一篇。稱重編先錄既成。有謂不當以行

先言者有謂不當以臣先君者。後見舊版篇次記號。乃知新本爲後人剽改。曠所重編。實還其舊。今觀其書。雖併十卷爲五卷。而序次略與子遠本合。所謂還其舊者。確不誣也。

【陸右丞蹈海錄一卷】浙江鮑士恭家藏本。明丁元吉編。元吉鎮江人。是書成於成化中。記宋陸秀夫海上死難事蹟。採宋史本傳及龔開所作傳。黃潛所作年譜。益以諸家題詠。彙爲一編。並載秀夫遺文二首。末附桑海遺錄序。大忠祠碑。及祭文一首。

【張乖崖事文錄四卷】浙江范懋柱家天一閣藏本。明顏端徐濟同編。端應山人。官成都縣教諭。濟杭州人。官華陽縣教諭。前有文安邢表序。蓋宏治三年表爲四川左布政使。以張詠爲蜀名宦。故屬二人輯錄此編。一卷爲本傳及事實。二卷爲遺文十二篇。三卷四卷爲同時贈答及後人祠記祭文之類。詠全集尙有傳本。端等未見。故所輯頗挂漏焉。

【李衛公通纂四卷】直隸總督探蓮本。明王承裕撰。承裕字天宇。三原人。吏部尙書恕之子。宏治癸丑進士官至南京戶部尙書。諡康僖。事蹟附見明史恕傳。承裕與唐李靖爲同里。故旣爲建祠。又纂其遺事。爲此書。明史藝文志著錄作四卷。此本凡史牒纂一卷。遺作纂一卷。文集纂一卷。存蹟纂一卷。與明志合。所載皆習見之文。至李衛公問對一書。出自阮逸僞託。而一概列入。絕無辨證。可知其考訂之疎矣。

【陽明先生浮海傳一卷】浙江巡撫探蓮本。明陸相撰。相字良弼。餘姚人。宏治癸丑進士官至長沙府知府。是書專紀王守仁正德初謫龍場驛丞。道經杭州。爲姦人謀害。投水中。因飄至龍宮。得生還之事。說頗詭誕不經。論者謂守仁多智數。慮劉瑾迫害。故棄衣冠。僞託投江。而實陰赴龍場。故王世貞史乘考誤。



嘗力辨此事爲不實。而同時楊儀高坡異纂亦載此事。與相所紀略同。蓋文人之好異久矣。

【朱子實紀十二卷】江蘇巡撫探蓮本 明戴銑編。銑字寶之。婺源人。宏治丙辰進士。官至給事中。以疏

彈太監高鳳下詔獄。廷杖創甚而卒。事蹟具明史本傳。是書詳述朱子始末。首曰道統源流。世系源流。次年譜。次行狀本傳。次廟宅。次門人。次褒典。次讚述。次紀題。其書本因年譜而作。其標曰實紀者。銑自序。稱謂之年譜。則紹乎前。彰乎後者不足談。必曰實紀。然後并包而無遺。蓋年譜主於明朱子學問之序。出處之道。而銑是書。則主於以推崇褒贈。誇耀世俗爲榮。其立意本各有取也。

【韓祠錄三卷】浙江巡撫探蓮本 明葉性談倫同編。性里籍未詳。官潮州府同知。倫上海人。天順丁丑

進士官至工部右侍郎。然是編前有翰林院檢討盛端明序。稱性編錄未成。以述職北上。倫時爲潮州知府。因續成之。考書成於正德甲戌。上距天順丁丑已五十八年。且作序之盛端明爲宏治壬戌進士。上距天順丁丑亦四十六年。與倫似不相及。卽倫老而尙存。亦不應七八十歲尙爲知府。後乃忽至九卿。疑爲別一談倫。名姓偶同也。其書首載韓愈遺像。及韓山書院鱷魚韓木諸圖。次唐書本傳。及愈謫潮州時所作詩文。次記祠制祭儀。及後人碑記詩讚。末附載趙鼎得全書院記。陸秀夫馬發祠記。以皆在潮地。故并錄之。其南珠亭記一篇。則又以潮之人物代與歸美於愈云。

【奕世增光錄八卷】浙江巡撫探蓮本 明王道行編。道行字明南。陽曲人。嘉靖庚戌進士。官至左布政

使。是爲續五子之一。明史文苑傳附見王世貞傳中。是書乃其官常鎮兵備副使時爲魏校所刊也。第一卷至五卷載敕命祭文。以及同時諸人贈答書啓。第六卷載校行狀誄詞。及遺事。七卷八卷則文案備遺

也。因校誥敕中有永增奕世之光語，遂以名其書焉。

【薛文清行實錄五卷】江蘇巡撫採進本

明王鴻撰。鴻，河津人。官石灰山關稅大使。薛瑄之曾孫壻也。

是編第一卷爲瑄像贊行狀神道碑事實，二卷爲請從祀疏七篇，三卷爲祠堂書院諸記六篇，祭文三篇，四卷爲讀書錄文集諸序四篇，詩五首，第五卷則雜錄柱聯之類，而附以薛氏歷世科貢傳芳圖。前有喬字序，作於正德辛未，而奏疏有隆慶五年祭文，有萬曆二十六年所記科貢，有崇禎壬午癸未，則瑄後人以次續入，非鴻之舊也。

【商文毅公行實一卷】浙江范懋柱家天一閣藏本

明商汝頤編。汝頤，商輅孫也。以輅遺集兩燬於火。

恐先德不傳，乃哀爲是書。凡王獻所作行實一篇，尹直所作墓誌銘一篇，楊子器所作神道碑一篇，末有正德十年汝頤自跋。正德十六年刊版。王子言又爲之跋。

【商文毅年譜四卷】兩淮馬醫家藏本

明商振倫撰。振倫，輅之元孫也。書前有小像八幅，自鄉試第一。

追官至護身殿大學士，皆圖畫之，殊未能免俗。其言行錄一卷，則輅孫汝泰所作，振倫并刊之也。

【傳信辨誤錄一卷】浙江吳玉璠家藏本

明陳虞岳撰。虞岳，泰和人。正統間輔臣陳循五世孫也。土木

之變，循在內閣爲首授，及景帝欲廢英宗太子，循依違不能匡正，以此爲當世所譏。陳建通紀載其事，虞岳以爲誣，其祖乃作此書以辨之。首爲諸名公敍略節略，次爲傳信六條，一曰首定儲宮之策，一曰力沮南遷之議，一曰計退德勝之圍，一曰密運回鑾之略，一曰保護南宮苦忠，一曰請復南遷議疏。所引諸書，惟力沮南遷一條，弇山堂別集及叢記載有循名，其五事則皆無確證。次辨誣五條，一曰辨不諍易儲

之誤。一曰辨徐有貞佩玉帶之誤。一曰辨請治龔遂榮獄之誤。一曰辨翰林用雜流之誤。一曰辨申明制科之誤。其意與孤兒鬪天錄同。亦孝子慈孫不得已之苦心也。

【夏忠靖遺事一卷】浙江范憲柱家天一閣藏本

明夏崇文撰。崇文字廷章。湘陰人。成化戊戌進士。官

至南京太僕寺少卿。蓋夏原吉之孫也。是編追述原吉歷官始末甚詳。於世所傳慈感蚌珠事。刪之不載。體例頗爲嚴謹。然原吉治水。功在東南。其方略亦不備載。殆以事具國史耶。惟燕王篡立。原吉稱臣。此所謂范質生平。惟欠周世宗一死者也。而此云或執之以獻燕王。是則子孫之詞矣。

【雲林遺事一卷】浙江巡撫採進本

明顧元慶撰。元慶字大有。號大石山人。長洲人。都穆之門人也。此

書皆紀倪瓚事蹟。分高逸詩畫潔癖游寓飲食五門。崇禎間。常熟毛晉別有刻本。云從天竺僧寮見之。不著作者名氏。較此本所載稍繁。而此本後附贈詩及誌銘二首。則毛本無之。江寧李蘅嘗刻其本。於所輯瓚探中題云。顧元慶撰。雖未知所據。然考元慶所著。尙有瘦鶴銘考。夷白齋詩話。蓋亦雅士。蘇州府志載其兄弟皆織齋治產。惟元慶以鬪書自娛。王穉登往訪之。年七十五。猶酬對不倦。是其志趣與瓚相近。或輯此編。以明所尙。亦事理所有矣。

【旌孝錄一卷】浙江巡撫採進本

不著撰人名氏。載成化十一年旌表朱灝孝行事。考朱觀潛跋朱存

理遺文後曰。野航先生著述甚富。自鐵網珊瑚。世有刊本。珊瑚木難。好事傳鈔外。祇購樓居雜志一卷。旌孝錄一卷。并詩文數十篇。云云。則此編存理所輯也。灝字景南。長洲人。卽存理之父親。歿負土成墳。廬於其側。有馴鳥之異。詔旌其門。存理字性甫。博雅工文。終於布衣。

【岳廟集四卷】

編修汪如藻家藏本

舊本題明徐階編。張庭校。焦煜刊。而首載階序。稱從黃山焦子請

所輯武穆祠詩文讀之。又云因不自量。謀於五山張子而去取之。則煜之初臺。而階與庭爲之刪定。庭序則云黃山子謂少湖子與庭曰。查校之。我將刊焉。因取汪氏所輯鈔本。往復參校。則初臺又非煜作矣。大抵難出衆手。不可名以一人也。原本凡傳一卷。制一卷。議序記一卷。辭樂府詩一卷。而附以岳武穆遺文一卷。今以武穆遺文析出。別入集部。故此本以四卷著錄焉。階字子升。華亭人。嘉靖癸未進士。官至武英殿大學士。諡文貞。事蹟具明史本傳。庭自署曰眉山。煜自署曰宛陵。考太學進士題名碑。嘉靖癸未科。有張庭。四川夾江人。焦煜。南直隸太平人。皆階之同年。當卽此二人。至所謂汪氏者。則不可考矣。

【吳疏山集十七卷】

江市巡撫探進本

明吳悌撰。悌字思誠。疏山。其別號也。金谿人。嘉靖壬辰進士。官

至兵部侍郎。諡文莊。事蹟具明史儒林傳。其學出於王守仁。然清苦剛介。卓然不愧於儒者。非姚江末流。提唱心學。恣爲橫議者比。集止三卷。然據原跋。則尙有贗作。孫氏墓志。胡氏表二篇。竄入第四卷。爲言行錄。乃悌門人李約所編。第五卷以下。皆誥敕及表章頌美之文。其後人屢屢重刊。輒轉附益者。蓋原本名紀實錄。乃傳記之流。體例不妨如是。此本改題曰集。遂使附錄之文。至十四卷末。大於本。失其初編之旨矣。今從崔輿之集之例。仍入之傳記類焉。

【胡梅林行實】

無卷數

兩淮鹽政探進本

明胡桂奇編。桂奇。績溪人。兵部尙書宗憲之子。此書卽紀

宗憲行實。梅林者。宗憲別號也。宗憲平倭之功。載在史冊。不容湮沒。至其比附嚴嵩。趙文華。公論亦不可掩。此書出其後人之手。固未可據爲徵信矣。

【忠烈編十卷】浙江范懋柱家天一閣藏本

明孫堪孫塲孫陞同編。三人皆巡撫江西副都御史餘姚

孫燧之子也。燧遇宸濠之變，抗節被戕，堪等彙其制誥卷牘碑狀誌傳，以及諫祭之文，編爲此集，曰忠烈者，嘉靖初所贈諡也。序爲嘉靖辛亥嚴嵩撰，其言不足爲燧榮，蓋其後人印行，偶失刊削耳。

【鄭端簡年譜七卷】浙江巡撫探進本

明鄭履淳撰。履淳字叔初，海鹽人。嘉靖壬戌進士官至光祿寺

少卿，事蹟具明史本傳。履淳爲鄭曉之子，故追述曉事，以成此譜。凡曉所作奏疏詩文，皆一一附載其中。如鹽政壞於折色，及海鹽官軍宜掣回衛所操練諸疏，頗足補史志所未備。然冗漫亦由於此。末附祭文誥諭卹典墓志行略之類，於譜例已爲複出，又以履淳所作思親詩文附鑄於末，多至三卷，於體裁尤不協矣。

【董子故里志六卷】兩江總督探進本

明李廷寶撰。廷寶字國用，號滄溪，曲沃人。嘉靖中官景州知府，

考漢書稱董仲舒廣川人，而廣川地大，今山東德州直隸景州棗強縣皆其故地，故三邑皆祀董子，皆有董子故蹟。其作志書皆自以董子爲鄉人。德州斥景州之牽引，景州斥德州之附會，棗強又出而斥二州之影佔，數百年來喧如聚訟。迄今未有所歸。廷寶官於景州，故據廣川里名，定仲舒爲景州人，而所載馬偉董子辨一篇，又以董學村割隸故城，欲引之以爲故城重。夫惠跖兄弟，不以惠而寬跖，向歆父子，不以向而榮歆，況夫前代鄉賢，何關後人之事。郡邑志乘，鋼習相仍，紛紛爲無益之爭，皆其所見之小也。

【濂溪志九卷】兩淮馬裕家藏本

明李楨撰。楨字維卿，安化人。隆慶辛未進士官至南京刑部尙書，事

蹟具明史本傳。是編雖以濂溪爲名，列乎地志，實則述周子之事實，首載太極圖說通書，次墓志及諸儒

議論歷代褒崇之典。次古今紀述。次古今題詠。並祭告之文。

【濂溪志十三卷】河南巡撫探進本。明李嶧慈撰。嶧慈字元穎。龍城人。官道州知州。是編因李楨舊志。稍爲緝補。無所考證闡明。

【東方類語十六卷】浙江巡撫探進本。明朱維陞撰。維陞海鹽人。其書皆類聚漢東方朔事蹟。自列傳別傳外傳。以及瑣語神異經十洲記諸書。無不採撮。創立十目。分爲內外二篇。內篇記其常事。外篇則涉神仙家言。其條例內辨史記東郭先生爲臨淄人。與東方朔之爲厭次人。地各不同。自來引用多誤。亦稍有考核。然其徵引猥雜。究不能出小說之門徑。不足據也。

【二程年譜二卷】安徽巡撫探進本。明唐伯元撰。國朝黃中訂補。伯元字仁卿。澄海人。萬曆甲戌進士。官至南京吏部文選司郎中。事蹟具明史儒林傳。中字平子。號雲瀑。舒城人。考二程遺書。有伊川年譜。而無明道年譜。宋文鑑所載明道墓志。朱子又偶未見。故別爲之行狀。此書取明道行狀。改爲年譜。又取伊川年譜。小變其體例。均無所考正。僅因襲舊文而已。

【涑水司馬氏源流集略八卷】浙江巡撫探進本。明司馬晰編。晰字宗晦。夏縣人。萬曆癸卯舉人。宋司馬光十七世孫也。卷首自序云。自先文正公居於河洛。竊於鳴條。而曾孫開國公扈遷東粵。家於會稽。南北相距殆四千里。代次相承。凡十餘世。於是北人以涑水氏爲無後。南人以山陰氏爲失祖。是編所輯。先之以行事系籍之實。繼之以制誥圖跋之傳。終之以紀述標題之富。其意蓋將搜採以備家乘。而第八卷中有積德之什。乃載晰由山陰復歸於夏縣。萬曆癸卯鄉試第一。里人贈賀之作。是又蔓延附載。不出譜

牒之寔白矣。

【武侯全書二十卷】江四巡撫採進本 明王士騏撰。士騏有馭倭錄。已著錄。其編述諸葛亮始末。首三國志本傳。次張拭補傳。次鼎立繼統。連吳南征北伐。遺命調御法簡八篇。以補張傳。次心書。次新書。次陣圖。次篤翰。次世系。次朱子綱目。又附錄後人評論詩賦雜文三卷。終焉。按陳壽進諸葛氏集表云。剔除重複。隨類相從。凡爲二十四篇。具列其目於傳後。今其書久不可見。是書搜羅完備。而心書新書之類。真偽蕪雜。未能刪汰。諸篇分隸。亦或未當。後楊士偉因士騏此本。別改定爲諸葛書。較爲精核。以創始者爲士騏。故仍存其目焉。

【米襄陽外紀十二卷】江蘇巡撫採進本 明范明泰撰。明泰字長康。嘉興人。萬曆庚子舉人。是編紀米芾遺事。分恩遇。類絕。潔癖。嗜好。塵談。書學。畫學。譽美。書評。雜記。考據。十二門。多不著出典。未足依據。亦時有舛謬。如恩遇第一條云。皇祐二年。詔米芾以黃庭小楷作千字文。考芾生於皇祐三年辛卯。則所稱寫千字文。在生前一年矣。有是理乎。

【米芾志林十六卷】江四巡撫採進本 亦題明范明泰撰。與襄陽外紀並同。惟後附刻襄陽遺集一卷。爲明泰所輯。蓋未見寶晉英光集。故有是刻。又海岳名言寶章待訪錄。研史各一卷。則皆芾之遺書。然書史畫史。竟不編入。亦殊疎漏矣。

【精忠類編八卷】左都御史張若莊家藏本 明徐縉芳撰。縉芳字奕開。晉江人。萬曆辛丑進士。官至監察御史。事以附見明史劉策傳。是編輯錄宋岳飛事實藝文。首爲表類。紀姓氏世系之屬。次爲傳類。記生

平始末。次爲遺翰類。皆飛詩文。次爲宸翰類。皆高宗所賜。載於金陀粹編者。次爲褒贈類。皆歷代制誥案牘。次爲家集類。皆岳珂之文。有關於飛者。次異感類。紀諸靈應。次詩類。文類。則皆後人題述之作也。編次頗無條理。而異感類中。如瘋魔行者罵秦檜。胡迪入冥之類。尤類傳奇演義。飛之忠烈。自與日月爭光。不假此委巷之談。侈神怪以相耀也。

【薛文清年譜一卷】江蘇巡撫採進本

舊本題明楊鶴撰。鶴字脩齡。武陵人。萬曆甲辰進士。官至兵部

尚書。總督陝西三邊軍務。事蹟具明史本傳。考是書後有鶴自跋。稱本薛瑄門人張鼎所編。歲久版佚。瑄八代孫士宏。偶以舊本示滿朝薦。及鶴朝薦。屬鶴訂定。鶴因命其子嗣昌。重以瑄集考正。年月並採集中詩文佚事補之。然則此本雖題鶴名。實出嗣昌手耳。嗣昌字文弱。萬曆庚戌進士官。至東閣大學士。事蹟具明史本傳。

【蘇米譚史一卷蘇米譚史廣六卷】江蘇周厚塘家藏本

明郭化撰。化字肩吾。宣城人。始末未詳。譚史

序題辛亥。蓋萬曆三十九年也。是編雜採蘇軾米芾軼事。可資談柄者。各爲一卷。又廣蘇軾事爲四卷。米芾事爲二卷。皆摭拾小說。無他異聞。又皆不著所出。彌難依據。

【海珠小志五卷】兩淮馬裕家藏本

明李韓撰。韓番禺人。萬曆中。官至武定府知府。宋龍圖閣待制吏

部侍郎李昂英之裔也。廣州城外珠江。有海珠石。屹立水中。昂英常讀書其地。捐資葺寺曰慈度。後人卽寺祠焉。明萬曆中。韓因考尋古迹。輯爲此志。凡四卷。國朝康熙丁丑。其後人文焰。重加校刻。增以近人諸作。共爲五卷。前一卷載圖像諸記。行實祭文。後四卷則遊覽謁祠詩詞也。



【襄陽外編】無卷數

浙江巡撫採進本

明顧道洪編。道洪字嗣圖。無錫人。是編作於萬曆中。首繪孟

浩然像。並錄探史書本傳。暨諸家贈答題詠之作。復以古今詩話。附列於後。所採上起於唐。下迄乎明。然王士元浩然集序。近在耳目之前。乃反佚之。何也。

【程朱闕里志八卷】

兩淮馬裕家藏本

明趙滂編。滂歙縣人。是書前有高攀龍序。則成於萬曆中也。大

旨謂朱子系出新安。二程祖墓亦在焉。故合志之分爲七。西案闕里乃孔子里名。非推尊之號。宋咸淳五年。詔婺源祠所。稱文公闕里。已爲失實。今程子亦稱闕里。則尤承譌踵謬。習焉而不察者也。

【考亭朱氏文獻全譜十二卷】

浙江巡撫採進本 明朱鍾文撰。鍾文字吾滄。朱子十二世孫。官大足縣

知縣。新安朱氏支派非一。其北洛墩頭之朱。本不出於考亭。時方醜金購譜建祠。鍾文恐其亂宗。乃溯唐茶院公以來世次。纂紀本末。搜討頗詳。分類凡十三門。曰廣睦。曰明宗。曰湖本。曰尊祖。曰著居。曰庭訓。曰褒典。曰彙文。曰列傳。曰宦達。曰女德。曰外戚。曰雜紀。冠以朱子所作世譜原序。

【溫公年譜六卷】

江西巡撫採進本 明馬櫛撰。櫛字子端。夏縣人。與司馬光爲同里。以光舊無年譜。因

撰此編。以補史傳所不及。其大指以光行狀爲主。參以史傳。及名臣言行錄。證以光所著傳家集。其餘詩話小說。皆詳爲考訂。分年編載。其不可專屬一年者。則總爲附錄於末焉。

【梅墟先生別錄二卷】

兩淮鹽政採進本 明李日華鄭琬同撰。日華字君實。號竹懶。嘉興人。萬曆壬辰

進士官至太僕寺少卿。明史文苑傳。附載王維儉傳中。琬字翰卿。自稱閩人。其始末未詳。是編爲嘉興周履靖而作。履靖字逸之。能詩好事。與其妻桑貞白。自相唱和。多刊書籍以行。夷門廣讀。卽其所編。蓋亦趙

宦光陳繼儒之流。明季所謂山人者也。上卷爲日華所撰。載其生平甚悉。下卷爲琬所撰。亦略具事實。而錄其詩中摘句尤多。

【蘇米志林三卷】內府藏本。明毛晉撰。晉有毛詩陸疏廣要。已著錄。是書撮蘇軾瑣言碎事。集中所遺者。編爲二卷。又以米芾軼聞。編爲一卷。大概與蘇米譚史互相出入。

【顧端文年譜二卷】浙江巡撫探進本。明顧與沐編。入國朝後。其孫涇。曾孫貞觀。相續成之。與沐無錫。人。顧憲成之子。由舉人官至夔州府知府。涇亦舉人。貞觀官中書舍人。其書前冠以崇禎二年諭祭文。及誌銘行狀。復附憲成沒後奏請贈諡諸疏。於原文皆刪節存略。視他家較簡核有體。

【張抱初年譜一卷】江西巡撫探進本。明馮奮庸撰。奮庸字則中。壽安人。師事灑池張信民。因紀其生平事蹟爲年譜。信民字孚若。號抱初。灑池人。由鄉貢官懷仁縣知縣。

【關帝紀定本四卷】兩江總督探進本。明戴光啓邵潛同編。光啓字方廷。潛字潛夫。皆江都人。初元至大開。胡琦曾輯關帝事蹟成書。明弘治嘉靖天啓開。吳濬呂柟薛三省諸人。皆有纂錄。光啓潛因諸家之本。刪補以成此編。首世系。次年譜。次封號。次誥命。次實錄。次遺蹟。次論辨頌贊。次奏疏碑記。次詩。次祭文。次靈異。刻於崇禎戊辰。姚希孟爲之序。

【心齋類編二卷】兩江總督探進本。明王元鼎編。元鼎泰州人。王良之後。書中繪音首簡廟謨首錄二跋。自稱良之元孫。彙選標題。跋又自稱良之曾孫刊版。必有一謬也。是書紀崇禎四年。良從祀孔廟始末。上卷爲奏疏類篇。錄嘉靖開巡撫劉節御史吳悌薦良二疏。并諸廷臣請從祀三疏。請諡一疏。下卷爲別

傳類編錄萬歷辛丑翰林館課以王良傳命題諸詞臣所擬傳十六篇上卷之前冠以崇禎三年諭旨一道題曰給音首簡又載崇禎辛未會試策題一道問明從祀文廟諸人數及良名者題曰廟謨首錄而以鄉紳揭帖尺牘附卷末又列諸家著述之有涉於良者曰彙選標題列公私祠祀及良者曰禋祀類紀元鼎聞邱報志喜詩四首亦編其中體例頗爲繁碎考明史儒林傳以良附王畿傳中紀其終始甚詳然不載有從祀孔廟事今兩廡俎豆亦無良位不知元鼎何以有此書也

【邵康節外紀四卷】兩江總督採進本 明陳繼儒編繼儒字仲醇號眉公華亭人事蹟具明史隱逸傳是編取邵伯溫聞見錄所載邵子事蹟略爲詮次始末並其自稱伯溫及稱康節先公諸字亦未刊削殆不免爲襲作奏之誚又附載伯溫易學辨惑與查顏散先天方圓圖說余孟宜經世要旨及家傳心易數序三篇而終以邵子及伯溫本傳繼儒號爲隱君其作此書殆以自寓然伯溫之錄具在何必復述其文也

【遜志齋外紀二卷續集二卷】安徽巡撫採進本 明姚履旋撰履旋上元人是編採諸書所紀方孝孺殉難後事及文移案牘之屬彙爲一編共分十類曰表揚曰像贊曰傳銘曰記狀曰賜言曰贈遺曰碑記曰祭弔曰復姓曰祠典其復姓一類載孝孺幼子德宗冒姓余氏及歸宗建祠事頗具始末其書成於崇禎中後有續集二卷則國朝康熙中婁縣訓導徽州項亮臣所補輯也

【周元公集十卷】編錄朱琦家藏本 明周沈珂編沈珂吳縣人周子奇也是集卷一爲圖像卷二爲世系年譜卷三爲遺書卷四爲雜著卷五爲諸儒議論卷六爲事狀卷七爲褒崇優卹卷八爲祠墓諸記卷

九卷十皆附錄後人詩文。雖以集爲名。實則周子手著僅五之一。今入之傳記類中。從其實也。

【周氏遺芳集五卷】編修朱筠家藏本

明周沈珂及其子之翰編。先是周子十七世孫與爵輯其先世著述事蹟。自周子四世孫興裔以下。爲遺芳集。凡歷代褒崇詔諭及傳誌記序諸作。以次附焉。沈珂父子重爲編次。而與爵以下。則仍無所增益。

【靈衡廟志一卷】兩淮馬醫家藏本

明夏賓撰。賓始末未詳。宋建炎三年。金兵攻臨安。守臣康允之棄城走。錢塘令朱躡。偕縣尉金勝祝威。率民兵力戰死之。杭人賴其捍禦。得乘隙以逃。爲立祠於死所。是書以建廟封侯本末。並祀典碑記彙爲一編。見有功必報之禮。亦風起忠烈之志也。

【應略二卷】浙江巡撫探進本

明陳念先撰。念先慈谿人。其八世祖敬宗。字光世。永樂甲申進士。宣德間由司業陞祭酒。官南應者二十年。嚴重有師法。與北應祭酒李時勉齊名。世稱南陳北李。念先於崇禎末。至南應。搜輯應志所載。參以年譜文集。編年紀錄。以成是書。蓋惟備敬宗一人。居官之始末。非紀南應事也。

【宋四家外紀四十九卷】內府藏本

不著編輯者名氏。四家者。蔡襄。蘇軾。黃庭堅。米芾也。蔡紀成於徐燠。蘇紀成於王世貞。黃紀成於陳之伸。米紀成於范明泰。本各自爲書。此本蓋明季坊賈所合刻也。

【羅江東外紀三卷】兩淮鹽政探進本

國朝閔元衡撰。元衡字康侯。烏程人。自號歐餘生。自以終身不第。有似羅隱。故作此書。蓋一時寓意之作也。

【賀監紀略四卷】兩淮鹽政探進本

國朝閔元衡撰。元衡字康侯。烏程人。自號歐餘生。自以終身不第。有似羅隱。故作此書。蓋一時寓意之作也。

【賀監紀略四卷】兩淮鹽政探進本

國朝閔元衡撰。元衡字康侯。烏程人。自號歐餘生。自以終身不第。有似羅隱。故作此書。蓋一時寓意之作也。

【賀監紀略四卷】兩淮鹽政探進本

國朝閔元衡撰。元衡字康侯。烏程人。自號歐餘生。自以終身不第。有似羅隱。故作此書。蓋一時寓意之作也。

其書備摭賀知章遺文軼事及唱酬題詠之詞彙爲一編采摭頗富然如唐明皇帝送知章詩有二本方回瀛奎律髓具載朱子之說又章穀才調集所載楊柳枝詞標題誤增枝字遂以天寶以前之絕句爲長慶以後之樂府皆未考定則亦多疎舛矣徵引古書每事必造一標題尤類小說體例也

【姑山事錄八卷】浙江巡撫保進本 國朝吳肅公杜名齊同撰肅公有詩問已著錄名齊始末未詳是編述明末沈壽民事實壽民字眉生宣城人崇禎中巡撫張國維以賢良方正薦徵赴闕下抗疏劾楊嗣昌奪情誤國熊文燦不能制敵之罪疏奏留中不報遂歸隱姑山肅公名齊皆其門人因作此書以記其出處卷一卽劾楊嗣昌熊文燦疏及答薦辟書數篇卷二以下皆撫按薦疏公揭及同時友人來往書啓而終以投贈篤什福王時壽民又爲馬阮所惡幾遭毒手別有書記其事曰甲乙存略見肅公所作凡例中今未見傳本其存佚不可知矣

【謝臯羽年譜一卷】兩淮鹽政探進本 國朝徐沁撰沁字莖公會稽人嘗刊謝翱髮集因復搜探遺事爲作是譜中間如扎木楊喇勒智原作楊望眞加今改正發宋陵事以元世祖本紀參核當在至元戊寅不當在乙酉沁則據周密癸辛雜識定爲乙酉黃宗羲爲作序頗疑其非又姜夔乞正雅樂在寧宗慶元間而譜以爲理宗時亦沁之誤也

【寧海將軍固山貝子保越平閩實績一卷】內府藏本 不著撰人名氏所紀乃惠獻貝子富喇塔奉命討逆藩耿精忠統兵在溫州擊賊及暫回處州之事起康熙十五年二月十四日迄六月初九日按日記載蓋卽取寧海將軍行營塘報湊集成帙故詞句多不雅馴且所錄僅四月之事首尾亦未完具

【保台實績錄一卷】內府藏本。不著撰人名氏。紀台州兵巡道楊應魁政績。應魁字斗垣。射洪人。以兵部郎出巡台州。適閩逆耿精忠遣兵犯關。圍台州。應魁從貝子富喇塔駐台。拊循兵民。條畫守禦。頗著惠愛。故郡人作此以志其功。自固根本。至修庶政。共分二十目。目各爲一篇云。

【楊公政績記一卷】編修程晉芳家藏本。國朝黃家遴撰。家遴奉天人。官至嘉興府知府。是編述明楊繼宗遺事。繼宗字承芳。陽城人。天順初進士。由刑部主事。歷官雲南巡撫。僉都御史。家遴以繼宗曾任嘉興府知府。號爲循吏。因哀其事蹟。以成此書。末附繼宗本傳一篇。較明史列傳爲詳。然不及載其追諡。亦不知傳出誰手也。豈卽家遴所作歟。

【楊文靖年譜二卷】浙江吳玉璠家藏本。國朝張夏編。夏有雒閩源流錄。已著錄。是編以楊時年譜。舊本詳略失宜。乃參稽史冊語錄文集。訂爲上下二卷。考宋史時本傳。稱時安於州縣。未嘗求聞達。而德望日隆。有爲蔡京謀者。以爲事勢必敗。宜引舊德老成。置諸左右。庶猶可幾及。蔡京然之。乃薦爲祕書郎。此編於七十一歲書宜和五年癸亥四月。有旨召赴都堂審察。以疾辭。其下分註。雖詔及張翥語。而歸其事於高麗王問時安在。副使傅墨卿以聞。故有是召。於七十二歲書六年甲辰十月。召爲祕書丞。分上殿。十二月至京師。入對。其下分註。又以高麗使臣將至。傅墨卿再薦於朝。爲詞。並註曰。是時蔡京已斥。若欲泯蔡氏薦辟之蹟者。然時赴蔡氏之薦。朱子語錄亦深言其失。自非聖人。孰無過舉。原不以是沒其生平也。夏以東林託始之故。曲爲文飾。仍不免門戶之見矣。

【忠武誌八卷】江西巡撫探遺本。國朝張鵬翻撰。鵬翻字運青。遂寧人。康熙庚戌進士。官至大學士。諡

文端是編載漢諸葛亮始末首本傳次年表次世系次心書次新書次遺文次遺制次遺事次用人次勝蹟次爲後人詩文其遺文不收黃陵廟記之類頗有甄別而心書新書確爲僞託乃並載之則仍蕪雜也既收心書新書姑存其舊而十六策仍不載則又疎漏也梁甫吟詞意雖淺然見於歐陽詢藝文類聚其來已久又增一白鳩篇則不知其何來矣

【周忠介公遺事】

無卷數

兩江總督採進本

國朝彭定求撰定求字訪濂長洲人康熙丙辰進士第

一官至翰林院侍講是書述周順昌忤璫被逮本末首載順昌歷官敕誥次載順昌子茂蘭鳴冤請祠諡

二疏末載書傳碑記并茂蘭傳兼附朱祖文及顏佩章等五人傳於後定求皆爲之跋

【別本朱子年譜二卷附錄一卷】

安徽巡撫採進本

國朝黃中撰

是編刻於康熙戊午冠以畫像世系

題名錄別錄附以慶元黨籍呂祖泰書及歷代褒典其別錄惟載朱子言行七條不知其去取之意與編次之例安在又以朱子名字號諡夾註於末益不可解年譜中多附以議論大旨主於頌美無所考證其附錄之序謂程朱之顯晦關宗社之存亡中以李德裕論邪正一條列於真德秀之後張浚之前似不知德裕爲唐人也

【王文成集傳本二卷】

浙江巡撫採進本

國朝毛奇齡撰奇齡有仲氏易已著錄王守仁之關宋儒與

奇齡合又餘姚蕭山爲同郡有鄉黨誼故奇齡特爲守仁作傳上諸史館後佚其半奇齡子遠宗又摭拾足之傳中凡低一格者皆附錄雜事其標附字者則辨論考證之詞也末附門人名籍與襲爵始末夫史傳非講學之書守仁一代偉人亦不必以講學始重奇齡提倡良知嘵嘵不已不免門戶之見其辨諸附

會標榜之事，以爲文成无妄，起於門人及諸記述，則至言也。

【梅里志四卷】江蘇巡撫採進本。國朝吳存禮撰，存禮奉天人，官至江南巡撫，考史記吳世家，張守節

正義稱秦伯居梅里，在常州無錫縣東南，存禮以吳氏出自秦伯，因爲是書以述其祖德。

【朱子年譜六卷】副都御史黃登賢家藏本。國朝朱世潤編，世潤朱子十八世孫，襲翰林院五經博士，

朱子年譜，舊本明戴銑增之爲實紀，李默修之，復稱年譜。國朝又有洪去蕪本，王懋竑本，諸家之中，惟懋竑本最精核，他家皆不免疎舛，是編意主鋪張，不求考核，故未免踵譌襲謬，至於李公晦敘述朱子生平數萬言，見性理大全，洪本有之，新闕本、王本所載，則更多於大全，蓋卽其所作言行錄也。今乃載魏序而不載李書，又朱子五十六歲辨陸學之非，舊譜有之，惟李默本刪去，以默傳金谿之學故也。此從李本，亦似非朱子之意，且以年譜爲名，而年譜僅居第三卷，自第四卷爲行狀外，其餘褒崇題詠之類，乃占前後四卷，末大於本，於體例亦未協也。

【陸象山年譜二卷】江西巡撫採進本。國朝李紱撰，紱字巨來，號穆堂，臨川人，康熙己丑進士，官至內

閣學士兼禮部侍郎，陸九淵年譜爲其門人袁燮、傅子雲同編，寶祐四年，李子愿又重輯之，劉林爲刊版于衡陽，紱病陸氏家祠所刻，凡文與本集重見者，多所刊削，又病其不載陸九齡、陸九韶事蹟，乃重加補輯，定爲此本。大旨申王守仁、朱子晚年定論之說。

【考訂朱子世家一卷】安徽巡撫採進本。國朝江永撰，永有周禮疑義舉要，已著錄，永家婺源，與朱子同里，故取年譜舊本，重加刪訂，各附考證，而終以婺源子孫承襲博士支派，後附天寧寺會講辨一篇，專



論學會錄所載慶元丙辰朱子至新安會講天寧寺事爲明季良知之徒鑿空撰出以厚誣朱子云

【左忠毅年譜二卷】江西巡撫採進本 國朝左宰編宰桐城人左光斗之曾孫也光斗事蹟具載明史本傳乾隆己未宰復網羅散失參以祖父傳聞旁及文集所載與同難諸人所述以補成此譜於當日情事始末較爲詳備

【胡忠烈遺事四卷】江西巡撫採進本 國朝史珥編珥鄱陽人乾隆甲戌進士官吏部主事是編紀建文末大理寺少卿胡閔遺事與後人題詠詩文而閔女郡姐及連坐親屬並載焉珥十一世祖秉方爲閔之壻閔既死節壻家亦連坐故珥述其殉節始末成此書先是紀閔事者有英風紀異史桂芳所刊而楊際會名之者也又有風忠錄瞿鳳翥所刊而文德翼序之者也又有忠義類編史乘古所名其例言則屠叔方所纂者也珥彙合諸書考證頗詳如閔妻汪氏非方氏貞姑傳中所云王安人者乃史氏之婦非閔妻頗有糾謫訂舛之功惟舊錄載萬曆十二年十月八日詔雪革除諸臣張榜於縣門忽風掣其榜入雲中飛舞空中自午至申乃墮故有風烈英風諸名紀其實也而史桂芳所作詩序乃謂閔之風異放而往周流六虛卷而還收攝完聚明明有聖學景象區區以忠臣目之恐不足以慰在天之靈云其說似高而實謬文天祥不云乎孔曰成仁孟曰取義讀聖賢書所學何事其言至爲明白奈何以忠臣爲區區而曰別有聖賢乎

【朱子文公傳道經世言行錄八卷】浙江巡撫採進本 國朝舒敬亭撰敬亭字孝徵銅山人是書取朱子言行彙爲一編前有朱子小像及父師題辭又有自題贊及諸人先後題贊卷一卷二爲年譜行狀卷

三爲道學淵源。其中濂溪事實記。蓋取之文公文集。明道行實。則取之二程文集。卷四爲伊川行狀。及道體。卷五爲學存養克己。卷六教人儆戒。卷七觀聖賢辨異端。卷八治道。皆取之文集近思錄。而以讀書志不自棄文終焉。皆鈔撮習見之文。於朱子之學。不能有所發明也。

【曹江孝女廟志十卷】

浙江汪啓淑家藏本

國朝沈志禮撰。志禮字範先。會稽人。官至廣東按察使。是

編紀孝女曹娥事實。其自序謂有同里印文學君素初編。張明經顯績纂。俱未成。志禮乃因舊志重輯。孝女事在漢順帝漢安二年。見於邯鄲淳所撰碑。今法帖所傳本。與此志互有同異。可以相證。後二卷附志宋英宗時孝女朱娥。與明初孝女諸娥事。二女亦皆以身救其親。又皆與曹娥同里。故以配食於廟。并錄其傳志歌詠之文於後焉。

右傳記類名人之屬。一百五部。四百九十四卷。內三部無卷數。皆附存目。

### 卷六十一

#### 史部十七

##### 傳記類存目三

【漢末英雄記一卷】

江蘇巡撫採進本

舊本題魏王粲撰。粲字仲宣。高平人。仕魏爲丞相掾。賜爵關內

侯。事蹟具三國志本傳。案粲卒於建安中。其時黃星雖兆。玉步未更。不應名書以漢末。似後人之所追題。然考粲從軍詩中。已稱曹操爲聖君。則儼以魏爲新朝。此名不足怪矣。隋志著錄作八卷。注云殘闕。其本

久佚。此本乃王世貞雜鈔諸書成之。凡四十四人。大抵取於裴松之三國志註爲多。如水經注載白狼山曹操敲馬鞍作十片事。本習見之書。乃漏而不載。又如築易京本公孫瓚事。乃於瓚外別出一張瓚。以此事屬之。不知據何誤本。尤疎舛之甚矣。

【廣卓異記二十卷】浙江鮑士恭家藏本

宋樂史撰。史字正子。宜黃人。官太常博士。直史館。事蹟附載

宋史樂黃中傳。是編前有自序。稱唐李翱卓異記三卷。案卓異記非李翱作。史蓋考之未詳。謹附訂於此。述唐代君臣卓絕盛事。中多漏錄。史初爲續記三卷。以補其闕。後復以僅載唐代。未爲廣博。因纂集漢魏以下迄五代竝唐事。共爲一帙。名廣卓異記。分爲二十卷。首卷記帝王。次卷記后妃。王子公主。三卷雜錄。四卷至十七卷。皆記臣下貴盛之極。與顯達之速者。十八卷雜錄。十九卷舉選。二十卷專記神仙之事。大抵牽引駁雜。譌謬亦多。如所稱晉書王導以下至王褒九世。皆自有史傳。中有儉子仲寶。仲寶子規。云云。案史仲寶乃王儉字。非其子名也。儉之子名寯。寯之子名規。非仲寶子名規也。且規子褒。附見規傳。亦非自有傳。諸傳雜見於宋齊梁書及南史。亦非全在晉書。舛謬殊甚。又石勒每更聞鼓鼙聲。武士獲聞空中言。唐公爲天子。與夢高祖乘白馬上天之類。神怪無稽。頗爲蕪雜。至引錄傳稱周時尹氏貴盛。會食。家數千人。遭饑荒。糶粟作糜。吮之。吮糜之聲。聞於數十里。亦不近事理之談。其末卷則於自撰總仙記中。撮其殊異者入此書。所言不出全家登仙。祖孫兄弟登仙。及三世四世五世登仙。四人六人七人登仙之類。重複支離。尤不足信。自序稱採自漢魏而下。而編中乃及楚孫叔敖。周尹氏。末卷所列神仙。并及堯舜之時。與序自相矛盾。又其小失矣。

【靖康小雅一卷】江蘇巡撫探進本。不著撰人名氏。錄靖康死事之臣。傳察種師中。王稟。劉翊。種師道。何慶。查黃。經臣。劉幹。李若水。徐揆。孫傳。張叔夜。凡十二人。宗澤。張慤。扼於黃潛。善汪伯彥而死者。亦附焉。澤傳中稱潛善卒不遇死。而令公卒。則此書作於汪黃秉政之日矣。傳末各系以四言詩。故以小雅爲名。其文散見北盟會編中。此本次序。似以徐夢莘所載鈔合之。非完書也。

【紹興正論一卷】江蘇巡撫探進本。

舊本題湘山樵夫撰。不著名氏。敍列張浚。趙鼎。胡銓。胡寅。連南夫。

張戒。常同。呂本中。張致遠。魏矼。張絢。曾開。李彌遜。晏敦夫。王庶。毛叔度。范如圭。汪應辰。許忻。方廷寶。韓訓。陳鼎。許時。行李光。洪皓。沈正。卿張。彥陳。康伯。陳括。陳剛中。三十人。皆以不附和議而貶謫者。每人之下。略具事實。少者一二語。多亦不過三四行。案書錄解題。載紹興正論二卷。註曰。序稱瀟湘野人。不著名氏。錄文武官不附和議。及忤秦檜得罪者。又載紹興正論小傳二十卷。則樓昉以正論中姓名。仿元祐黨傳爲之。所謂二卷者。似卽此書。而書名及撰人之號。皆大同小異。卷數亦不相符。其故則莫得而詳矣。

【桐陰舊話一卷】編修程賢芳家藏本。

宋韓元吉撰。元吉字无咎。宰相維之元孫。以任子仕。歷龍圖閣。

學士。吏部尚書。嘗居廣信溪南。自號南澗居士。此書宋志云十卷。陳振孫書錄解題亦同。續百川學海所錄。乃祇此一卷。其條數亦與此本同。蓋全書久佚。從諸書鈔撮成編也。書中所記韓億。韓綜。韓絳。韓繹。韓維。韓績。雜事。共存十三條。皆其家世舊聞。以京師第門有桐木。故云桐陰舊話。蓋北宋兩韓氏並盛。世以桐木韓家。別於魏國韓琦云。

【南渡十將傳十卷】兩淮鹽政探進本。

宋章穎撰。十將者。劉錡。岳飛。李顯忠。魏勝。韓世忠。張俊。虞允文。

張子蓋張宗顏吳玠也。劉岳李魏四傳。開禧二年表上。後六傳未上。核以宋史本傳。此所探摭。未爲詳核。且抑世忠於勝顯忠後。似亦未妥。子蓋宗顏戰功寥寥。允文亦僥倖不敗。乃與諸人並數。皆未免不倫也。

【稗傳一卷】浙江巡撫採進本。元徐顯撰。顯仕履無可考。觀其稱王良爲鄉里。又稱居平江東城。則當爲紹興人。而寓於姑蘇者也。是編紀元末王良柯九思陳謙葛乾孫潘純陸友王冕王漸楊椿王德元徐文中事。後載沈烈婦等十三人。敘述頗爲詳備。中多及丙申二月平江城陷事。指張士誠軍爲外兵。而載己亥紹興被兵事。於明人則直斥爲寇。疑作此書時。張氏尙存。故其詞如此。其敘柯九思之卒。在至正癸亥。案至正紀年無癸亥。而九思之卒。實在乙巳。蓋此書傳寫誤也。

【萬柳溪邊舊話一卷】浙江鮑士恭家藏本。元尤玘撰。玘字君玉。號知非子。自稱尤袤之後。不知其世次。舊本題爲宋人。今此書後跋稱玘爲大司徒。則嘗官戶部尙書。又末條稱終慕公不冝仕元。則當爲元人。而卷首題門人張雨填諱。則又句曲外史之師。應在元中葉以後也。書中所記。皆尤氏先世事。末有玘曾孫實跋。稱宏治二十九年。於祠屋中求得舊本。簡斷墨闕。不可讀者逾半。命門人許靈鈔其完者。而恨全帙之不可得。是此書已非完本矣。元陳世隆載入藝圃搜奇。所載之文。與此本竝同。斷無明人所鈔壞爛之本。適與元人所見。一字不異者。此亦足證藝圃搜奇。必非元人書也。

【旌義編二卷】浙江巡撫採進本。元鄭濤撰。濤字仲舒。浦江人。官太常禮儀院博士。鄭氏稱義門。自宋

建炎初名綺者始。至濤爲八世。先是綺六世孫龍灣稅課提領太和。爲家規五十八則。七世孫欽。及其弟鉉。增添九十二則。共一百五十則。勒之於石。至濤復謂禮有當隨時變通者。乃酌加增損爲一百六十八

則列爲上卷。又彙輯諸家傳記碑銘之文。有關鄭氏事實者。列爲下卷。通名曰旌義編。宋濂序稱三卷。其書實止二卷。蓋序文傳寫之誤也。

【忠傳四卷】永樂大典本。不著撰人名氏。載於永樂大典中。題云國朝忠傳。則明初人所作也。其書集古今事蹟。各繪圖繫說。語皆鄙俚。似委巷演義之流。殆亦明太祖時官書歟。

【草莽私乘一卷】浙江鮑士恭家藏本。舊本題明陶宗儀編。宗儀有國風尊經。已著錄。是書凡錄胡長

孺王惲許有壬虞集劉因李孝光金炯楊維禎林清源龔開周仔肩揭傒斯貢師泰汪澤民十四人雜文二十首。皆紀當時忠孝節義之作。王世貞集有此書跋。語云係宗儀手鈔。然孫作滄螺集。載有宗儀小傳。紀所作書目。有說鄂一百卷。書史會要九卷。四書備遺二卷。輟耕錄三十卷。無此書名。疑好事者依託也。

【宋遺民錄一卷】內府藏本。不著撰人名氏。乃洪武中鈔本。毛晉刻之。附於忠義集之後。或元人所作。或明初人所作。均未可知。後程敏政亦有宋遺民錄。殆未見此本。故其名相複歟。

【金華賢達傳十二卷】浙江范懋柱家天一閣藏本。明鄭柏撰。柏字叔端。浦江人。宋濂之門人也是。書輯金華一郡人物。各爲小傳。系之以贊。凡三百六十餘人。分忠義孝友政事儒學卓行五門。亦宋濂浦陽人物記之類。然如樓照迎合和議。曹冠爲棗棹門客。乃竝取之。殊不免鄉曲之私。第十一卷內。又有柏傳一篇。附鄭楷之後。柏無自作傳之理。或其家子孫所增入歟。

【四明文獻錄一卷】浙江范懋柱家天一閣藏本。明黃潤玉撰。潤玉字孟清。鄞縣人。永樂庚子舉人。官至廣西提學僉事。事蹟具明史本傳。是編成於成化丙戌。以四明文獻分爲二類。一曰鄉先生。自漢夏里

黃公以下三十五人，皆四明產也。一曰鄉大夫，自周文種以下九人，皆官於四明者也。八各有傳，并系以贊。據卷末其孫溥跋，蓋原本尚有諸人小像，後莫息重刊，以非真本，削除之。跋又稱是書未出以前，有偽本託潤玉之名以行，潤玉知而燬之，其本前無序後無贊云。

【孝紀十六卷】江蘇巡撫探進本。明蔡保禎撰。保禎字瑞卿，漳浦人。是書以孝行事實區爲十六類。一

曰帝王，二曰聖門，三曰純孝，四曰世孝，五曰祿養，六曰苦行，七曰神助，八曰通神，九曰尋親，十曰格暴，十一曰復仇，十二曰死孝，十三曰永慕，十四曰瑞應，十五曰童孝，十六曰女孝。

【潤州先賢錄六卷】浙江江寧家藏本。明姚堂撰。堂字彥容，慈谿人。正統己未進士，官至鎮江府知

府。是編成於天順癸未，錄鎮江先賢自周迄宋，分高風忠節相業直諫德望文學六門，列其人之事實，并後人所爲記讚詩文，間及其人之著述，所載僅二十人，不及京口耆舊傳十之一也。

【忠義錄十四卷】浙江范懋柱家天一閣藏本。明王翼撰。翼字時禎，金谿人。景泰辛未進士，官至浙江

按察使。是書取史傳忠義之事，分類編輯，以伯夷以下五百九十七人爲上，張良以下五百七人次之，各節錄事實，有祠墓可考者，並詳其地。孟達等八十七人，或失節於前，或死不足贖，解文卿以下十人，或非其主，或言非其時，皆不以忠義與之，持論頗正。其王堯以下一百四人，始終一姓，忠義皎然，乃以其爲遼金元之臣，私意區分，曲相排抑，則悖謬甚矣。又自謂此書旁搜諸子百家，庶幾全備，而唐宋間如成三郎、蘇安恆、韓通、張旦輩，俱未及載，則亦未能無所遺漏也。

【名相贊一卷】浙江范懋柱家天一閣藏本。明尹直撰。直字正言，秦和人。景泰甲戌進士，官至華蓋殿

大學士諡文和事蹟具明史本傳。是書取漢唐宋相業足稱者。始蕭何。終文天祥。凡八十七人。採摭事實。各爲之贊。

【南宋名臣言行錄十六卷】浙江范懋柱家天一閣藏本。明尹直撰。此書續朱子名臣言行錄而作。前有宏治癸亥自序。云取宋史列傳。自陳俊卿以下。芟繁節冗。撮探其要。得百二十有三人。然朱子所作名臣言行錄。原以網羅舊聞。蒐載軼事。用備史氏之採擇。若徒鈔錄史文。一無考證。則宋史列傳具在。亦何必徒煩筆墨乎。

【伊洛淵源續錄六卷】浙江巡撫採進本。明謝鐸撰。鐸有赤城論諫錄。已著錄。是書所錄凡二十一人。蓋繼朱子伊洛淵源錄而作。以朱子爲宗主。始於羅從彥李侗。朱子之學所自來也。佐以張栻呂祖謙。朱子友也。自黃榦而下。終於何基王柏。皆傳朱子之學者也。然所載張栻等七人。則全錄宋史道學傳。呂祖謙等七人。則全錄宋史儒林傳。李侗等六人。略採行狀誌銘遺事。其輔廣一人。則但載姓名里居。僅數十字而止。尤爲疎略。案廣卽世所稱慶源輔氏。明一統志載其始末甚詳。鐸偶未考耳。明史鐸本傳載其爲南京國子監祭酒時。上言六事。其三曰正祀典。乃請進宋儒楊時而退吳澄。爲禮部尙書傅瀚所持。僅進時而澄祀如故。夫澄之學雖曰未醇。然較受蔡京之薦者。則有間矣。鐸欲以易澄。蓋以道南一脈之故。而曲諱其出處也。然則是錄之作。其亦不出門戶之見矣。

【宋遺民錄十五卷】副都御史黃登賢家藏本。明程敏政撰。敏政字克勤。休寧人。成化丙戌進士。官至禮部右侍郎。事蹟具明史文苑傳。此書前列王炎午謝翱唐珏三人事蹟。及其遺文。而後人詩文之爲三



人作者。竝類列焉。七卷以後。則附錄張宏毅。方鳳。吳思齊。龔開。汪元量。梁棟。鄭思肖。林德暘等八人。第十五卷紀元順帝爲宋瀛國公子。引余應詩。袁忠徹記。以實之。至謂虞集私侍文宗之妃。說殊妄誕。所引亦自相矛盾。蓋文宗時嘗下詔書。稱順帝非明宗之子。斥居靜江。好事者因這爲此言。其荒唐本不待辨。敏政乃從而信之。乖謬甚矣。

【尊鄉錄節要四卷】浙江汪啓淑家藏本。明王弼撰。弼黃巖人。成化乙未進士。官至興化府知府。初謝鐸嘗著尊鄉錄四十一卷。載其鄉先達事實。弼復以己意。節其大略。取十大儒。五大臣。六忠臣。十五孝子。各爲之贊。卷末附拾遺二十事。事各爲詩。

【考亭淵源錄二十四卷】浙江吳玉瑛家藏本。明宋端儀撰。薛應旂重修。端儀字孔時。莆田人。成化辛丑進士。官至廣東提學僉事。事蹟具明史本傳。應旂有四書人物考。已著錄。此編仿伊洛淵源錄之例。首列延平李侗。籍溪胡憲。屏山劉子翬。白水劉勉之四人。以溯師承之所。其次載朱子始末。次及同時友人。至南軒張栻以下七人。次則備列考亭門人。自勉齋黃榦以下二百九十三人。其二十三卷。則門人之無記述文字者。但列其名。凡八十八人。末卷則考亭叛徒。趙師雍。傅伯壽。胡絃等三人。亦用伊洛淵源錄載邢恕例也。史稱端儀慷慨。建文朝忠臣。湮沒。乃搜輯遺書。爲革除錄。建文忠臣之有錄。自端儀始。然其書今未見。卽此書原本亦未見。世所行者。惟應旂重修之本。應旂作宋元通鑑。於道學宗派。多所紀錄。此書蓋猶是意。然應旂初學於王守仁。講陸氏之學。晚乃研窮洛閩之旨。兼取朱子。故其書目錄後有云。兩先生實所以相成。非所以相反。遂以陸九淵兄弟三人。列考亭淵源錄中。名實未免乖舛也。

【鹿城書院集】 卷數 浙江巡撫探遺本

明鄧淮撰。淮吉水人。成化辛丑進士。宏治中官温州府知

府。以南宋時温州之士遊二程張朱之門者有周行己等二十三人。乃命永嘉知縣汪循。卽鹿城建書院。祀二程張朱。而以行己等侑焉。復輯諸人誌銘家傳及其遺事緒論。見於志書語錄中者。彙爲此編。雖亦講學家標榜之書。然永嘉學派頗異新安。淮不分門戶於其間。則視黨同伐異者。其公私相去遠矣。

【吳中往哲記一卷續吳中往哲記一卷續吳中往哲記補遺一卷】 浙江汪啓淑家藏本 吳中往哲記

明楊循吉撰。續記補遺皆黃魯曾撰。循吉有蘇州府纂修志略。已著錄。魯曾字得之。吳縣人。正德丙子舉人。循吉書見明史藝文志。卷數與此相符。記明初蘇州府人物。自勳德至冠衲。分七目。凡四十一人。續記自忠節至散逸。分十七目。凡四十人。補遺自審進至釋行。分十九目。凡三十一人。其補遺原目本一卷。此本分作二卷。又改其釋行第十七爲第一。則刊刻者之誤也。書中所列小傳。皆寥寥數言。未見端末。又如徐有貞以險伎敗。而循吉稱爲四海物望。蓋未免鄉曲之私。吳寬位終禮部尙書。而魯曾乃題作東閣大學士。尤顯然譌謬。則亦不足徵信矣。

【吳中故實記一卷續記一卷補遺一卷】 浙江巡撫探遺本 舊本題明楊循吉撰。檢勘其文。卽循吉吳

中往哲記。黃魯曾往哲續記補遺原本。惟於標題中刊去往哲二字。易以故實二字。蓋書賈割舊版。改易新名以售欺者也。

【掾曹名臣錄一卷續集一卷】 浙江范懋柱家天一閣藏本 明王瓊撰。瓊有晉溪奏議。已著錄。是編乃

瓊官南京戶部侍郎時。見諸史中有知琴審可教誨者。因採錄明興以來。由掾曹而列名臣者。編爲此書。

以示勸勉。凡劉敏等九人。又續集一卷。凡劉本等四人。前有正德甲戌瓊自序。後有南京戶部郎中卞師敏跋。

【蘇材小纂六卷】戶部尚書王際華家藏本

明祝允明撰。允明字希哲。長洲人。宏治壬子舉人。官至應

天府通判。明史文苑傳附見徐禎卿傳中。是書記天順以後蘇州人物。前有自序。稱宏治改元。詔中外諸司撰集事蹟。上史館爲實錄。簡允明等數弟子員司其事。因私纂紀爲此書。第一曰簪纓。纂徐有貞以下十九人。第二曰邱壑。纂杜瓊以下五人。第三曰孝德。纂朱灝一人。第四曰女憲。纂王妙鳳以下三人。第五曰方術。纂張豫等二人。大約本之碑誌行狀。而稍爲考據異同。註於本文之下。其敘徐有貞事。頗有諱飾。蓋允明爲有貞外孫。親串之私。不能無所假借云。

【莆陽文獻十三卷列傳七十五卷】福建巡撫探道本

明鄭岳編。黃起龍重訂。岳字汝華。宏治癸丑進

士官至兵部左侍郎。事蹟具明史本傳。起龍萬歷戊戌進士。竝莆田人。是書取莆田仙遊二縣。自梁陳迄明著作詩文。輯爲十三卷。又取名人事蹟。成列傳七十四卷。文以體分。傳則不分門目。後倭變書燬。起龍爲之重鐫。并附柯維騏所作岳傳一首。爲卷第七十五。岳書探摭繁富。義例頗仿史裁。然起龍譏其文內不載楊琅林誠兩御史之奏疏。及黃仲元之郭孝子祠記墓表。傳內載仕梁之徐寅翁承贊。及永樂初梯榮獻策之林環。而於林光朝傳。但紀其文集。而不及所著之易解尙書解語錄說詩等書。去留不無遺憾。則固確論也。

【東嘉先哲錄二十卷】浙江越士藝家藏本

明王朝佐撰。朝佐字廷望。浙江平陽人。宏治丙辰進士。官

南京工部員外郎。是編刻於正德初。蒐輯温州先賢事實。分類凡八。曰先達。曰程子門人。曰朱子門人。曰名儒。曰名臣。曰孝子。曰氣節。曰詞章。晉唐以來。紀載無考。故所錄託始於宋焉。

【國寶新編一卷】浙江巡撫探進本

明顧璘撰。璘字華玉。吳縣人。宏治丙辰進士。官至刑部尚書。事蹟

具明史文苑傳。是書凡錄李夢陽、何景明、祝允明、徐禎卿、朱應登、趙鶴、鄭善夫、都穆、景暘、王韋、唐寅、孫一元、王寵十三人。人爲之傳。傳爲之贊。蓋感於知交凋謝而作。略綴數語。以存其人。亦柳宗元先友記類也。

【春秋列傳五卷】副都御史黃登賢家藏本

明劉節撰。節字介夫。號梅國。大庾人。宏治乙丑進士。官至

刑部侍郎。是編取春秋內外傳所載列國諸臣。類次行事。各爲之傳。始祭公謀父。終蔡朝吳。凡二百有二人。全本舊文。無所考證。鄒縣潘榛爲之訓釋。亦頗疎略。

【備遺錄一卷】浙江范憲柱家天一閣藏本

明張芹撰。芹新淦人。明史作峽江人。蓋新淦其試籍也。宏

治壬戌進士。官至浙江右布政使。事蹟具明史本傳。是書紀建文殉節諸臣姓名。前有自序。題正德丙子五月。目列四十六人。卷中有事實者二十人。無事實者二十六人。案林塾拾遺書云。近見南院御史張芹增入江右數人。共五十四人。塾所見題正德乙亥。正此錄前一年。而此錄乃轉止於四十六人。又學海類編有張芹建文忠節錄一卷。其序與此同。亦正德丙子所撰。而目次乃與此不同。且有七十人之多。明藝文志既有張芹建文備遺錄二卷。又有張芹備遺錄一卷。考芹序稱錄中四十六人名氏。皆閩中宋君端儀嘗採輯爲錄而未成者。疑芹初據宋氏原本而作。後又隨時續有增益。原非一本。傳錄者各據所見。遂兩存之耳。

【拾遺書一卷】浙江范懋柱家天一閣藏本 明林塾撰。塾莆田人。宏治壬戌進士。官至浙江布政司參議。此書載建文諸臣事蹟。文甚簡略。前有正德乙亥自識云。考前史失記者。凡五十四人。故以拾遺名其書。然所載與諸書略同。其齊泰以下三十人。事實俱闕。亦未能考補也。

【台學源流七卷】浙江巡撫探進本 明金賁亨撰。賁亨字汝白。臨海人。初冒高姓。正德甲戌進士。題名碑之高賁亨。卽其人也。官至江西提學副使。是書敘述台州先儒。自宋徐中行迄明方孝孺。陳選。凡三十八人。各爲之傳。其疑而莫考者。又有十五人。各以時代類附姓名於傳末。其傳雖多採晦菴文集。伊洛淵源錄諸書。然賁亨當明中葉。正心學盛行之時。故其說調停於朱陸之間。謂朱子後來頗悔向來太涉支離。又謂朱子與象山。先異後同云云。皆姚江晚年定論之說也。

【新安學系錄十六卷】安徽巡撫探進本 明程曠撰。曠號峨山。休寧人。是書以朱子爲新安人。而引據歐陽修冀國公神道碑。謂程子遠派亦出新安。故輯新安諸儒出於二家之傳者。編爲此書。自宋至明。凡百有一人。皆徵引舊文。以示有據。夫聖賢之學。天下所公也。必限以方隅。拘以宗派。是門戶之私矣。至程子一生。無一字及新安。而遙遙華胄。忽爾見援。以例推之。則朱出於邾。姓源可證。今嶧山之士。不又引朱子爲鄉黨乎。此真爲夸飾風土而作。不爲闡明學脈而作也。江南通志列曠於儒林傳中。稱所著新安學系。與朱子合者存。背者去。足盡是書之大旨矣。

【二科志一卷】江蘇巡撫探進本 明閔秀卿撰。秀卿蘇州人。始末未詳。是書分文學。狂簡爲二科。所載自楊循吉以下凡七人。皆偶錄一二事。不爲全傳。蓋一時互相標榜之書。其紀徐禎卿方登賢書於文徵

仲尙稱文壁。而以徵明字之。則猶宏治中所作也。

【明璫彰胤錄一卷】兩淮鹽政採運本。明顧爾邁撰。爾邁淮安人。始末未詳。是書採撮實錄憲章錄中官考諸書。而各加論斷。所記止成化中汪直擅政之事。似非完本。抑或於世近者有所諱歟。

【革朝遺忠錄二卷】浙江范懋柱家天一閣藏本。明郁袞撰。袞嘉興人。其書撰述年月無可考。黃佐革

除遺事已稱因郁袞原本。則當在正德以前矣。所列一百六十傳。皆明惠帝時死難諸臣。而附錄一卷。則降燕諸臣。如胡廣黃福之類。後至大官者亦在焉。每傳後或附以贊語。又間有所附註。然其精要已皆採入革除遺事中矣。

【別本革朝遺忠錄二卷】兩江總督採運本。不著撰人名氏。惟題青州府知府杜思子睿重刻。思卽撰

考信編者也。黃虞稷千頃堂書目於郁袞革除遺忠錄二卷外。又別出杜思革朝遺忠錄二卷。蓋卽指此本。然以郁袞本校之。則此錄實郁袞書。惟袞於各傳後附以贊語。而此本有傳無贊。爲少變其例。又書首冠以張芹備遺錄。黃佐革除遺事。敖英備遺續錄序三篇。皆與書不相應。世別有高麗刊本。卷首亦有三序。與此正同。蓋明代刊書者。往往竄亂舊本。而沒所由來。諸版競出。混淆彌甚。其風熾於萬歷以後。今觀此本。則嘉靖中已有之矣。案思登嘉靖丙辰進士。

【羣忠錄二卷】浙江汪啓淑家藏本。明唐龍撰。龍有易經大旨已著錄。是編紀明太祖征陳友諒時諸臣姓名行實。凡祀於餘干縣康郎山廟者。有丁普郎等三十五人。祀於南昌府廟者。有趙得勝等十四人。又附載孫燧等五人。皆殉宸濠之難。後賜祀於旌忠祠者。其題旌各疏。并祭謁詩文。亦附於後焉。

【崑山人物志十卷】浙江巡撫探進本。明方鵬撰。鵬字子鳳，亦字時舉。崑山人。正德戊辰進士官至太常寺卿。是書論次崑山先哲，首名賢六人，次節行二十八人，次文學三十七人，次列女三十人，次藝能三十一人，次遊寓二十六人，而以雜志終焉。共爲十卷。明史藝文志作八卷，傳寫誤也。

【名臣言行錄前集十二卷後集十一卷】浙江范懋柱家天一閣藏本。明徐咸撰。咸海鹽人。正德辛未進士官至襄陽知府。先是豐城楊廉本彭韶名臣錄贊，撰名臣言行錄四卷，所載凡五十五人。咸亦纂近代諸臣言行錄，凡四十八人。餘姚魏有本官河南巡撫時嘗合刻之。及咸歸里之後，病其未備，重爲纂輯。於楊錄增十六人，於己所錄者亦增二十五人，分爲前後二集，自爲序記其始末，而仍以魏有本初刻之序弁於書首云。

【毗陵忠義祠錄四卷附錄一卷】江蘇巡撫探進本。明葉夔撰。夔字司韶，武進人。成化中以歲貢生官汝陽州訓導。是編第三卷中載夔請祀典書，稱宋德祐元年十一月，巴顏率師攻常州，屠其城。知府事姚嵩、通判陳炤俱不屈死。其先後殉難者又有王安節、劉師勇、胡應炎、尹玉麻、士龍、包圭、阮應得、方允武、徐道明、莫謙之、僧萬安諸人。自成化九年郡庠生段瑜等建言於同知柳某，始立崇炤以下木主十一位。附於陳司徒廟，而文天祥、劉師勇、阮應得、僧萬安猶未與也。宏治十年，知府曾望宏乃別創忠義祠，請竝祀文天祥以下十四人，而附以元壬辰靖難之劉溶。巡按御史謝琛亦上書請著於祀典。詔從之。夔因編其始末爲此書。首圖考，次傳志，次詩，次贊，次文牒。凡史傳所未載者，此皆補其佚闕。足相參證。惟此書載宋臣與祀者止十四人，則未祀文天祥等四人，其附於陳司徒廟者，止當有十主耳。夔請祀典書云十一主。

未喻其故。又考宋季三朝政要。載元兵至常州。守臣王宗洙逃。權守王良臣以城降。今是書姚崑傳中謂良臣屢舉不第。流落無藉。寓常。與錢開謀竊符印。詐稱郡官。詣巴顏軍前獻之。然則良臣未嘗權守三朝政要誤書矣。是亦足訂史之譌也。此書作於正德初年。末附錄一卷。載國朝順治十四年事。蓋後人所續。其姓名則不可考矣。

【毘陵人品記四卷】浙江范憲柱家天一閣藏本。明葉夔撰。其子金及同邑毛憲績成之。憲有諫垣奏草。已著錄。金字誠齋。刻是書時。官紹興府通判。其終於何官。則未詳也。是書前有自記。稱常州古毘陵地。記人品冠以古名者。古可以統今。今常州之名。隋唐以前未有也。然隋唐以前無常州。不可繫以常州。隋唐以後無毘陵。獨可繫以毘陵乎。至其先列五縣沿革於前。使歷代殊名。瞭如指掌。則提綱挈領。固體例之最善者也。其書敘述頗簡核。然皆史傳所已載。末附夔憲二小傳。則嘉靖壬寅刻是書時。餘姚岑原道所補。見原道所作序中。

【毘陵正學編一卷】浙江總督採進本。明毛憲撰。是編所載凡十二人。首楊時。次鄒浩。周孚。先周恭先。唐彥思。鄒柄。喻樛。胡瑛。无表。李祥。蔣重祥。謝應芳。自浩以下。或籍晉陵。或籍宜興。或籍無錫。或籍武進。獨時爲劍州將樂人。於毘陵爲流寓。蓋以道南一脈。假借之以爲重云。

【名臣像圖一卷】浙江鄞大節家藏本。明吳守大撰。守大字有君。崑山人。是書成於正德丙子。錄徐達以下至楊繼宗。凡四十九人。人繪一圖。圖後各敘仕履。系之以贊。其書刻於廣西。紙版拙惡。四十九人面貌相同。惟以題名別識。殆如兒戲。



【畜德錄一卷】浙江范懋柱家天一閣藏本。明陳沂撰。沂有維楨錄。已著錄。此書皆紀宣德正統間名臣言行。人各一二條。末有嘉靖壬辰自跋。稱以所聞於外祖金靜虛太常夏崇文及吳文定李文正者。著之於篇。雖有不倫。而取善之道。不以人廢云云。考所載如于謙魏驥徐晞王鞠姚夔岳正韓雍周忱劉大夏屠壻章懋儲懋何瑋朱希周等。皆一時名人。他如蹇義解縉夏原吉楊榮金幼孜。身事兩朝。已爲其次。至王越以權術用事。益爲物論所不滿。所云不倫者。殆卽指數人而言歟。趙汝愚編名臣奏議。丁謂秦檜。竝以章疏見收。朱子編名臣言行錄。王安石呂惠卿。亦得以姓名同列。蓋定千秋之品。則隻字不可誣。取一節之長。則片善亦可錄。竝瑕瑜不掩。具有前規。然奏議爲論事之文。苟所論關國計之得失。繫民生之利病。言之當理。行之有裨。自未可以出自僉壬。遂削不錄。至於採前言往行。矜式後人。自當仰溯名賢。用垂規矩。固未可委曲遷就。使有所濫廁於其間矣。

【廣州人物傳二十四卷】浙江范懋柱家天一閣藏本。明黃佐撰。佐有秦泉鄉禮。已著錄。是書採自漢迄明廣州人物之散見諸書者。以類區分。各爲之傳。共一百五十餘人。

【建寧人物傳四卷】浙江巡撫採進本。明李默撰。默字時言。甌寧人。正德辛巳進士。官至吏部尚書。兼翰林學士。爲趙文華誣陷。下詔獄。瘐死。萬曆中。追諡文愍。事蹟具明史本傳。是書專記建寧人物。起唐建中。迄明景泰。凡四百七十七人。以諸邑分載。而一邑之中。又以時代爲先後。每條之下。各註所引原書。自唐書南唐書五代史宋史而外。大抵皆本之舊志。未爲信史。疎略之處尤多。如謂吳棫爲處士。而述所著書。惟及韻補。則舛漏可知矣。

【紀善錄一卷】浙江范應柱家天一閣藏本。明杜瓊撰。瓊字用嘉，吳縣人。以孝聞。知府況鍾兩薦之，固辭不出。自號鹿冠老人。是書皆載吳中循吏先賢，其列女有操行可紀者，亦竝見焉。自洪武迄正統，凡四十人，蓋隨所見聞錄之，故多節取一事，不爲全傳，亦表微闡幽之意也。

【三家世典一卷】左都御史張若淮家藏本。明郭勛撰。勛營國威襄公郭英六世孫，襲封武定侯。正德中奉命鎮兩廣，因輯中山王徐達、黔寧王沐英及其家世系履貫勳閱遭遇本末爲此書。大抵本實錄國史於事蹟無所增益，考英在諸功臣中猶居其次，以配二王，似乎尙非其倫。自明以來亦無徐沐郭三家竝稱之說也。

【淮郡文獻志二十六卷補遺一卷】兩淮馬裕家藏本。明潘墳撰。墳字伯和，山陽人。正德戊辰進士，官至右副都御史，巡撫河南，事蹟具明史本傳。是書前有自序，謂自春秋以來至明正德，上下數千年，德業文章會於一書，今考其書，摛摭陳編，未見決擇，其最謬者，至收入宋龔開所作宋江等三十六人之贊，此何關於文獻耶。

【祥符鄉賢傳八卷】兩淮鹽政探進本。明李濂撰。濂字川父，祥符人。正德甲戌進士，官至山西按察司僉事，事蹟具明史文苑傳。是編以祥符縣志所載人物，僅有名氏而行實未詳，乃一一稽考，自明初至於嘉靖，得二十九人，撰其事蹟，附以論贊，又安然馬昂、張泰三人，自祥符移籍他方者，竝附列焉。從唐書所載士大夫遷徙四方者，俱標其舊貫之例也。

【祥符文獻志十七卷】兩淮鹽政探進本。明李濂撰。濂於嘉靖壬寅嘗輯祥符鄉賢傳，其後二年甲辰

又推廣前所載及其人之履歷梗概略存者輯爲此書每人每條之下皆註出某碑某傳某集蓋做名臣言行錄之例每傳之後或偶附錄詩文則濂之變例也所錄皆明一代之人而至於盈十七卷時彌近則易詳亦時太近則易濫固志乘之通病耳

【金華先民傳十卷】浙江巡撫採進本

明應廷育撰廷育字仁卿永康人嘉靖癸未進士官至按察司

僉事是書取金華歷代人物自漢迄明各爲之傳分道學名儒名臣忠義孝友政事文學武功隱逸雜傳爲十類自正史外竝參以諸家文集及家狀碑記於每傳之下各註明用某書蓋仿金履祥通鑑前編之例所據舊籍共四十餘種而其大概則本諸敬鄉錄賢達傳金華府志三書云

【國琛集二卷】浙江汪啓淑家藏本

明唐樞撰樞有易修墨守已著錄是書紀明初以來迄於嘉靖人

物大旨以聖人君子善人有恆分爲四科不以時次不以類從錯出雜陳上自宰輔下至隸卒人各一小傳寥寥數語殊不詳備傳後閒附以論斷然亦不定其孰爲聖人君子孰爲善人有恆體例尤不分明其曰國琛集者蓋取國家以人爲寶之意前有王畿序并樞自序樞學宗良知故於王守仁推崇甚至云

【閩學源流十六卷】兩淮馬啓家藏本

明楊應詔撰應詔建安人嘉靖辛卯舉人是書歷載楊時以後

諸儒終於蔡清各誌其言行詳其傳授凡百九十五人

【道南源委錄十二卷】浙江巡撫採進本

明朱衡撰衡字士南萬安人嘉靖壬辰進士官至工部尙書

兼副都御史總理河漕事蹟具明史本傳此書乃其視學閩中時錄道南源委以示諸生託始於楊時附以游酢王頴凡閩士之沿波而起者則載焉明代惟錄陳真晟周瑛黃仲昭蔡清四人蓋時代既近其餘

【東吳名賢記二卷】江蘇巡撫採進本 明周復俊撰。復俊字子顯，崑山人。嘉靖壬辰進士，官至南京太僕寺卿。是編記吳中名賢，自商相巫咸至明太常寺卿魏校，凡四十七人，各爲之傳贊。附傳者又十人，前有自序，歷舉所載諸賢而議論之。蓋略仿華陽國志之體，然所紀簡略，未足以資考證也。

【列卿紀一百六十五卷】浙江巡撫採進本 明雷禮撰。禮有六朝索隱，已著錄。是書臚列明代職官姓名，起自洪武初，終於嘉靖四十五年。凡內而內閣部院，以至府司寺監長官，外而總督巡撫，皆以拜罷年月爲次，上標人名，而各著其出身籍貫於下，爲年表。又於年表之後，附載其居官事蹟，爲行實年表。但其次題名不用旁行斜上之例，行實略仿各史列傳，而又不詳其始末，止書其事之大者而已。惟第八卷至十三卷，爲內閣行實，頗爲詳備，論斷亦多持公道。如謂解縉等盡忠納誨，而責其不能死建文之難，謂陳山存心險刻，臨事乖方，明史頗採之。獨史謂陳文猥鄙，無所建白，而禮稱其政體多達，勳德未昭。文廬陵人，與禮同鄉，蓋曲徇桑梓之私，非公論矣。

【內閣行實二卷】兩淮馬裕家藏本 不著撰人名氏，亦無序跋。所載僅解縉、黃淮、胡廣、胡儼、楊士奇、楊榮、金幼孜、張英、陳山、楊溥、陳循、高穀、苗衷、馬愉、曹鼐十五人。今核其文，與雷禮列卿紀中內閣行實竝同。蓋書賈取不完之本，改其目錄以售欺，併削去禮名，使若別一人所著者，其作僞頗巧。然禮原本具在，何可誣也。

【善行錄八卷續錄二卷】內府藏本 明張時徹編。時徹字維靜，鄆縣人。嘉靖癸未進士，官至南京兵部

尙書明史附見張邦奇傳。此書彙探史傳，取先哲行誼之高者，萃次成編，正編起春秋至明代，凡二百九十人，續編起漢迄宋，凡一百四十五人。

【義烏人物志二卷】浙江范懋柱家天一閣藏本。明金江撰。江字孔殷，義烏人。是書成於嘉靖乙未。取史傳地志及諸家文集中所載義烏名人，各爲之傳贊，所載凡四十七人，分忠義孝友政事文學四類，蓋全倣宋濂浦陽人物記例，而敘述過於簡略，不及濂書博贍也。

【濟美錄四卷】兵部侍郎紀昉家藏本。明鄭燭編。燭歙縣人，是編成於嘉靖乙未。蒐錄其祖元歙縣令鄭安、休寧令鄭千齡、徵授翰林待制鄭玉、歙縣令鄭璉、國史郡志諸傳及制誥公牒誌狀之屬，人爲一卷，千齡安之子，玉璉皆千齡之子也。前有黃訓序，稱玉之死節，由守徵之將，見之不以其禮，使見之以禮，可以無死，前乎先生有箕子焉云云。其說至謬。民生于三事之如一，臣不二心，天之經也。豈敵國謬爲恭敬，遂可叛君父而從之乎？如訓所云，是玉非爭名節而死，乃爭禮貌而死也。蓋自講學風熾，儒者類以傳道爲重，但能註太極圖，解近思錄，卽爲有功於世道，而綱常大義，視若末務焉。訓之此說，其亦浸淫於習俗而不自覺歟。

【逸民傳二卷】浙江巡撫探進本。舊本題明少元山人皇甫濬撰。考明史藝文志載皇甫濬逸民傳二卷，江南通志亦同，則舊本傳寫誤也。濬字子約，一字道隆，長洲人。嘉靖甲辰進士，除工部主事，謫河南布政司理問，稍遷興化同知。明史文苑傳附見其兄濬傳中，是編探歷代逸民事迹，人各爲傳，起晉孫登迄宋林逋，凡百人。其去取義例不甚可解，如鄧郁一傳，乃純述白日沖舉之事，則葛洪神僊傳以下，何可勝

收其他表表在耳目者，乃或不載，殆偶然寄意，不求詳備。如皇甫謐高士傳例，歟。卽其託始於晉，亦似續謚書也。中庚易明僧紹二人有錄，無書，其爲傳寫者佚之，爲當時失於檢校，則均不可知矣。

【元祐黨人碑考一卷】編修程晉芳家藏本

明海瑞撰。瑞字汝賢，號剛峯，瓊山人。由舉人官至南京右都御史，諡忠介。事蹟具明史本傳。案元祐黨人碑，載於李心傳道命錄。馬純陶朱新錄者，互有異同。茲則專以道命錄爲主，其闕者則以他書補之。故所錄人數較他書爲多。如曾任執政之黃履、張商英、蔣之奇，曾任待制之張戛、岑象求、周鼎以下十餘人，皆他本所未載者。搜羅可謂博矣。至所附慶元僞學黨籍，與他書無所同異，固不及永樂大典所載慶元黨禁之詳備也。

【續吳先賢贊十五卷】浙江吳玉璠家藏本

明劉鳳撰。鳳字子威，長洲人。嘉靖甲辰進士，官至河南按察使。僉事鳳所撰述，刻意奧僻，或至於餽釘堆積，晦昧詰屈，不可句讀。是編論贊亦復如是。所錄皆明人自六卷以前，不分門目。七卷以下，分節義、死事、孝友、儒林、文學、辟命、隱逸、藝事、道術、寄寓十門。自序謂自節義以上，不爲題目者，所以效於用，亦各因時，或未可以概之也。然開卷卽爲高啟，概以文學，有何不可總之好怪而已矣。

【羣忠備遺錄二卷】江蘇巡撫採進本

明羅汝鑑撰。汝鑑字明夫，新喻人。是書記建文殉節諸臣事迹，大致本張芹備遺錄、鄭膺羣忠事略，而稍附益之。遂合兩書以爲名。所錄凡八十有四人。每傳後附尹直、謝鐸、何孟春、敖英、陳建諸論，其稱外史氏者，則汝鑑所自作也。其書初刻於楚，前有嘉靖辛亥自序。後十年庚申，以校讎未精，復增入數人而重刊之。見卷末自識中。

【宋五先生郡邑政績一卷】浙江范懋柱家天一閣藏本。明李貴撰。貴字廷良，豐城人。嘉靖癸丑進士。改庶吉士。貴先嘗編次程明道郡邑政績一卷。此復增入周張朱陸四子涖民之事，合爲一書。然皆史傳文集所已載，無庸貴之表章也。

【頌輔寶鑑要覽四卷】浙江巡撫採進本。明耿定向撰。定向字在倫，麻城人。嘉靖丙辰進士。官至戶部尚書。總督倉場。諡恭簡。事蹟具明史本傳。定向以講學著論。史本非所長。此書乃其爲南直隸督學御史時所作。上述虞夏，下逮唐宋，得輔相之賢者七十九人，各爲讚述。議論亦多膚淺。其卷首論臯陶一條，引陸九淵之言，則其生平宗旨所在也。

【守令懿範四卷】直隸總督採進本。明蔡國熙撰。國熙永年人。嘉靖己未進士。官至山西提學副使。是編乃其官蘇州府知府時，輯古來守令事迹。自周至元，分儒牧循牧二類。儒牧自子游而下三十八人。循牧自公孫僑而下一百一十人。前有皇甫汈序，稱儒可以包乎循，而循未必皆合於儒。體用之間，蓋有辨焉。云云。夫儒者之學，明體達用，道德事業，本無二源。歧而兩之，殊爲偏見。且唐韓愈、宋歐陽修，所學不甚相遠，而列愈於儒牧，列修於循牧，亦不知其以何而分。楊簡傳陸氏之學，黃震傳朱子之學，所著之書，釐然具在，乃升簡於儒牧，以繼陸氏，而不升震於儒牧，以繼朱子，豈非未見日鈔耶。循名失實，尊儒而不知所以尊，徒成其門戶標榜而已。

【橋李往哲前編一卷】浙江巡撫採進本。明成元佐撰。元佐字希仲，嘉興人。嘉靖壬戌進士。官至尙寶司卿。是編取洪武至萬曆初年嘉興前哲，自程本立以下共十四人，各爲一傳。王世貞爲之序。其稱前編

者則以國朝項玉筍有續編之刻追題此名也。

【古今廉鑑八卷】江蘇巡撫探進本 明喬懋敬撰懋敬字允德上海人嘉靖乙丑進士官至湖廣右布政使是書所載自春秋季文子至明楊繼盛皆以清操傳於世者亦宋人廉吏傳之類而鈔撮大略挂漏尚多前有萬曆戊寅自序自稱其官爲閩封人乃其官閩時所輯也。

【莆陽科第錄二卷】浙江巡撫探進本 明吳爵編爵湖南寧鄉人嘉靖中官福建興化府訓導因錄興化一郡科第自洪武庚戌至嘉靖己酉其爵里亦皆續載前有郡人鄭岳序後有爵自跋。

【懷忠錄】無卷數 浙江范憲柱家天一閣藏本 明鄭應旂撰應旂莆田人嘉靖中貢生是編前七卷皆應旂詠靖難諸人詩賦騷詞後爲革朝遺忠列傳不分卷數每傳後附引諸家記載詩文以證之略似名臣言行錄之體凡四十篇而以外錄補錄終焉大致與黃佐革朝遺事相仿。

【吳興名賢續錄六卷】江蘇巡撫探進本 明王道隆撰道隆字客山烏程人其書分道學儒行文藝勳業宦績孝友節義流寓隱逸名宦十門各敘其實事以論贊其名宦一門採摭最廣頗足補志乘之闕然烏程潘季馴以治河功績爲明代名臣應列勳業錢鏐經史皆有著述應列儒行今具錄其同時同邑之人而二人獨不見收未免疎漏至如錢蔣瑤而不載其陳時弊七事錢張永明而於永明改左都御史後一切整飭臺綱諸政績悉置不錄亦爲脫漏云。

【桐森三卷】浙江巡撫探進本 明方學漸撰學漸字達卿號本菴桐城人以子大鎮貴贈大理寺少卿是編取其鄉忠孝義烈之行凡耳目所及者各爲立傳自序謂風世莫如森充森莫如學故以桐森爲名。



凡五十人爲傳二十三篇。

【靖難功臣錄一卷】左都御史張若淮家藏本。不著撰人名氏。黃虞稷千頃堂書目。有此書而闕其卷數。此本爲明嘉靖中魯藩宗人當澗編入明朝典故者。祇此一卷。未知爲完書否也。所載姚廣孝李友直譚淵朱能張玉武勝顧成李彬孫巖陳珪劉中孚徐忠薛祿陳貴陳璫吳中金忠徐增壽凡十八人。後又附以封爵名數。凡三十四人。敘述簡略。不足以資考證也。

【貧士傳二卷】內府藏本。明黃姬水撰。姬水字淳父。吳縣人。黃省曾之姪也。是編載自周至明初貧士七十五人。各爲之贊。漏略殊甚。至如莊周貸粟監河侯一事。亦列之貧士中。尤不倫也。

【崑山人物傳十卷名宦傳一卷】浙江鮑士恭家藏本。明張大復撰。大復字元長。崑山人。與歸有光同時。是書舊本題曰梅花草堂集。而以崑山人物傳。崑山名宦傳爲子目。蓋皆編入集中。故總以集名。實則各一書也。先是方鵬有崑山人物志六卷。此則斷自明代。起洪武至萬曆。得三百餘人。其間父子祖孫。以類附傳。略如史體。又於官是土者。取十五人爲名宦傳附之。敘述尙爲雅潔。而詞多揚詡。亦不免標榜之習。其名宦傳別有鈔本。題曰玉峯名宦傳。析爲二卷。佚其中王南昌傳一篇。僅有十四人。又佚其論尾數行。蓋傳鈔脫漏。不及集本之完整也。

卷六十二

傳記類存目四

【歷代相臣傳一百六十八卷】直隸總督採進本

明魏顯國撰。顯國字汝忠，南昌人。隆慶丁卯舉人。是

書明史藝文志著錄。卷數與此本相合。大抵全鈔史傳原文，無所褒貶，亦無所考正。所敘歷代相臣職名，如南朝制一條，以梁初罷相國置丞相，罷丞相置司徒，後又置相國位列丞相上，不知置相國列丞相上，乃陳制，非梁制。又謂唐魏徵以秘書監參預朝政，始有參議得失參知政事之名，不知其時先以吏部尚書杜淹參議朝政，故有是名。又謂開元以後宰相為鹽鐵轉運延資庫使，名尤不正。不知其時以宰相兼攝是官，非以是官為宰相。況其時太微宮使、太清宮使，多以宰相兼之，不僅延資庫使也。又以李光弼列於宰相，不知光弼為河中節度，惟加平章，不治政事，乃唐之使相。唐末節度加侍中、中書令三公三師者甚多，皆使相，非宰相。載於史志者甚詳。元之參議中書省事，乃六曹管轄官，止四品，亦非宰相。故元史宰相表不列是官。又元制三公非相職，故別立三公三師表，今俱列於宰相，舛譌既甚，挂漏尤多。至於各史宰相列傳，或採或置，茫無義例，更未免疎脫矣。

【儒林全傳二十卷】浙江汪啟淑家藏本

明魏顯國撰。所錄自孔子至元吳澄，皆採錄前史，與相臣傳

同。

【歷代守令傳二十四卷】兩淮馬裕家藏本

明魏顯國撰。自宓不齊仲由至劉秉直，為歷代循吏二十

一卷。又自郅都至敬羽，為歷代酷吏三卷。於史傳原文之外，間有所增，而亦多蕪雜。

【元相臣傳十二卷】兩淮鹽政採進本

明魏顯國撰。其書紀元代丞相，自耶律楚材至布延巴哈，原作

晉類不花，今改正。二十六人各自爲傳，全襲元史之文，未嘗別有蒐討。又前後凌亂脫誤，如元史宰相表載安圖原作安童，今改正。爲右丞相，始世祖至元二年乙丑，訖於二十七年庚寅。布呼密原作不忽，尤今改正。爲平章政事，始至元二十八年辛卯，訖成宗元貞二年丙申。是布呼密後於安圖，凡二十七年。此書列布呼密於安圖前，殊爲倒置。又如世祖庚申元年，王文統趙璧爲平章政事，尤在史天澤諸人之前，其相業俱見本傳，而此書均汰之。蓋不特於正史之外無所徵引，且於正史之中亦多所挂漏矣。

【忠節錄六卷】浙江巡撫採進本。明張朝瑞撰。朝瑞字子禎，海州人。隆慶戊辰進士官至南京鴻臚寺

卿。朝瑞以宋端儀革除錄，至郎瑛萃忠集，記遼國諸臣事者，凡十七家，互有舛漏。因輯此書，載當時滿雪之旨於卷首，明非私撰。自第一卷至第五卷，記徐輝祖以下，凡一百六十三人，附錄十六人，以官階爲敘，不分差等。第六卷曰考誤，如辨建文於天順中由滇至京，唯太監吳亮識之。當時三楊皆其舊臣，不應僅一吳亮能識舊主，而建文時年六十四，亦不得有九十餘歲。其考證最爲明確。所列十七家書外，尙有高璧之幽光錄，陸時中之逸史，姜清之祕史，王會之野史，袁褰之奉天刑賞錄諸書。朝瑞未及蒐考，然大概已備於此矣。

【吳中人物志十二卷】浙江巡撫採進本。明張景撰。景字景春，長洲人。是編成於隆慶庚午，所輯吳中

人物，上自成周，迄於明代，分孝友忠義吏治薦舉宦蹟儒林文苑閭秀逸民流寓列仙方外十二門，各系以論贊。同郡皇甫汸爲之序。吳中人物，自王賓楊循吉祝允明朱存理等，遞有撰述。此本因而廣之，較諸家稍備。然事皆不著出典，未爲無徵不信也。

【輔世編六卷】江蘇巡撫採進本 明唐鶴徵撰。徵有周易象義已著錄。是書取明代諸臣次其行事起洪武初李善長劉基訖嘉靖中曾銑胡宗愈凡五十二人。崇禎開其門人陳容謨巡撫湖廣爲評校刊版。其敘稱戎務孔亟之時輒取名臣傳略。做其行事多得變通之法。聞嘗鈔書有得多與我師。疑蕘唐先生輔世編合者。因綜其成。彙以己意勒成一書。則是編已不盡鶴徵原本矣。其所採諸人事實多主戰略。蓋容謨身在戎行。意切時用。有所爲而爲之者也。

【聖門人物志十二卷】江西巡撫採進本 明郭子章撰。子章有蟻衣生易解已著錄。是書則子章官晉陽時所輯。凡遊於聖門與私淑而得從祀廟廡者各爲之小傳。附以贊論。首孔子世家。次先賢。次先儒。而以有明之會典祀儀終焉。其中難以周汝登羅汝芳諸人之論。其時心學橫流。故子章多主張其說。孟子傳論謂孔子之學以從心所欲不踰矩爲的。顏子從之末由。而孟子云能者從之。又云心之官則思。卽孔子從心之旨。猶主持門戶之見也。

【豫章書一百二十一卷】江西巡撫採進本 明郭子章撰。是書蓋江西之總志。全用史體爲之。分大記二十卷。志二十二卷。表十卷。事紀二卷。列傳六十八卷。前無序而有總目。其總目以爲列傳六十六卷。刊本誤也。其體例蓋本諸華陽國志。然冗雜太甚。去常璩所撰遠矣。

【國士懿軌十卷】浙江巡撫採進本 明余養蒙撰。養蒙臨海人。自序謂稟大中丞耿公之命而爲之者。案明史耿定向傳。弟定力。隆慶辛未進士官至南京兵部右侍郎。時方爲南京都御史。故稱大中丞也。書前有定力序。復有諭官屬文一首。大旨以當時專重科目。名實不副。故取古今來士子出於太學。及以贊

郎起家者。自列國迄明初。凡一百二十七人。刪節諸史及志乘。各爲之傳。意欲以矯偏重之弊。然舉一代之進士。概以籠鷹。權駒目之。殊不免於矯枉過直矣。

【春秋名臣傳十三卷】浙江汪啓淑家藏本。明姚咨撰。咨字舜咨。無錫人。初其邑人邵寶爲是書未畢。咨續成之。始於周之辛伯。迄於虞之宮之奇。凡一百四十八人。傳末各附以小讚。大旨與宋王當春秋列國臣傳相出入。而其義例。乃譏當書用魯史編年之非。然旣標以春秋。則自應用春秋之年月。若各從列國。轉致錯互難明。以是議當未爲允也。

【戰國人才言行錄十卷】浙江范懋柱家天一閣藏本。明秦淪撰。淪無錫人。是書成於隆慶中。類次戰國人物。起魏文侯。迄荊軻。凡一百四十九人。皆鈔錄戰國策史記之文。而稍刪節之。

【鎮平世系記二卷】浙江范懋柱家天一閣藏本。明朱陸樞撰。陸樞有易學識遺。已著錄。永樂元年。封周定王第八子有續爲鎮平王。陸樞其六世孫也。以明代玉牒於正德以後多略。遂纂述有續以下八世支派。以成此書。前曰例義。次世系。次世傳。次內傳。次述訓。

【江右名賢編二卷】浙江巡撫採進本。明喻均劉元卿同撰。均新建人。隆慶戊辰進士。官至按察使。副使。元卿有易大象觀。已著錄。萬歷中。巡按江西御史臨清陳大夔議修通志。因先欲輯名賢一門。屬均與元卿司其事。分名臣節義理學忠諫方正清介隱逸儒行治功文學孝友十一目。所紀凡二百四十有八人。門類太多。頗涉瑣碎。又所載有明一代人物。尤爲泛濫。前有巡撫都御史邊維垣及大夔序。後有元卿序。元卿謂理一而已。安得紛紛區目。則知分目冗複。出於均意。卽元卿亦心非之矣。

【宗譜纂要一卷】安豐縣探進本 明王應昌撰。其子鏞續成之。應昌字亮之，嶧縣人。萬曆癸酉舉人。鏞字長穎，入國朝官上海縣知縣。是書敍歷代理學源流，分開天、一世祖、承天、第一宗、達天、第一宗、翼天、第一宗，標目已近乎二氏。至以荀卿揚雄與孔子並列，尤爲失倫。其分載諸儒支派，大率與黃宗羲明儒學案相出入。蓋爲門戶而設，不爲學問而設也。

【紹瑞史鑑四卷】兩淮鹽政探進本

明張世則撰。世則諸城人。萬曆甲戌進士。官至四川安縣兵備副

使。是書嘗於萬曆二十年進呈，得旨下禮部、禮部覆疏附焉。書凡六條：一曰主君，首載明太祖禁抑內臣，不得干預外事，然後敍歷代寵閣之弊；二曰弼臣，載歷朝相臣與宦寺離合之迹；三曰妍範，載閣之賢者，四曰燧戒，載閣之惡者；五曰國祚，載秦漢以來寺人之尤能亂國者；六曰沿革，則閣宦職官志也。宦寺賢者，萬中不得一二，世則方指陳炯戒，將以啟迪君心，而所列妍範一條，如勃鞞之斬祛，繆賢之薦士，裴寂之宮人私侍，高力士之贊立太子，皆目爲佳事，殊多謬戾。又列及明代寺人，而以阮安預其閒，益不可調矣。

【聖學宗傳十八卷】兩淮馬裕家藏本

明周汝登編。汝登字繼元，又字海門，嶧縣人。萬曆丁丑進士。官

至南京尚寶司卿。明史儒林傳附載。王畿傳末稱王守仁傳。王艮傳徐樾、樾傳顏鈞、鈞傳羅汝芳。汝芳傳楊起元及汝登。起元清修姱節，然其學不諱禪。汝登更欲合儒釋而會通之。輯聖學宗傳，盡採先儒語類禪者以入。蓋萬曆以後，士大夫講學者多類此。云云。卽此書也。首載黃卷正系圖，其序自伏羲傳至伊川程子，下分二支。一支朱子，以下不系一人。一支則陸九淵之下，系以王守仁，并稱卷是圖信陽明篤敍。

統系明與聖學宗傳足相發明云。

【歷朝瑣鑑四卷】編修注如蔣家藏本 明徐學聚撰。學聚字敬輿，蘭谿人。萬曆癸未進士，官至副都御史。巡撫福建，是編輯錄歷代官官事蹟。自周秦以迄於明，分善可爲法，惡可爲戒二種。而於明代紀載尤詳。第所錄僅至世宗朝而止，則仍不免有所避忌。又元李邦寧卽嘗入太學，代祀孔子，至大風滅燭之異者，其狂妄可知。乃入之善，可爲法中進退亦未甚允也。

【鹽梅志二十卷】內府藏本 明李茂春撰。茂春字蔚元，杞縣人。萬曆癸未進士，是編採取歷代賢相嘉言善行，錄成一編。始於皋陶，終於范純仁，凡六十六人。

【漢唐宋名臣錄五卷】兩江總督採進本 明李廷機撰。廷機字爾張，晉江人。萬曆癸未進士，官至禮部尚書。東閣大學士。諡文清。事蹟具明史本傳。是書所錄自漢文翁至宋杜衍，凡六十人。黃吉士序謂其錄取嚴而用意微，蓋借以諷勸當時廷臣，有爲而發，故不求全備云。

【栖真志四卷】浙江巡撫採進本 明夏樹芳撰。樹芳字茂卿，江陰人。萬曆乙酉舉人，是編取周秦至元代之修真栖靜者，各詳其事蹟。陳繼儒爲之序，其中時代頗顛舛。至於江淹謝靈運李賀歐陽修蘇軾黃庭堅秦觀朱子諸人，凡談論詞章，語意偶類釋老者，卽引而入志，尤牽合不倫。

【獻徵錄一百二十卷】浙江巡撫採進本 明焦竑撰。竑有易鑒，已著錄。是書採明一代名人事蹟，其體例以宗室戚畹勳爵內閣六卿以下各官分類標目，其無官者，則以孝子義人儒林藝苑等目分載之。自洪武迄於嘉靖，蒐探極博，然文頗泛濫，不皆可據。又於引據之書，或註或不註，亦不免疎略。考竑在萬曆

中管應陳于陞聘同修國史。既而罷去。此書殆卽當時所輯錄歟。

【熙朝名臣實錄二十七卷】浙江巡撫採進本。明焦竑撰。此書明史藝文志不著錄。前有自序。謂明代諸帝有實錄。而諸臣之事不詳。因撰此書。自王侯將相及士庶人方外。緇黃僮僕妾伎。無不備載。人各爲傳。蓋宋人實錄之體。凡書諸臣之卒。必附列本傳。以紀其始末。而明代實錄。則廢此例。故竑補修之。其書郭子興諸子之死。及書靖難諸臣之事。皆略無忌諱。又如紀明初有通曉四書等科。皆明史選舉志及明會典所未載。韓文勅劉瑾事。有太監徐智等數人爲之內應。亦史傳所未詳。頗足以資考證。然各傳中多引寓圃雜記及瑣綴錄諸書。皆稗官小說。未可徵信。又或自序事。或僅列舊文。標其書目。於體裁亦乖。所附李贄評語。尤多妄誕。不足據爲定論也。

【四侯傳四卷】江蘇巡撫採進本。明王士騏撰。士騏有馭倭錄。已著錄。是編摭文成侯張良。忠武侯諸葛亮。武侯王猛。鄴侯李泌。四人行事。以正史及稗官野乘相參而成。蓋隱寓尙友之意。

【歷代內侍考十卷】兩淮鹽政採進本。明毛一公撰。一公字震卿。遂安人。萬歷己丑進士。官至給事中。其書取古來閹寺事蹟。輯爲一編。自春秋及宋。以時代次之。各序其善惡。而加以論斷。大旨褒少而貶多。一公天啟末。蘇州巡撫。一鷺之兄也。一鷺黨魏忠賢事。具明史。其兄此書。儻亦有爲而作乎。

【友于小傳二卷】兵部侍郎紀昀家藏本。明紀廷相撰。廷相字柱石。獻縣諸生。是書成於萬歷甲申。前有自序。稱孝友皆天性。而人情日薄。往往知愛其親。而不推其愛於兄弟。故摭拾舊迹。以感發其彝良。不錄帝王之事。分位殊也。不錄聖賢之事。亦不錄奇行異節。舍生蹈義之事。不強以所不能也。分二卷。上曰



循常。下曰處變。皆士庶人家庭細務。末有其子堯卿跋。稱族有閔籟者。託詞避暑。借其書室。日日揮汗錄。此編竟愧而復睦云。

【明十六種小傳四卷】浙江巡撫採進本 明江盈科撰。盈科字進之。號綠蘿山人。湖廣桃源人。萬歷壬

辰進士官至四川提學副使。是書採輯明代軼事。分四綱十六目。一曰四維。分忠孝廉節四目。二曰四常。分慈寬明慎四目。三曰四奇。分隱怪機俠四目。四曰四凶。分姦諂貪酷四目。大抵委巷之談。自序曰。因閱國乘。摘出三百餘年新異事者。妄也。如方孝儒之滅族。由殺蛇之報。國史安有是事哉。其分配諸目。如薛瑄入節類。于謙入廉類。姚廣孝姊入隱類。亦往往無義例也。

【夥壤封疆錄一卷】江蘇巡撫採進本 明魏應嘉撰。應嘉興化人。萬歷戊戌進士官至兵部左侍郎。是書前有應嘉自序。稱取劉方壺所臚列未盡者。具名於左。皆天啟中諸臣之不附魏忠賢者也。其詞狂謬之甚。所列執政一人。司禮大璫一人。部堂五人。卿寺三人。翰林七人。臺諫十六人。部署二人。書後有跋。不知何人所作。詆應嘉爲京卞倖確。然應嘉依附奄黨。代爲搏噬。觀其自序。殆不知世有廉恥事。實京卞倖確之所不爲者也。

【東林點將錄一卷】江蘇巡撫採進本 明王紹徽撰。紹徽陝西咸寧人。萬歷戊戌進士官至吏部尙書。

事蹟具明史閣黨傳。其書以水滸傳晁蓋宋江等一百八人。天罡地煞之名。分配當時縉紳。今本闕所配孔明樊瑞宋萬三人。蓋後人傳寫佚之。卷末有跋。稱甲子乙丑於毘陵見此錄。傳爲鄒之麟作。所列尙有沈應奎繆希雍二人。與此本不同。蓋其時門戶蔓延。各以恩怨爲增損。不足爲怪。又稱許其孝陳保泰楊

茂春郭鞏四人後列逆案不知何以廟名或作此書時四人尙未附忠賢耶圖若璣潘邱劄記亦有與王宏撰書曰頃聞點將錄果出貴鄉王紹徽手否先生以此書實出阮大鍼王偶失閱歎謀所以解之術於阮阮授以此書而王上之而世遂以名之細思之殊不然兒時讀點將錄記沒遮欄程宏乃大鍼豈有自作此錄而竄入己姓名者云云則當時已傳聞異詞然崇禎欽定逆案以此錄屬之紹徽於時公論方明諒非誣讎明史本傳亦以此書屬紹徽然則輾轉傳寫雖或有竄改其造謀之人要終不能以浮詞他說解也

【東林籍貫一卷】江蘇巡撫探逆本 不著撰人名氏所列北直八人南直四十一人浙江十一人江西十六人湖廣二十人河南七人福建五人山東十三人山西十五人陝西十八人四川五人廣東雲南貴州各一人其北直郭鞏陝西薛貞後皆名麗逆案是又當考其究竟不當以一時之記錄爲斷矣  
案此書及東林同志錄東林朋黨錄天監錄盜柄東林夥皆天啟中書其作者雖不可考要皆萬歷時舊人也今附諸魏應嘉王紹徽後從其類也

【東林同志錄一卷】江蘇巡撫探逆本 不著撰人名氏題下註曰續點將錄所列政府韓爌以下六人詞林孫慎行以下十九人部院李三才以下五十七人卿寺顧憲成以下七十三人臺省魏大中以下七十六人部曹王象春以下四十一人藩臬郡邑顧大章以下二十六人貨郎武弁山人吳養春以下二十一人

【東林朋黨錄一卷】江蘇巡撫探逆本 不著撰人名氏前載趙南星等九十四人後列東林脅從顧乘

謙等五十三人各繫以科分籍貫座主姓名而註以已處未處及在籍現任字考明史闕黨傳稱盧承欽餘姚人由中書舍人擢御史請以黨人姓名罪狀勝示海內魏忠賢大喜敕所司刊籍凡黨人已罪未罪者悉編名其中後承欽官至太僕寺少卿云云此書中已處字與所言已罪未罪相合其是時之官本歟

【天監錄一卷】江蘇巡撫探進本 不著撰人名氏題下註曰真心爲國不附東林橫被排斥久抑林野及冷局外轉者凡一百三人皆魏忠賢之黨也

【盜柄東林夥一卷】江蘇巡撫探進本 不著撰人名氏分初盛中晚四門詳列其姓名官爵而各註其罪狀詞極醜詆楊漣左光斗諸人名下已註斃獄字則此書成於天啟末年也

【事編內篇六卷】江蘇巡撫探進本 明孫慎行撰慎行字聞斯武進人萬歷乙未進士官至禮部尚書諡文介事蹟具明史本傳是書探史傳中名臣事跡自公孫僑至王守仁凡十八人隱逸六人以隱寓行藏之旨附以張瓌薛案評語慎行自序云尙有外篇雜篇然檢其子士元所作凡例則但刊內篇其外篇雜篇未刊也

【廉吏傳】無卷數 浙江巡撫探進本 明黃汝亨撰汝亨有古奏議已著錄是書以宋費樞所作廉吏傳自春秋迄五季止百十有四人尙爲闕略因搜探諸史五季以前增入三十三人又考宋元二史續載六十四人各以時代爲序復以舊傳不分優劣乃定爲三等於傳首姓名之上各署上中下字以別之正編之外又有廉蘧一編所載爲郅都張湯等十人亦有評語姓名之上則署以酷誣陋忍賊姦諸字體例頗爲杜撰傳末附評一二語亦皆膚淺且汝亨旣因費樞舊本增輯成編自當以孰爲原書孰爲續補分

別標識，乃混而爲一，但署己名，尤不免於掠美矣。

【歷代名臣芳躅二卷】浙江巡撫採進本。明金汝諧撰。汝諧字啟宸，平湖人。萬曆甲辰進士。是編採摭前人事蹟，自周秦以迄於明，分忠貞、節義、良吏、恬退、純孝、友于、範俗、仁恕、學術、言行九類。大抵詳於明人，而略於前代。挂漏已不待言，且排比失倫，品題多謬。學術類以子貢師曠同稱，殊嫌龐雜。甚至以楊溥、李東陽、歸之節義一門，溥固長者，東陽亦不失文士。然一則遷就於靖難革除之間，一則依違於奄豎擅權之日，日以節義豈足厭後世之心乎。

【聖學嫡派四卷】內府藏本。明過庭訓撰。庭訓字成山，平湖人。萬曆甲辰進士。官至福建按察使。擢應天府丞，未及上而卒。其書自漢董仲舒至明羅洪先，所取纔三十六人，各略錄其言行，皆昭昭耳目，無煩復爲表章者也。

【大臣譜十六卷】內府藏本。明范景文撰。景文字夢章，一字質公，號思仁，吳橋人。萬曆癸丑進士。官至東閣大學士。殉流寇之難。國朝賜諡文忠。事蹟具明史本傳。其書皆紀明代大臣內閣七卿，各爲二卷。起自洪武，迄於泰昌，皆用編年之體，而不分列傳。凡例稱一憑實錄，不置褒貶。其銓除去就，國史有佚者，則採傳誌補之。或人非大臣，而章奏事與大臣相關者，亦附見焉。此本世罕流傳，前後無序跋，而有景文二私印，中多墨筆添改之處，蓋卽其家初印覆校之稿本也。

【宰相守令合宙十三卷】江蘇巡撫採進本。明吳伯與撰。伯與字福生，宣城人。萬曆癸丑進士。官至廣東按察司副使。是書序文題曰宰相守令合宙，而此本十三卷，乃有宰相而無守令，蓋非完書矣。所錄雖

多採史傳而不免雜以稗官。又刪節本傳。往往遺其大而識其小。體例殊爲冗瑣。至於以李斯爲禮賢尙德。而以趙高附斯傳。尤爲乖舛。又唐初不載裴寂。劉文靜。竇抗。陳叔達諸人。而先敘蕭瑀。宋曹彬。同平章事。蓋沿唐五代使相之制。實不預政。乃列於真宰相中。亦爲失考也。

【昆陵人品記十卷】兩淮鹽政採進本。明吳亮撰。亮字采于。武進人。吳中行之長子也。萬曆辛丑進士官至大理寺少卿。事蹟附見明史中行傳。是書因毛憲舊本而增修之。自商迄明。采摭頗富。然十卷之中。歷代居六。而明乃居其四。雖曰時近易詳。亦少乖謹嚴之旨矣。至於秦伯仲雍。未免借材。梁武子孫。亦殊泛載。皆未免地志之舊習也。

【名世編八卷】江蘇巡撫採進本。明吳亮撰。初亮罷官歸田。嘗輯古高隱事。爲遜世編。及再起。又輯此編。皆不採於史傳。惟剽剗唐順之左編。李贄藏書。李廷機名臣記。三書而成。去取絕無義例。編次亦多顛倒。如首列大禹。乃帝王而非人臣。以例推之。何以刊除虞舜。程嬰乃趙氏之臣。魯仲連侯嬴。乃平原信陵之客。皆未登官籍。以例推之。此類何可勝收。百里奚蹇叔。列管仲前。蘧瑗列百里奚前。屈原列蘧瑗前。尤屬啓亂而失次也。

【安危注四卷】兩江總督採進本。明吳姓編。姓字鹿友。南直隸興化人。萬曆癸丑進士官至禮部尙書。兼東閣大學士。事蹟具明史本傳。是書輯漢晉唐宋將相之事。用陸賈言天下安。注意和。天下危。注意將之語。以名其書。意在諷時事也。

【明表忠記十卷】浙江巡撫採進本。明錢士升撰。士升有周易揆。已著錄。是書載建文死難諸臣。首列

二親臣。次殉難。次死義。次死事。次死戰。次從亡。次隱遁。次後死。次三不忠。次正諱。竝附載表忠祠碑記。大旨堅主建文帝出亡之說。非疑以傳疑之義也。

【壺天玉露四卷】浙江巡撫探進本。明錢陞撰。陞字元履。海鹽人。萬曆戊午舉人。其書亦費樞廉吏傳之流。而兼收隱逸。爲例小殊。所載始於春秋。終於明之萬曆。所錄凡二百九十六人。去取踏駁。頗無義例。如解揚申包胥。當以忠論。尉遲敬德。當以勇論。莊周列禦寇。當以隱論。田基。當以節論。江上丈人。侯嬴。當以俠論。趙括。母當以識論。西門豹。當以術論。概以廉稱。未當其實。又公孫宏之詐儉。揚雄之失節。華歆之佐逆。濫與斯列。亦殊混淆。至舟之僑介之推。合爲一事。則誤從說苑。嚴君平。嚴遵。分爲二人。則不攷後漢書。尤疎舛之顯然者也。是書以壺天玉露爲名。而序文題爲壺天玉露廉鑑。每卷之首。亦各別標廉鑑字。豈壺天玉露。乃其著書之總名。廉鑑。乃其一種歟。末又附清士一卷。自齧缺而下六十餘人。各爲小傳。而繫以詩。卷端亦題壺天玉露字。殆其中之又一種也。

【浙學宗傳】無卷數。浙江巡撫探進本。明劉鱗長撰。鱗長字孟龍。號乾所。晉江人。萬曆己未進士。官至南京戶部郎中。是編乃其爲浙江提學副使時所編。以周汝登所輯聖學宗傳。頗詳古哲。略於今儒。遂採自宋訖明。兩浙諸儒。錄其言行。排纂成帙。大旨以姚江爲主。而援新安以入之。故首列楊時。次以朱子。陸九淵。竝列。陳亮則附載於末。題曰推豪別錄。又以蔡懋德論學諸條。及鱗長所自撰掃背圖諸篇。綴於卷後。懋德鱗長。非浙人。入之浙學。己不類。而自撰是書。自稱劉乾所先生。與古人一例。尤於理未安也。

【榕陰新檢八卷】兩淮鹽政探進本。明徐勣撰。勣初字惟起。更字與公。閩縣人。聚書數萬卷。竝手自丹。

黃以博治名一時。竟終於布衣。明史文苑傳附見鄭善夫傳中。茲編採摭古事。分孝行忠義貞烈仁厚高隱方技名儒神仙八門。所載多閩中事。大旨表章其鄉人也。

【爲臣不易編】無卷數 內府藏本 明黃廷鶴撰。廷鶴爵里未詳。據書前周延儒序。稱與廷鶴定交。此

編卽夙昔所共討論。則萬歷末人也。所錄古來名臣自皋陶至文天祥凡百人。各爲之傳。而系以序贊。

【令史高山集七卷】兩江總督採進本 舊本題曰臨川令江左吳用先體中編纂。不著時代。核其紙版

乃明萬歷中式也。其書輯古賢令事蹟。以寓高山景行之意。爲目十七。爲事三百八十有九。皆不註所出

之書。其標目如循令廉令之類。尙成文義。如自清令薦舉令之類。則拙鄙甚矣。第一卷別名令譜。而隸事

與諸卷例同。尤不可解。

【晉陵先賢傳二卷】浙江巡撫採進本 明歐陽東鳳編。東鳳字千仞。潛江人。萬歷己丑進士。官至常州

府知府。謝病歸。起山西按察司副使。又起南京太僕寺少卿。竝不赴事。蹟附見明史顧憲成傳。是編取常

州先哲寓賢。自吳延陵季子。訖明錢一本。共六十九人。採史傳郡志。人各爲傳。傳末各附以頌。其傳於古

人必詳所據之書。於近人則率註其文爲某撰。以明有據。體例頗謹嚴。然亦間有不註者。疑爲疎漏云。

【明詞林人物考十二卷】浙江巡撫採進本 明王兆雲撰。兆雲字元楨。麻城人。是編錄明一代文士。起

於洪武。迄萬歷。仿昭明文選之例。其人見在者不登。每人各詳其事蹟。與所著作。凡四百二十三人。又補

遺四十四人。共四百六十七人。其敘述頗無法。則如劉基一傳。至二千言。所記皆望氣占夢。委巷流傳之

事。惟傳末附所著有劉誠意伯集一語。竝所著犁眉公集亦漏載。此自小說家言。何關文苑。又凌稚隆傳。

稱其纂輯五車韻瑞大爲詞林諸公所鑒賞亦未免濫美矣。

【弇州史料二十卷】左都御史張若淮家藏本。明董復表編。復表字章甫。華亭人。是書皆採掇王世貞文集說部中有關朝野記載者。哀合成書。無所考正。非集非史。四庫中無類可歸。約略近似。姑存其目於傳記中。實則古無此例也。然世貞本不爲史。強尊爲史。實復表之意。胡維霖墨池浪語稱弇州史料。凡請弇州作傳誌者。雖中材亦得附名。未請傳誌。雖蓋代勳名節義。亦所不載。後之耳食。未可以此爲定案云。云是又誤以爲出世貞之意。非其實矣。

【兩浙名賢錄五十四卷外錄八卷】浙江巡撫採選本。明徐象梅撰。象梅字仲和。錢塘人。其書取兩浙先賢。自唐虞迄明隆慶。別爲二十二門。又外錄元元空空二門。以載釋道二家。名目既多。體遂冗雜。如輔弼經濟。無故區分。文苑儒碩。過加軒輊。又諸傳皆標題官爵。獨道學一門。稱先生而不書其官。於體例亦未畫一。至所列之人。本正史者十僅二三。本地志者乃十至六七。以鄉閭粉飾之語。依據成書。殆亦未盡核實矣。

【古今貞烈維風什四卷】兩淮馬裕家藏本。明許有穀撰。有穀字子仁。宜興人。其書大旨爲表揚貞烈。而作按輿志區分。各以人繫其地。由古迄明。每地分列傳標題。列名不標題二類。其標題者。各題七言絕句。不標題者。粗舉事蹟而已。凡例稱詞雖淺俚。意取勸揚。是書長短。有穀已自道之矣。

【忠義存裏什二卷】兩淮馬裕家藏本。明許有穀撰。是書記建文殉難諸臣事蹟。每一傳。後繫七言絕句一首。



【續列女傳九卷】浙江鮑士恭家藏本。明邵正魁撰。正魁字長蘊，休寧人。是書以續劉向列女傳，仍其體例，分別七門，唯其中節義賢明各分一子卷，大抵採摭各史后妃列女傳，分類彙敘，間有略益，以他書者不過十之二三。每傳未必引諸經爲詠嘆之詞，以求肖向書之體，可謂王之學華，皆在形骸之外，末附汪匯所作正魁母鄭氏傳一篇，尤古無此例也。

【逸民史二十二卷】內府藏本。明陳繼儒編。繼儒有邵康節外紀，已著錄。是書雜採自周至元史傳，郡志隱逸之士爲二十卷，其末二卷以元史隱逸不詳，搜取誌銘之類，輯爲元史隱逸補，然是書所載如張良兩腿之類，皆策名登朝，未嘗隱處者。若吾邱衍、王冕之類，皆淹蹇不遇，豈非高逸者亦濫入之，未免擇之不精焉。

【東越文苑六卷】兩淮馬裕家藏本。明陳鳴鶴撰。鳴鶴字汝翔，侯官人。天崇間諸生，福建通志稱其早棄舉業，與徐燭兄弟共攻聲律，是編紀閩中文人行實，起唐神龍，迄明萬曆，爲四百十一篇。唐五代五十八人，宋元三百八十五人，明百有六人。

【姑蘇名賢小記二卷】兩淮馬裕家藏本。明文震孟撰。震孟字文起，長洲人。天啓壬戌進士，第一官至東閣大學士，諡文肅。事蹟具明史本傳。是書大意以當世目吳人爲輕柔浮靡，而不知清修苦節之士，可爲矜式者不少，故擇長洲吳縣人物卓絕者，各爲之傳，而系以贊，首高啓，終王敬臣，凡五十人。蓋旣以表前賢，又以勵後進也。震孟以天啓二年及第，而是書成於萬曆甲寅，蓋其未遇時，命意已如此。其立朝清介，有自來矣。

【崇禎閣臣行略一卷】浙江巡撫採進本 明陳盟撰。盟號鶴灘。富順人。天啓壬戌進士。官至吏部右侍郎。兼翰林院學士。加禮部尙書。是編首列崇禎一朝五十閣臣年表。次各爲小傳。據其載及姜瓖叛逆。李建泰伏誅之事。則其書當成於桂王未滅時也。所列小傳。各有評斷。而大抵深致憾於門戶。夫明以門戶亡國。其憾之是也。然稱溫體仁小心謹愆。兢兢自持。既與門戶不協。既與門戶不協。遂絕私交。謝絕情面。稱薛國觀之賜死。士論冤之。稱李建泰以人望薦舉督師。無一貶詞。顛倒是非。至於如是。其褒貶尙可信乎。亦仍一門戶而已矣。

【王謝世家三十卷】江蘇巡撫採進本 明韓昌箕撰。昌箕字仲弓。烏程人。是書成於天啓壬戌。考南朝王謝二家人物。各爲之傳。冠以譜系圖。及同名考。王氏分四派。一曰瑯琊。凡十四卷。二曰太原。正派。凡四卷。三曰太原支派。凡二卷。四曰太原別派。凡二卷。謝氏則惟陽夏一派。皆止於六朝。唐以後不預焉。

【名臣志鈔二十四卷】浙江巡撫採進本 明吳孝章撰。孝章字平子。嘉興人。是書前有天啓癸亥吳中偉序。謂其鈔鄭曉吾學編。王世貞四部棗。而稍節之。然如孫一元傳。乃殷雲霄所作。則亦不全據鄭王矣。所錄始於洪武。迄於隆慶。凡一百五十三人。卷中有自爲贊詞者。如李善長傳末是也。有襲弇州史棗者。如湯信傳末是也。然若劉基與李善長同卷。而贊詞獨不及於劉。馮勝傳友德藍玉同卷。而贊詞獨不及於馮藍。則未知命意之所存。其所載事實。頗爲闕略。而徐達傳之附增壽。李文忠傳之附景隆。此自史家備詳世系之體。若惟志名臣。烏容及此。至于謙傳之附石亨。益無理矣。中偉序全仿史記自序漢書敘傳之例行以韻語。殊乖體裁。謂之不善學步可也。

【歷代相業軍功考二卷明代相業軍功考二卷】浙江巡撫探進本 明沈夢熊撰。夢熊字兆揚，歸安人。是書成於天啓癸亥。所錄歷代相業，自伊尹至陸秀夫四十七人。軍功自呂望至孟珙五十人。明代相業自楊士奇至申時行十三人。軍功自徐達至王崇古三十人。前載事實，末附評語。大抵節錄史文，別無考證。評語亦皆陳因之談。

【銀鹿春秋一卷】浙江巡撫探進本 明陸嘉穎撰。嘉穎字子垂，又字明吾，嘉定人。天啓中嘗官主簿。是編輯古來義僕事蹟，其以銀鹿爲名者。銀鹿爲唐顏頤家僮，事顏真卿終身，至禍患不避去故也。然奴不負主，古來不止一銀鹿。銀鹿亦不必爲義僕第一，取以立名，不甚可解。殆以二字新穎，故探爲標目耳。殊無理也。所列自樂布以下凡七人，女奴十一人，頗多漏略。如蕭穎士僕，人人耳熟之事，而遺之不載，則無論他僻事也。其中有嘉穎裔孫續補一十六條，然雜列其間，不可分別。尤無義例。所載史漢後，劉武卽嘉穎家僕，徐永清卽鑽家僕，事皆不足傳，而躋之古人之列，亦不倫甚矣。

【孝友傳二十四卷】江蘇巡撫探進本 明郭凝之撰。凝之字正中，海寧人。天啓甲子舉人，官至竟東兵備副使。是書採摭商至元末孝義事蹟，按代編次，然體例猥雜殊甚。如君陳絕無事蹟，以成王孝友一言列之，猶有說也。顏子並不專以孝稱，而亦虛載其名。晉文公對秦使，乃舅犯之謀，而亦浪標厥目。至論語問孝四人，以子夏爲主，子游附傳，已屬妄分賓主。孟懿子孟武伯，亦與子游同附，則不知二人之孝，以何爲據矣。

【明孝友傳八卷】浙江巡撫探進本 明郭凝之撰。此書採摭明代之事，以續所作孝友傳。上自士大夫。

下迄沙彌乞何人各爲傳共四百二十九人。

【遜國忠記十八卷】浙江巡撫探進本

明周鍾撰。鍾字仲馭。金壇人。崇禎戊辰進士。官至刑部員外郎。

福王時爲馬士英阮大鍼所殺。事蹟附見明史。姜曰廣傳。是書統載建文死事諸臣。而以職官分類。體例小殊。然篤信從亡之事。於諸臣名姓。備錄無遺。又如錢士升表忠記。載建文潛出西華門。沿河得空舟。而此載舟子夢高皇帝命。贖舟以待。更神其說矣。

【古今宗藩懿行考十卷】內府藏本

舊本題曰潞王編。不著其名。按明史諸王年表。穆宗隆慶五年。封

第四子翊鏐爲潞王。萬歷四十六年。翊鏐庶子常務襲封。此書成於崇禎九年。則當爲常務所輯也。所採皆歷代宗臣之賢者。自周迄明。凡百餘人。各著事蹟梗概。加以評論。中間如劉歆依附王莽。傾覆宗邦。而得與其數。殊乖衰鍼之公。又曹彰司馬孚等。雖非無可節取。而儼然與周召並列。亦僣不於倫矣。

【明經濟名臣傳四卷】江西巡撫探進本

明賀中男撰。中男永新人。是編載明代名臣。自洪武迄萬歷

之季。凡文臣五十五人。武臣二十一人。據其子善來所述。凡例稱爲未竟之本。其挂漏猶爲有說。至於李東陽之固位取容。張孚敬桂萼之希旨求媚。其經濟安在。而濫列於名臣。不亦僥乎。

【宗聖譜十四卷】江蘇巡撫探進本

明鄒泉撰。泉字子靜。常熟人。是書分八目。曰孔聖譜。曰四配譜。曰

十哲譜。曰羣賢譜。曰理學譜。曰經儒譜。曰史氏譜。曰著作譜。蓋欲合儒林道學源流本末。彙爲一書。以便檢閱。而體例叢脞。編次多乖。如經儒譜內書傳列伏生。歐陽夏侯。不列孔安國。而別列安國於儒拾遺之內。史氏譜內列李廩。續通鑑長編。不列司馬光。資治通鑑。而別列通鑑於史拾遺之內。進退失倫。絕無義

理其著作譜雜錄書名皆取材於經籍考中又十不存一蓋隨意鈔撮以供里塾估舉之用雖以宗聖爲詞實兔園冊也

【辨隱錄四卷】浙江汪啟淑家藏本 明趙鳳翀撰鳳翀字文舉爵里未詳自序稱十載爲郎一麾出守蓋官至知府也此書爲歸田後所作列古人之隱居者分龍隱高隱知隱神隱石隱癡隱仕隱七門強生分別殊無義例高隱列張翥殆忘其屈節蔡京石隱列郭璞殆忘其見戮王敦癡隱以屈原雪菴和尙與焦光朱桃椎連名仕隱以胡廣譙周馮道與柳下惠同傳皆幾於黑白不分至李泌入龍隱張良又入神隱莊周入高隱列禦寇又入知隱亦不知其何以分優劣也

【陸氏世史鈔六卷】浙江巡撫採進本 明陸澹源撰澹源平湖人自稱陸贄二十九世孫是書採陸氏名見正史者自漢迄元得一百二十人各錄其本傳裒爲一編亦自誦清芬之意然氏族源流最爲叢雜唐人世傳譜牒以門第相高而白居易自述姓源且不免以蹇叔之子指爲出自莘勝況自宋以來此學不講支分派別尤莫能稽澹源是書既首列唐書世系表明吳郡之陸出自田齊爲媯姓之後又引王應麟姓氏急就篇註謂出自陸終又引陳留風俗傳謂出自陸渾之國是本原先已傳疑又稱唐陸鴻漸姓由卜筮北魏步陸孤氏亦複姓省文是末派猶難考信乃取上下數千年中陸姓之人不問異同聯爲一譜然則尼山殷後可與孔圍稱宗懿仲齊卿可與國僑合族此亦千古譜牒之通病矣

【衡門語語六卷】浙江總督採進本 明潘京南撰京南自號壽樸生新都人是編摘錄古今隱逸閒適之事分前後續別四集前集廣成子而下七十五人自上古逮魏後集孫登而下七十五人自晉逮元續

集伯成子高而下百五十人。別集則摭其議論。及所作詩賦。亦皇甫謐高士傳之支流。其曰晤語。則千載一堂之意云爾。

【楚寶四十五卷】湖南巡撫採進本。明周聖楷撰。聖楷字伯孔。湘潭人。是書編錄楚中人物名勝。分二十五門。曰大臣。曰名臣。曰大將。曰智謀。曰諫諍。曰文苑。曰良史。曰命使。曰典故。曰真儒。曰諸子。曰孝友。曰忠義。曰獨行。曰真隱。曰列女。曰方伎。曰異人。曰宦績。曰遷寓。曰水山。曰名祀。曰列仙。曰名釋。曰祖燈。悉錄史志原文。亦間有考證。前有總論四條。一曰定區域以尊王。二曰別人物以徵傳。三曰約論註以歸雅。四曰考遺勝以闕疑。高世泰序。稱其人物十九。名勝十一。古文十九。今文十一。大致以人物爲主。而稍以山水古蹟附之。既非傳記。又非輿圖。在地志之中。別爲一例。姑從其多者爲主。附之傳記類焉。

【道南錄五卷】江蘇巡撫採進本。不著撰人名氏。亦無序跋。道南書院在福州。疑閩人所爲也。其書節錄明道程子楊時羅從產李侗朱子言行。末附祠祀始末。道者公器。傳道者亦統爲天下萬世之計。不僅求爲一鄉一邑之榮。況五大儒事蹟著述。照耀古今。亦不復藉此以顯。是特夸耀桑梓。非爲表章道學也。所見亦云小矣。

【國朝紀略一卷】浙江巡撫採進本。不著撰人名氏。以書中所自敘考之。蓋郭姓。湘鄉人。前明崇禎丙子舉人。也是編紀明末楚中死節之士。前爲何騰蛟堵允錫章曠傅作霖四人遺事。各系以詩。蓋用靖康小雅之體。後附周亮張世英王士璞何應瑞李有斐五人小傳。允錫以病卒於軍。不得援死綏之義。士璞爲其弟士琳所構。死於囹圄。亦非亮等四人死於張獻忠者比。未免爲例不純也。

卷六十三

史部十九

傳記類存目五

【崇禎五十宰相傳一卷】浙江巡撫探送本 國朝曹溶撰。溶字潔躬，號秋嶽，秀水人。前明崇禎丁丑進士，官監察御史，入國朝官至戶部侍郎，出爲廣東布政使，左遷山西陽和道。此傳皆崇禎時入閣諸臣事蹟，凡六篇。前有年表一篇，明代自胡惟庸以後，不立丞相，然自後入閣辦事者，亦相沿以相國呼之。此書題曰宰相，從俗稱也。崇禎十六年間，輔臣至五十人，其行事皆見於明史，說者謂其輕進易退，不收實用。溶篇末總論，獨謂其私心朋比，門戶相承，邪正雖殊，植黨則一，斯誠探本之說矣。傳雖分列五十人，而所錄事實，皆取賢否懸殊，關係治亂之大者，其成基命以下十四人，但敘官闕，黃立極以下四人，亦極簡略。蓋以爲無關勸戒，不足書也。溶門人陶越，乃取陳盟所作崇禎內閣行略補之，非溶意矣。此書攜李詩系作崇禎五十輔臣傳五卷，其實爲傳六篇，加以年表一篇，非五卷也。所載行事，與明史詳略相參，亦可互資考證焉。

【五十輔臣編年錄殘本一卷】浙江吳玉璣家藏本 不著撰人名氏，版心有攜李曹氏倦圃藏書字，蓋

曹溶家舊本，疑溶嘗作崇禎五十輔臣傳，此其彙本之一冊爾。始於天啓七年八月，中間惟崇禎元年一月差詳。崇禎二年，則惟韓爌調停沈維炳，薛國觀申教任賈一事，而卷尾題曰五十輔臣編年錄，殆不可

曉書中文理斷續率不可讀。繕寫惡劣亦幾不成字。

【歷代循良錄一卷】山東巡撫探進本。國朝孫蕙撰。蕙字樹百。號秦巖。又號笠山。淄川人。順治辛丑進

士官。至給事中。是書彙歷代循良事蹟。惟載縣令。而不及他官。其意謂令與民最近也。自秦漢以迄近代。僅盈一卷。去取可謂謹嚴。然挂漏亦所不免。

【古人幾部六卷】兩江總督探進本。國朝陳允衡撰。允衡字伯璣。南昌人。是書所錄皆明哲保身之士。與急流勇退之人。允衡自序云。平湖陸叔度著。古人幾部。始管夷吾。終史天澤。凡八十一人。古之成大功。定大策者。咸在焉。而其人亦有功成而身死。名立而毀。至者。定是不變。無以語權。因更集古人。顏曰幾部。然其書首載堯舜。以堯之傳舜。舜之逃象。皆目爲知幾。亦淺之乎窺聖人矣。豈姑以寓防患之意。不規規於品題之當否耶。

【歷代黨鑑五卷】浙江汪啟淑家藏本。國朝徐賓撰。賓字用王。常熟人。是書蓋因明季朋黨之禍。爰採輯史傳。作爲此書。上自東漢黨錮。次及魏之曹爽。晉之賈充。唐之王伾。王叔文。牛僧孺。李德裕。宋之洛蜀。朔三黨。元祐黨籍。慶元僞學。以及明之東林。魏黨。靡不詳載。又採各家論朋黨之語。附之於後。而以范祖禹唐鑑終焉。卷首冠以東林黨籍論三篇。亦賓所自作也。

【孔庭神在錄八卷】江蘇巡撫探進本。國朝胡時忠撰。時忠原名時亨。字慎三。無錫人。崇禎丙子舉人。是錄以祀典爲主。故先列位次。而於聖賢諸儒。各爲著錄。其第八卷。則考證辨論之辭。凡十五篇。

【畿輔人物志二十卷】浙江吳玉璠家藏本。國朝孫承澤撰。承澤有尙書集解。已著錄。是編專志有明



一代畿輔人物。然如李東陽之類。究涉假借。不出地志之積習。又如成基命。無所瑕疵。亦實無所樹立。承澤以其子克鞏。方官大學士。而盛相推重。則亦非盡信史矣。

【四朝人物略六卷】副都御史黃登賢家藏本

國朝孫承澤撰。自漢至唐宋爲五卷。全襲名臣錄之文。

明一代總爲一卷。皆用劉孟雷所爲翊運碩輔名卿正學等傳爲之。蓋承澤所長。在於習掌故。精賞鑒。故所撰春明夢餘錄。庚子銷夏記諸書。皆考證詳明。而史筆敘述。則非其專門也。

【益智錄二十卷】副都御史黃登賢家藏本

國朝孫承澤撰。起周迄明。凡聖賢名人言行可錄者。詮次

爲二十卷。而載明人事居三之一。間有敘事之後。附以論斷者。承澤崇禎庚午鄉試出姚希孟之門。辛未會試出何如寵之門。故其附東林也甚力。是書爲萬歷天啓間諸人傳。尤詳。然承澤門戶深固。大抵以異同爲愛憎。以愛憎爲是非。不必盡協於公道也。

【顧氏譜系考一卷】兩江總督採進本

國朝顧炎武撰。炎武有左傳杜解補正。已著錄。是書於顧氏世

系考據最詳。然姓氏之書。最爲叢雜。自唐以後。譜學失傳。掇拾殘文。未必源流盡合。姑存其說可也。

【構李往哲續編一卷】浙江巡撫採進本

國朝項玉筭撰。玉筭字和父。秀水人。是書續成元佐之傳。而

作補萬歷以前元佐所未載者。又益以天啓崇禎兩朝。凡十二人。而以孝子魏學洵附於其父大中傳。每傳各系以論。與元佐例小異。

【金華徵獻略二十卷】浙江巡撫採進本

國朝王崇炳撰。崇炳字虎文。東陽人。嘗於蘭溪唐氏。輯其郡

人著述爲金華文略。此其所採金華先賢事蹟也。分十有二類。曰孝友。曰忠義。曰儒學。曰名臣。曰文學。曰

政績曰卓行曰貞烈曰仙釋曰方技曰來宦曰遊寓自元以前則本之史傳及吳師道敬鄉錄宋濂人物志自明以後則更蒐採諸書以補之然鄉曲之私所錄不免氾濫其序例謂事蹟或無可稱而列之名臣者乃序爵之義不知鄉閭著碩原不當以祿秩爲重輕若槩加採錄則是公卿表而非著舊傳矣

【聖學知統錄二卷】直隸總督採進本

國朝魏裔介撰裔介有孝經註義已著錄是錄凡載伏羲神農

黃帝堯舜禹皋陶湯伊尹萊朱文王太公望散宜生周公孔子顏子曾子子思孟子周子二程子張子朱子許衡薛瑄二十六人博徵經史各爲紀傳復引諸儒之說附於各條之下而衷以己說其自序謂見知聞知之統具載於此然惟聖知聖惟賢知賢惟接道統之傳者能知道統之所傳孟子末章惟孟子能言之耳奈何遽以自任乎

【聖學知統翼錄二卷】直隸總督採進本

國朝魏裔介撰裔介既作知統錄復作此錄以翼之自序謂

以之羽翼聖道鼓吹六經亦猶淮泗之歸於江海龜鼉之儕於岱宗也凡錄伯夷柳下惠董仲舒韓愈胡瑗邵雍楊時胡安國羅從彥李侗呂祖謙真德秀趙復金履祥劉因曹端胡居仁羅倫蔡清羅欽順顧憲成高攀龍二十二人其去取之故亦莫得而詳焉

【希賢錄五卷】直隸總督採進本

國朝朱顯祖撰顯祖號雪鴻江都人順治丙戌副榜貢生其書載自

周至明諸儒言行各繫以論斷其意蓋欲仿伊洛淵源錄然去取不可解退邵子司馬光於朱子後升張栻呂祖謙於范仲淹前未免輕於予奪其列明儒以薛曹邱胡爲冠配宋之周程張朱邱者邱濬也斯則更屬異聞矣

【洛學編四卷】浙江巡撫採進本 國朝湯斌撰。斌字孔伯，號潛菴，睢州人。順治己丑進士，官至工部尚書。諡文正。是書述中州學派，分爲二編。首列漢杜子春、鄭興、鄭衆、服虔、唐韓愈、宋穆修，謂之前編。次列二程子以下十三人，附錄二人。元許衡以下三人，附錄一人。明薛瑄以下二十人，附錄七人。謂之正編。各評其學問行誼。蓋雖以宋儒爲主，而不廢漢唐儒者之所長。後耿介作中州道學編，乃舉唐以前人，悉刪之。則純乎門戶之私，所見又與斌異矣。

【續表忠記八卷】副都御史黃登賢家藏本 國朝趙吉士撰。吉士字恆夫，號漸岸，又號寄園，休寧人。順治辛卯舉人，官至戶科給事中。是書記明萬曆以後忠義之士，以明錢士升有表忠記，記遼國諸臣，故此以續爲名。所載凡一百二十三人。然前所載皆死魏忠賢之禍者，後所載皆明末殉節者，而參雜以葉向高、顧憲成、趙南星、鄒元標、馮從吾諸傳，體例不純。蓋其時去明未遠，猶存標榜之風，不知諸人致命遂志，取義成仁，其事自足千古，正不必牽附東林，而後足以爲重也。

【天中景行集】無卷數 江蘇周厚堉家藏本 國朝邵燈撰。燈字無盡，一字薪傳，常熟人。順治壬辰進士，官至河南河道。是編乃燈康熙九年奉檄防河，因取中州名宦鄉賢，上自春秋，下訖宋元，彙爲一編，或全錄本傳，或摘鈔數事，無所考證，亦無所臧否。

【中州道學編二卷補編一卷】浙江巡撫採進本 國朝耿介編。介字介石，號逸菴，登封人。初名冲璧，讀北山移文，至耿介拔俗之句，遂更名。順治壬辰進士，官至直隸大名道。以湯斌薦，授詹事府少詹事。是編專載中州道學，自宋二程子至國朝陳榕等五十七人，人各有傳，傳後或附語錄及所著書，末附補編。

一卷。乃乾隆庚午。登封知縣晉江施奕簪所編。兼收漢杜子春以下傳經諸儒。介亦與焉。然道學儒林。自宋史分傳以後。格不相入久矣。介於漢儒宋儒門戶。判如冰炭。韓愈諸人。乃所特黜。非其偶漏。奕簪不自爲一書。而附之介書之後。非其志也。

【古懷錄八卷】江西巡撫採進本

國朝王士禛撰。士禛字貽上。號阮亭。又自號漁洋山人。山東新城人。順治乙未進士官至刑部尚書。諡文簡。士禛原名下一字。與世宗憲皇帝廟諱相同。故傳刻其書者。皆改爲士正。乾隆丁酉奉諭旨追賜今名。是編皆述上古至明林泉樂志之人。蓋皇甫謐高士傳之意。其自序稱取古詩良人惟古懷句爲名。案此句見文選古詩第十六首。李善註曰。良人念昔之歡愛。則所謂良人者。乃棄妻指其故夫。所謂惟者。思維也。古者舊時也。歡者。夫婦之私昵也。不識士禛何據。乃以爲高隱之目。無乃解爲與古爲徒之意耶。果若是。則誤之甚矣。

【大成通志十八卷】陝西巡撫採進本

國朝楊慶撰。慶有古韻叶音。已著錄。是書成於康熙己酉。摭拾歷代制度。不盡關於孔庭。其年表世家列傳。大抵摭拾舊文。第十七卷爲理齋說要。第十八卷爲理齋節要。乃慶講學之書。而綴於聖賢之後。總名曰大成通志。似亦未安也。

【續高士傳五卷】浙江鮑士恭家藏本

國朝高兆撰。兆字雲客。侯官人。王陳今世說曰。高雲客少遭喪。亂自江左還。舊鄉布衣蔬食。塊處蓬室中。採摭隱逸。輯爲續高士傳。鑒別精嚴。論者謂其才識不讓士安。卽此編也。據卷首陶澂序。稱其始晉皇甫士安。斷於有明之穆廟。中間千餘年。共得一百四十三人。微顯闡幽。循名責實。起辛丑八月。至壬寅二月。始告成。蓋創稿於順治十八年。歲事於康熙元年也。其去取頗

不苟。故陳日溶序稱其凡名入仕籍。後挂冠者。謫。遂溺於老佛之學者。黜。然宋种放隱節不終。反登簡牘。元褚伯秀實道士。所註莊子義海纂微。今尙著錄也。

【理學備考三十四卷】江四巡撫採進本。國朝范鄆鼎撰。鄆鼎字彪西。洪洞人。康熙丁未進士。以養親不仕。終於家。是編備列有明一代講學諸儒。初刻於康熙辛酉。卷一至卷六。撮取辛全理學名臣錄。卷七至卷十。撮取孫奇逢理學宗傳。十一卷至十六卷。乃鄆鼎所續補也。續刻於己巳。再續刻於甲戌。十七十八卷。撮取熊賜履學統。十九卷至二十九卷。撮取張夏維閩淵源錄。三十卷至三十四卷。撮取黃宗羲明儒學案。計所自作者。僅六卷而已。其說不出於一家。其文不出於一手。宜其體例之參差矣。

【勝朝彤史拾遺記六卷】浙江巡撫採進本。國朝毛奇齡撰。奇齡有仲氏易。已著錄。是書皆明一代后妃列傳。自稱初得其父所藏宮闈紀聞一卷。載事不確。文不雅馴。後預修明史。分撰天順成化宏治正德四朝后妃傳。因搜考史。闕略特甚。乃仍取外史所紀。與實錄參修。而撮其贋稿。合之宮闈紀聞。撰爲此書。凡六十五傳。其中如鄭金蓮王滿堂。於史例不得立傳。崇禎末宮人費氏青霞女子等。於史例當別入列女傳。卽是書以拾遺爲名。不得拘以史例。亦應隨事附錄。不得自爲一傳。雜於后妃中也。其敘述則頗有法。然大端已採入正史。此無庸復錄矣。

【留溪外傳十八卷】江蘇周厚培家藏本。

國朝陳鼎撰。鼎有東林列傳。已著錄。是書凡分十三部。曰忠

義。曰孝友。曰理學。曰隱逸。曰廉能。曰義俠。曰游藝。曰苦節。曰節烈。曰貞孝。曰闔閭。曰神仙。曰縉流。所紀皆明末國初之事。其間時節卓行。頗足以闡揚幽隱。然其事蹟。由於徵送。觀卷首徵事啓。末附載二行云。凡

有事實。可寄至江寧承恩寺前刻匠蔡丹敬家。或揚州新盛街估寶樓書坊轉付云云。則仍然徵選詩文。標榜聲氣之風。未可據爲實錄。如張潮諸人。生而立傳。殊非蓋棺論定之義。其間怪異諸事。尤近於小說家言。不足道也。

【明儒林錄十九卷】兩淮馬裕家藏本。國朝張恆撰。恆字北山。松江人。朱彝尊之中表也。而彝尊志在稽古。恆則志在講學。所見頗歧。是集紀明代兩浙諸儒言行。所載未爲詳備。而附採語錄之類。亦過於繁冗。

【雒閩源流錄十九卷】江蘇巡撫採進本。國朝張夏撰。夏有楊文靖年譜補遺。已著錄。是書取有明一代講學之儒。分別其門戶。成於康熙壬戌。大旨闡雒閩之緒。而力闢新會餘姚之說。自一卷至十三卷。列爲雒閩之學者。正宗十六人。羽翼三十九人。儒林一百九十二人。併合傳附傳者。共二百五十餘人。十四卷爲新會之學。十五卷爲餘姚之學。所列羽翼八人。儒林三十九人。而正宗則闕。十八十九二卷。謂之補編。所列僅儒林五十八人。併羽翼之名。亦不予之矣。自明以來。講學者。釀爲朋黨。百計相傾。王守仁作朱子晚年定論。程敏政作道一編。欲援朱子以附陸氏。論者譏其舞文。張烈作王學質疑。熊賜履作閑道錄。又詆斥陸王。幾不使居於人類。論者亦譏其好勝。雖各以衡道爲名。而本意所在。天下得而窺之也。夏此書以程朱之派爲主。而於陸氏之派。亦節取所長。以示不存門戶之見。用意較爲深密。然卷首稱明太祖以理學開國。諛頌幾四五百言。以爲直接堯舜禹湯文武之統。殊非篤論。亦非事實。其凡例稱人品自人品。學術自學術。如趙南星楊漣繆昌期李應昇諸人。可謂之忠臣。不可列之於儒林。立說尤僻。豈程朱之

傳惟教人作語錄乎。

【錫山宦賢考略三卷】江蘇周厚培家藏本

國朝張夏胡永禎同撰。永禎字鴻儀，與夏同里。是編取無

錫名宦鄉賢二祠，及崇正書院所祀諸先儒，起宋迄明，皆詳其仕履，撮其事實，彙爲一編。上卷名宦，中卷崇禎諸儒，下卷鄉賢。書成於康熙甲子。在雒閩源流錄後二年。

【吳越順存集三卷外集一卷】兩淮馬裕家藏本

國朝吳允嘉撰。允嘉字志上，錢塘人。是書輯吳越錢

氏誥冊逸事，併詳考其子孫之文學仕宦顯者，蒼萃成書。蓋允嘉本錢姓，吳越王之裔也。

【道南正學編三卷】浙江巡撫探進本

國朝錢肅潤撰。肅潤有尙書體要，已著錄。是書成於康熙辛未。

所錄皆從祀東林書院諸人，自序謂不拘世代，不較年數，不論地位，不限科目，率以入祠之先後爲次第。故元人列明人後焉。其末以國朝孫承澤王崇簡二人終。承澤傳首曰：崇禎辛未進士官至吏部侍郎，使不知承澤始末者，不將以爲明之吏部侍郎乎。

【又尙集二卷】江西巡撫探進本

國朝何屬乾撰。屬乾字不息，江西廣昌人。由副榜貢生，官永新縣訓

導。是書纂輯永新名宦鄉賢事蹟，以已入祀典者各撰小傳，自三國分疆迄國朝康熙中，分爲上下二卷。其傳末論斷多附見軼事，與傳意不相重複，頗得史記遺意云。

【聖宗集要八卷】兩江總督探進本

國朝費緯綯撰。緯綯字約齋，鄞縣人。是書上溯皇古，下迄有明，凡

大聖大賢及講學諸儒，輯爲一編。取大宗之義，故以聖宗爲名。然如聶豹之黨嚴嵩殺楊繼盛，具載於益智錄中，列於聖賢之大宗，固爲有忝。卽徐階之心術事業，亦未必足當此目。至於穆修傳後，盛推陳搏躋

之於儒宗。謂伏羲神農黃帝皆二百歲。顓頊舜禹皆百餘歲。伊尹百歲。文武九十餘歲。可以識修煉之道。在於凝道淡泊。栖志和平。時動靜以固元神。宜慈惠以培陰德。清心寡慾。以培養天年。又謂道家者流。施之於治。則結繩之治可復云云。古來有此道學乎。

【卓行錄四卷】浙江巡撫探進本

國朝黃容撰。容字敘九。吳江人。是書成於康熙庚辰。所錄多明末國

初之事。後有自序。稱集中體例。主於表彰潛德。蒐輯逸事。其事蹟赫赫在天壤。他書具載者。反不多錄。然而孫承宗之死節。史籍彰彰。似不在潛德之列。而龔佩潛女一條云。九龍龔佩潛。以進士遇國難。投秦淮以死。有才女能詩云云。此在佩潛爲卓行。其女能詩。未爲卓行也。

【荆門耆舊紀略三卷列女紀略一卷】浙江巡撫探進本

國朝胡作柄撰。作柄荆門人。始末未詳。荆門

舊有志。明季散佚。作柄於康熙戊戌己亥間。初爲耆舊一編。志其鄉之人物。續又以宋以來列女。別爲一編。附焉。兩編皆自爲之序。其於老萊子後。次以黃歇。但曰爲李園所制。不著所終。歇之怙權盜國。果可列鄉賢俎豆間乎。其論宋王大用死難一條。據土人祠廟。以辨宋史記其降元之誣。固善善從長之義。然無微不信也。

【學統五十六卷】湖北巡撫探進本

國朝熊賜履撰。賜履字敬修。孝感人。康熙戊戌進士。官至大學士。

是書以孔子顏子曾子子思孟子周子二程子朱子九人爲正統。以閔子以下至明羅欽順二十三人爲翼統。以冉伯牛以下至明高攀龍一百七十八人爲附統。以荀卿以下至王守仁七人爲雜統。以老莊楊墨告子及二氏之流爲異統。夫尙論古人。辨其行事之醇疵。立言之得失。俾後人知所法戒。足矣。必鋪鋪



銖銖較其品第而甲乙之。未免與班固古今人表同一愆謬。況薛瑄胡居仁羅欽順俱尊之稱字稱先生。而伯牛子路諸賢乃皆卑之而書名。軒輊之間不知何所確據。又苟況揚雄王通蘇軾均以難統而稱子。陸九淵陳獻章王守仁又以難統而書字。褒貶之間亦自亂其例也。

【道統錄二卷附錄一卷】江蘇巡撫探進本。國朝張伯行撰。伯行字孝先。儀封人。康熙乙丑進士。官至

禮部尚書。謚清恪。是書自序謂襲於故書肆中。購得道統傳一帙。乃仇熙所著。因更爲增輯。上卷載伏羲神農黃帝堯舜禹湯文武周公孔子及顏曾思孟。下卷載周程張朱。其附錄中則載皋陶稷契益伊尹萊朱傳說太公召公散宜生及楊時羅從彥李侗謝良佐尹焞。人各一傳。述其言行。而以總論冠於卷端。

【道南源委六卷】河南巡撫探進本。國朝張伯行編。是編本明朱衡道南源委錄舊本。重加考訂。首卷

自楊時至江杞三十六人。次卷自羅從彥至陳紹叔八十一人。三卷自朱子至陳總龜八十人。四卷自李東至劉季裴九十六人。外附朱子弟子張顯甫等十九人。又著述可考者李琪等五十九人。五卷自歐陽僥至黃三陽五十九人。六卷自林希元至李逢基四十五人。復以張書紳等五十一人有著述者類附焉。

【伊洛淵源續錄二十卷】兩江總督探進本。國朝張伯行撰。是編因明謝鐸伊洛淵源續錄採輯未備。

薛應旂考亭淵源錄去取未嚴。因重爲考訂。以補正二家之闕失。然書甫出。而譚旭謀道續錄又反覆千百言。糾其漏。胡寅真德秀矣。講學如聚訟。豈其然乎。有朱子之學識。而後可定程子門人之得失。此中進退。恐非後學所易言也。

【嘉禾徵獻錄四十六卷】兩淮馬裕家藏本。國朝盛楓撰。楓字丹山。秀水人。是書所紀皆明一代嘉興

人物冠以妃主一卷。後以職官分紀。凡京朝官二十二卷。外吏十八卷。世職及死事諸將三卷。附以儒學一卷。文苑一卷。其子孫不能自爲傳者。則以史例附其祖父之下。若無事蹟顯著者。則備列其官階遷除而止。若人非善類。如施鳳來之附魏忠賢。吳昌時之黨周延儒者。則僅於目中列其名。而特闕其傳。以示戒。如史仲彬之類。亦間附以辨證之語。其卜大同傳末。又附洪武三年給頒戶帖一道。以資考訂。敘述亦爲詳贍。惟其錄名微獻。而首冠以妃主。殊乖義例。又如趙文華傳。盛稱其平倭功績。又於其家祖父各爲立傳。盛加推挹。亦不免鄉曲之私也。

【人瑞錄一卷】新聖公孔昭燠家藏本 國朝孔尙任撰。尙任號東塘。又號云亭山人。曲阜人。官至戶部郎中。是書記康熙二十七年。天下奏報壽民。自七十歲至百歲以上者。統三十七萬有奇。以著太平生息之盛。

【修史試筆二卷】江西巡撫探進本 國朝藍鼎元撰。鼎元有平臺紀略。已著錄。是編凡爲傳三十六篇。起唐房杜。終五代王朴。各綴以論。前有雍正戊申衡山曠敏本序。謂鼎元欲修宋史。而以此試筆。先敘有唐名臣。擇其忠節經濟之炳著者。列爲傳云。

【道學淵源錄一卷】直隸總督探進本 國朝王植撰。植有四書參註。已著錄。是書取從祀孔廟先賢先儒條其事狀官爵。並考其從祀世代。大約襲闕里志諸書爲之前。有自序。於朱陸流派。爭之甚力。

【節婦傳十五卷】江西巡撫探進本 國朝楊錫絨撰。錫絨字方來。清江人。雍正丁未進士官。至漕運總督。證勤懇。是編蒐採近時節烈事蹟。各爲小傳。惟據其耳目所及。故未能賅備。又每得一人。卽爲續刊。故

印行之本卷帙多寡往往不同云。

【豐祀紀蹟十卷】福建巡撫採進本

國朝康偉然撰。偉然字中江，漳州人。由拔貢生官羅源縣教諭。遷興化府教授。是編取文廟崇祀先聖先賢各爲譜傳。後附以春秋祀典禮樂器圖。自明以來輯聖門事蹟者最多。此書成於雍正五年。正值釐正祀典之後。故所載位次一遵本朝定制。校他本爲有體例。然所輯事略實不出諸書之外。未能有所考訂也。

【關學編五卷】江蘇巡撫採進本

國朝王心敬撰。心敬有豐川易說。已著錄。初明馮從吾作關學編。心敬病其未備。乃採摭諸書補其闕略。以成此書。從吾原編始於孔門弟子秦祖。終於明代之士。心敬所續輯者。於秦祖之前。增伏羲秦伯仲。雍文王武王周公六人。於漢增董仲舒楊震二人。明代則增從吾至單允昌凡六人。又附以周傳誦黨還醇白希彩劉波王侶諸人。國朝惟李容一人。則心敬之師也。明世關西講學。其初皆本於薛瑄。王恕。又別立一宗。學者稱爲三原支派。大抵墨守主敬窮理之說。而崇尚氣節。不爲空談。黃宗羲所謂風土之厚。而加以以學問者。從吾所紀梗概已具。心敬所廣推本義。皇以下諸帝王。未免溯源太遠。又董仲舒本廣川人。心敬以其卒葬皆在關中。因引入之。亦未免郡縣志書牽合附會之習也。

【蜀碧四卷】江西巡撫採進本

國朝彭遵泗撰。遵泗字馨泉。丹稜人。乾隆丁巳進士。官翰林院編修。是書紀蜀亂始末。及一時死節士女。其曰蜀碧者。取萋宏之血。三年化碧意也。起明崇禎元年戊辰。至我朝康熙二年癸卯。末有附記。及楊展劉道貞鐵脚板余飛等傳。其書大旨以沈雲祚稱獻逆殘蜀。由風俗之

惡。故爲此書。備書死難者姓名。以雪斯恥。而體例冗雜。如載桐城二老事。與蜀中無關。又如賊夢梓潼神。以宗弟紅東來謁諸事。亦太涉神怪也。

【閩學志略十七卷】福建巡撫探進本

國朝李清馥撰。清馥有閩中理學淵源考。已著錄。是編取自唐

迄明閩中之有關講學者。人各係傳。以志其略。蓋仿湯斌洛學編之例。大旨以朱子爲宗。朱子以後。傳其教者皆錄之。朱子以前。則自歐陽詹以後。亦仿斌例爲前編。然隱逸之流。似不在講學之例。收之稍濫。且唐宋元共八卷。而明一代至九卷。其時代先後。頗多紊淆。似不及閩中理學淵源考也。

【太學典祀彙考十四卷】直隸總督探進本

國朝張璠撰。璠字玉衡。宛平人。官國子監典簿。是書自孔

子而下。四配十哲。以及先賢先儒。凡祀於太學者。悉裒其言行。各爲之傳。然意在務博。多失詳考。如子夏。易傳。子貢詩傳。皆後人僞作。而引作事實。概無辨正。又歷代祀典。如金石錄所載。後魏太和元年立孔子廟。延興四年。太上皇帝祭孔子文之類。皆佚不錄。元設管勾一官。見元文類。歐陽元序。準此書附註百石。史卒碑例。亦所當收。是亦不免於疎漏也。

【循良前傳約編四卷】江蘇巡撫探進本

國朝張先嶽撰。先嶽字北拱。晉江人。是書一名歷代名吏錄。

採諸史循吏傳。各以時代先後編次。亦有旁取於他書者。然爲數無幾也。其所論斷。亦罕新裁。

【學宮輯略六卷】河南巡撫探進本

國朝余丙撰。丙字敬捷。禹州人。是書於先師孔子。及從祀先賢先

儒。俱考其事蹟。及世系里居。編次成帙。其祀於崇聖祠者。皆併錄其言行。其改祀於鄉者。自鄭衆以下三人。罷祀者公伯寮以下十三人。亦皆附入焉。間加案語。以志從祀進退歲月。然敘述頗爲簡略。蓋四書人

物考之類也。

【吉州人文紀略二十六卷】江蘇巡撫採進本 國朝郭景昌撰。景昌字旭瑞，奉天人。是書仿莆陽文獻

志之例，取吉安人物各爲之傳。又以諸人撰著分類編次，故統名曰人文列傳。凡爲十三類：曰理學名臣，曰忠節名臣，曰經濟名臣，曰文學名臣，曰內閣輔臣，曰才力，曰孝義，曰死事，曰清正，曰儒行，曰隱逸，曰科名，曰列女。撰著凡爲十九類。曰詔，曰冊，曰制，曰策，曰表，曰狀，曰疏，曰議，曰論，曰序，曰記，曰檄，曰書，曰跋。曰傳，曰贊，曰墓志銘，墓表，曰祭文，曰歌賦頌說雜著。

【孝史十卷】兩江總督採進本 國朝錢尙衡撰。尙衡字雲林，烏程人。是書編次古人孝行，上自唐虞，下迄明季，以朝代先後爲次。其所採錄本之正史，及一統志爲多。其子鳳文復蒐訪稗官小說，續補成編。各傳之後，亦或附以論斷。其自序謂割股刲肝，臥冰埋兒之類，雖於不敢毀傷之義有乖，然愚孝之人忘身事親，又不忍使之泯沒，是尙屬原情之論。善善從長，至於建德農人以踐虎約而甘蹈亡身之危，尙衡稱爲守信達命，則所見太偏矣。

右傳記類總錄之屬二百九部二千三百四十八卷內六部無卷數皆附存目。

卷六十四

史部二十

傳記類存目六

【西征記一卷】浙江巡撫採遺本 宋盧襄撰。襄字贊元。觀其自序。蓋衢州人。此書載於錦繡萬花谷前集之末。不知何人鈔出別行。乃襄赴京春試時紀行之作。末題庚辰仲春日。案北宋凡三庚辰。吳自牧所作歷科狀元表。太宗太平興國五年庚辰。暨仁宗康定元年庚辰。皆不見有進士科。惟哲宗元符三年庚辰。有李釜榜進士。則是人應試。或在此年。所敘述皆無關考據。又雜載詩歌詞多鄙俚。頗近傳奇小說之流。雖出宋人。無可採錄也。

【乙巳泗州錄一卷】浙江巡撫採遺本 宋胡舜申撰。舜申績溪人。舜陟之兄。官至舒州通判。宣和乙巳。舜申在泗州。親見朱勳父子往來。及徽宗幸泗州事。因此錄紀載寥寥。無可採擇。

【己酉避亂錄一卷】浙江巡撫採遺本 宋胡舜申撰。建炎己酉。金兵攻平江。宣撫周望出走。舜申之兄舜陟時為參謀。舉家避難。舜申次為此錄。其言頗詆韓世忠。末復載世忠攜妓一事。似有宿憾之言。未必實錄。此書與乙巳泗州錄。王明清玉照新志。皆全載其文。蓋即後人於明清書內鈔出別行也。

【逢辰記一卷】水樂大典本 不著撰人名氏。宋史藝文志著錄。註云呂頤浩歷官次序。此書末有附記云。公平昔所為文及奏議。竝載之別集。此外又有公之勤王記及遺事可考。故為家傳以紀事。則此記乃頤浩後人所撰矣。

【勤王記一卷】水樂大典本 舊本題宋臧梓撰。梓里貫未詳。此書結銜題左宣教郎。荆湖南路安撫制置大使司幹辦公事。蓋作書時所居之官。其始末亦不可考矣。案原序稱紹興五年。史館修纂。建炎日歷。令勤王臣僚呂頤浩等。各錄建炎三年。金人攻泗州諸路勤王事蹟。梓因即頤浩所述。以成此書。則梓特

編次頤浩之文，非所自撰也。

【西征道里記一卷】永樂大典本 宋鄭剛中撰。剛中有周易窺餘，已著錄。是書乃剛中爲左宣教郎，試秘書少監，充樞密行府參謀時記行之作。前有自序，稱紹興己未，陝西初復，命簽書樞密樓公諭以朝廷安輯之意。某以秘書少監預參謀，所過道里集而記之。雖搜覽不能周盡，而耳目所際，亦可以驗遺蹤而知往古。與夫兵火凋落之後，人事興衰，物情向背，時有可得而窺者。同行者右通直郎尚書員外李若虛等九十五人云。

【烏臺詩案一卷】編修汪如藻家藏本 舊本題宋朋九萬編，卽蘇軾御史臺獄詞也。案周必大二老堂詩話曰：元豐己未，東坡坐作詩訕謗，追赴御史獄。當時所供詩案，今已印行，所謂烏臺詩案是也。靖康丁未歲，臺吏隨駕挈真案至維揚，張全真參政時爲中丞，南渡取而藏之。後張丞相德遠爲全真作墓誌，諸子以其半遺德遠充潤筆，其半猶在全真家。余嘗借觀，皆坡親筆，凡有塗改，卽押字於下，而用臺印云云。是必大親見真蹟，然不言與刊版有異同。陳振孫書錄解題載是書十三卷，胡仔漁隱叢話所錄則三卷有奇，皆與此本不合。仔稱其父舜陟靖康間嘗爲臺端，臺中子瞻詩案具在，因錄得其本。視近時所刊行烏臺詩話爲尤詳。今節入叢話，是仔書所載已爲節本。今考叢話諸條，不過較此本少一二事，其餘則條目皆同。則未必仔所見本。振孫稱九萬錄東坡下御史獄公案，附以初舉發章疏及謫官後表章書啓詩詞。此本但冠以章疏，而無謫官後表章書啓詩詞，則亦非振孫所見本。或後人摭拾仔之所錄，稍傳益之，追題朋九萬名，以合於振孫之所錄，非九萬本書歟。

【客杭日記一卷】光祿寺卿陸錫熊家藏本 元郭昇撰。昇字天錫，號雲山，京口人。是編乃其所作日記。

原本共四冊，真蹟在揚州程氏家。雍正乙巳，厲鶚遊揚州，得見之。鶚，杭人也。因手錄其中客杭一冊以歸。其書自至大戊申九月初一日，至次年二月初九日，逐日瑣記交遊聞見，中頗記請託吏胥之事。蓋昇於江浙行省，求充學正，山長時作也。鶚稱其所記白塔以進士題名碑爲基，銅鐘有淳熙改元會觀篆銘，爲他書所未載。而寺壁一詩，與程史所記康與之題徵宗畫扇詩，亦可參考異同云。

【使西域記一卷】劉修程晉芳家藏本 明陳誠撰。誠，吉水人。洪武甲戌進士，永樂中官吏部員外郎，誠嘗副中使李達使西域諸國，所歷哈烈、撒馬兒罕等凡十七國，述其山川風俗物產，撰成此記。永樂十一年返命，上之。明史藝文志載有陳誠西域行程記，卽此書也。末有秀水沈德符跋，其所載音譯，既多譌舛，且所歷之地，不過涉嘉峪關外一、二千里而止，見聞未廣，大都傳述失真，不足徵信。

【使交錄十八卷】浙江范懋柱家天一閣藏本 明錢溥撰。溥，字原溥，華亭人。正統己未進士，官至南京吏部尚書。諡文通。是書乃其天順六年爲翰林院侍讀學士時，出使安南所作，多載贈答詩文，而其山川形勢、土俗人情，乃略而不詳。

【東祀錄一卷】兩淮馬裕家藏本 明李東陽撰。東陽有燕對錄，已著錄。此錄乃宏治十七年重建闕里廟成，東陽奉使往祭，哀其途中所作記序銘文奏疏詩章等篇，共爲一編，而冠以敕文祝詞，又以記行志附於後，已載懷麓堂集中。此其別行之本也。

【七人聯句詩記一卷】江蘇巡撫採進本 明楊循吉撰。循吉有蘇州府纂修識略，已著錄。是編乃循吉



與王仁甫徐寬陳章王弼侯直趙寬六人會飲聯句因成是記後列六人小傳而以自撰小傳附其後復以會中盛事系之卷末蓋偶然寄興作也所載勝事以六官一隱者爲大奇亦未能免俗矣

【歸田雜識二卷】

兩江總督探進本

明毛紀撰紀有密勿稿已著錄紀於成化丁未通籍嘉靖甲申賜

休自以位登台輔全節完名製爲四朝恩遇圖一册凡十有六幀每幀皆先敍作圖始末而以制詞敕旨具錄左方又闢尋樂軒與二三故老立忘形會軒有記會有約有啓與恩遇圖并刊之分爲上下二卷總題此名云

【歸閒述夢一卷】

浙江范懋柱家天一閣藏本

明趙璜撰璜字廷實號西峯安福人宏治庚戌進士官

至工部尚書諡莊敏事蹟具明史本傳是書追述其平生居官事蹟卷首載自序一篇詩數首詞皆朴俚蓋亦家傳之類特出於自作耳璜本名臣其所述核以本傳不甚相遠猶非粉飾失真者比然其大端已具於史矣

【淮封日記一卷】

江蘇巡撫探進本

明陸深撰深有南巡日錄已著錄是編乃其正德七年以編修充

冊封淮府副使途中所記其紀程至蘇州而止不言所封者爲何人據深子楫所爲年譜乃封淮王於饒州而明史諸王世表淮定王祐棨宏治十八年已襲封至嘉靖三年卒不應正德中始行冊禮與深年譜不同莫能詳也記中錄馬中錫撫賊事較史所載尤備可旁資參考云

【南遷日記一卷】

江蘇巡撫探進本

明陸深撰嘉靖中深以祭酒侍經筵因爭閣臣改竄講章謫延平

府同知是編紀其南行道路所經以舟中日讀漢書故評史之語亦雜載其間

【使西日記一卷】浙江范懋柱家天一閣藏本。明都穆撰。穆有壬午功臣爵賞錄已著錄。穆於正德八年奉使冊封慶藩壽陽王妃。自京師至寧夏。因記其道路所經。江南通志稱其奉使秦中。訪其靈勝形勢。故宮遺壤。作西使記。卽此書也。於碑碣古蹟。載之頗詳。然大抵多據見聞。罕所考證。時雜齊東之語。如趙州石橋。稱張果騎驢處。獲嘉故地。稱妲己梳妝臺。皆可笑噓。唯辨黃梁夢事爲誤傳。呂洞賓頗爲典核。所記石龍渦。金崇慶二年。靜難軍節度判官張璋詩。亦爲志金石者所未及云。

【斷碑集一卷】編修汪如藻家藏本。明方豪撰。豪字思道。開化人。正德戊辰進士。官至湖廣按察司副使。明史文苑傳附載鄭善夫傳中。此其知沙河縣事時。案明史載豪由崑山縣知縣遷刑部主事。不言嘗知沙河縣。蓋偶然失載。重立顏真卿所書宋璟神道碑。而記其始末者。是碑在沙河食膳鋪。宋崇寧中有編修國史會要所檢閱文字范致君者。別書一碑。易之。而舊碑遂不顯。正德中。豪始求得原石。已斷爲二。乃錮以鐵。而復建之。併哀一時題咏。及案牘之文。以成是集。編次冗瑣。不出地志之陋體。惟其所載真卿之文。與世所傳魯公集頗有異同。如集本云嘗夢大鳥銜書。吐口中而咽之。遂來而上。石本吐作吐。來作乘。集本云襟懷益爽。石本懷作靈。集本云年十六七時。或讀易。曠時不精。石本於六字之下。讀字上。惟缺二字。集本云有司特聞。石本特作時。集本云異而召還。石本異字上多一后字。集本云吾比欲優游自免。石本自免作鄉里。集本云不宜與執政通同。石本通同作通問。集本云元宗將幸西蜀。石本作中宗將幸西京。集本云又復遷相州。石本無復字。集本云東宮有大功宗廟社稷主也。石本作春宮有大功。主安得異議。集本云無敢不葭。石本葭作畏。集本云變以陶瓦。石本陶瓦作陶旌。集本云燕國公張說者。石本

無者字。集本云尋入爲洛州長史。石本作又爲洛州刺史。集本云思勛以將軍貴。幸泣訴於帝。石本幸作達。訴作辭。集本云改號侍中。石本作復兼侍中。集本云明年駕幸洛陽。石本洛陽作東都。集本云馳道險隘。行不得前。石本作馳道隘。稽車騎不得前。集本云必若致罪二臣。石本無必字。集本云以臣言免之。石本無言字。集本云上嘉而從之。石本上作遂。集本云母寵子愛。石本愛作異。集本云恐非正家之道。王化所不宜。石本無不字。集本云上藥異殊。石本作殊異。集本云躡公而歿。石本躡作偃。集本云河西節度行軍司馬。石本河西作河南。集本云忠孝之盛。人倫之綱。石本作人倫紀綱。集本云功成生讓。事軼屠羊。石本生作宰。集本云略無交言。石本略作路。集本云謚論泱泱。石本謚論作右授。一篇之中。舛異者凡二十八處。皆足以訂傳寫之誤。故其書雖不足存。而一節之長。特爲附著於此。以資考證焉。

【東觀錄一卷】兩江總督採進本

明舒芬撰。芬有周易箋。已著錄。此其所著梓溪內集之一也。芬於嘉

靖二年被召復官。道出濟寧。謁闕里孔林。修釋菜禮。因錄所撰謁廟記。及闕里形勝圖。夫子宮牆圖。及釋菜禮儀。士相見禮儀。并附問答五章。與伍餘福聯句三十韻。彙爲一帙。

【漢程記一卷】兩淮鹽政採進本

明楊慎撰。慎有檀弓叢訓。已著錄。此編乃其曠戍永昌時紀程之作。

其中惟記崇寧寺僧滿空遺像。記段思平遺蹟。記叫狗山故事諸條。可備異聞。辨晃州非夜郎一條。可資考證。其餘不過誌山川。表里俗。採風謠而已。末有附錄一篇。則又慎得於醫士張姓。以補此書所未及者云。

【却金傳一卷】兩淮鹽政採進本

明王世懋撰。世懋字敬美。太倉人。世貞弟也。嘉靖己未進士。官至太

常寺少卿。明史文苑傳附見其兄世貞傳中。是編乃其官福建提學副使時。值參政王懋德病革。同僚饋金贈之。懋德堅不受。及懋德卒。同官又括六白金。遣使渡海致於家。其父良弼亦堅不受。世懋高其清節。爲敍始末。作此傳。又以同時士大夫歌咏附之。蓋意以風示貪吏也。懋德瓊州文昌人。隆慶戊辰。由南京刑部郎中。出守金華。擢江西按察司副使。遷福建布政使。參政所至皆以廉著云。

【南內記一卷】浙江范懋柱家天一閣藏本。不著撰人名氏。南內卽明英宗所居之南城。復辟後增置殿宇皆極華麗。此記乃嘉靖庚子所作。敍列規制頗備。與彭時可齋筆記。朱國禎湧幢小品。所載互有詳略。書末自稱韋布之士。蓋以布衣遊京師。從太常卿李開先等人觀而私錄之者。朱彝尊曰。下舊聞失採。殆偶未見也。

【奇遊漫記四卷】浙江汪啓淑家藏本。明董傳策撰。傳策有奏疏輯略。已著錄。此書之作。則其疏劾嚴嵩爲所構陷。謫戍南寧時也。一卷曰出戍道經。二卷曰楚南結纓。乃自京赴粵經行之地。三卷曰粵徵征次。四卷曰行役載途。則在粵時所遊歷。其稱奇遊者。蓋取蘇軾謫儋身渡海詩。老死南荒吾不恨。茲遊奇絕冠平生語也。未附方瑜南寧青山記。吳時來混混亭記。陳大綸洞虛亭記。三者亦爲其在粵所居也。

【西邊注一卷】兩淮鹽政採進本。明張鳴鳳撰。鳴鳳字羽王。豐城人。嘉靖壬子舉人。官桂林府通判。此編乃鳴鳳謫官利州時。自京赴蜀。復自蜀還京。記其道路所見名勝古蹟。於碑刻多載全文。頗裨考證。前有自序。後有其子揆跋。稱其在道不挈書自隨。但直寫所記憶。故徵引亦多抵牾。如以良鄉料石岡爲遼石岡之類是也。

【歷仕錄一卷】山東巡撫探蓮本 明王之垣撰。之垣號見峯，山東新城人。嘉靖壬戌進士。是編自記其歷官行事。自荊州府推官，歷御史給事中，太僕寺少卿，鴻臚卿，順天府尹，湖廣巡撫，至戶部左侍郎止。後附錄二條，又紀友紀夢紀異各一條。之垣即劾誅何心隱者。是編詳紀其事。萬曆中御史趙崇善論其殺心隱爲媚張居正，故其曾孫壬禎雜著中屢辨之。是編之跋亦惟爭此事云。

【黃梁遺蹟志一卷】兩淮馬裕家藏本 明楊四知撰。據太學題名碑，明有兩楊四知。其一萬曆甲戌進士，祥符人。其一崇禎戊辰進士，六安人。此書題巡按直隸御史開封楊四知。則萬曆中人也。黃梁遺蹟已詳唐沈既濟枕中記。四知復增以明人序記數篇。元明詩數十首。次成是書。殊寥寥無可採錄。蓋當時書帙本耳。

【恩命世錄十卷】浙江巡撫探蓮本 明張國祥編。國祥於萬歷丁丑襲爵爲五十代天師。因彙輯明太祖以來至神宗二十五年誥勅，以時代次序彙爲此書。而以四十二代天師勸進太祖箋附焉。蓋其家乘也。

【饑民圖說一卷】江西巡撫探蓮本 明楊東明撰。東明有青瑣齋言，已著錄。是編乃萬曆中東明官刑

科右給事中時所上。明史王紀傳稱東明上河南饑民圖，卽指此也。凡十四圖。前三圖備繪流民之狀。各繫以說，皆以俚語紀實事。蓋取其易明。末一圖乃東明拜疏之像。疑爲其後人所加。然圖末亦有一跋，稱這望闕叩頭的，就是刑科右給事中。小臣楊東明云云。則亦原本所有。殆以神宗宴安深宮，無由知外廷之迫切，故併繪此窘急入告之形歟。首冠以奏疏批答，及戶部議賑疏，併兩宮出內帑，百官捐俸之諭。

蓋是時神宗猶未全不事事也。此圖本以告君，原不必鈔版行世。涉於居功近名，觀卷末有男春育春融刊，及六世孫榴重刊字，知其子孫表章先人，非東明所自爲矣。

【視履類編二卷】浙江巡撫採進本。明李同芳撰。同芳字濟美，號晴原，崑山人。萬歷庚辰進士，官至山

東巡撫。是編自錄其生平善蹟，凡四十門，皆以佳名標目。自古以來，自作傳者有之，大抵敘述閱歷始末耳。至於著一書以自譽，則自有文籍，未之前聞也。

【宮省賢聲錄四卷】兩淮馬醫家藏本。明高曰化撰。曰化澄海人。萬歷中，官楚府右長史。是書以楚府

承奉岐陽郭倫事。楚王華奎佐理有功，因紀其前後乞休挽留之事。凡啓請文牒及時人稱頌之作，竝錄之。華奎以非楚恭王子爲宗人所訐，郭正域力主其事，內外交訁者數年始定。其真僞迄不能明，是書體例猥雜，所言倫佐理之功，亦未可盡信也。

【繡斧西征錄一卷】兩江總督採進本。明何鏞編。鏞秦興人。萬歷戊子舉人，是編載其祖何棨，正德間

以御史監軍征蜀寇鄒本恕、藍廷瑞之事。所錄皆序記贈詠之類。開卷卽題第十二卷第二十二頁，其標目則題秦興何氏家乘。中間又題曰西征捷音、西征圖詠，名目紛然。蓋本刻於家乘中，此乃拆出半卷別行者耳。

【禮白岳記一卷】禮部尙書曹秀先家藏本。明李日華撰。日華有梅墟先生別錄，已著錄。是書自紀其

萬歷庚戌禮神白岳之事。卷末又題曰篷櫺夜話。殆是書有二名耶。因樹屋書影曰：嘗見攜李李君實所爲禮白岳記，分視之各爲一則，合視之共爲一記。而詩卽連綴於中，分視之則詩，合視之詩亦記也。詩文

照映使山水神情無所遁於其間。真是合作。今人爲遊記者。意在謀篇。終難逐境。章法固自貫串。境地終未分明。且記自記。詩自詩。使讀者因記以憶詩。持詩以尋記。筆墨間隔。神情不屬。不數行。欠伸欲臥矣。故予以爲李公之記。可爲今人法也。云云。其推挹甚至。然終不出萬歷後纖巧之格。所謂才士之文。非作者之文也。

【墨召錄一卷】禮部尙書曹芳先家藏本。明李日華撰。自記其天啓乙丑召爲尙寶司司丞。赴京途中所經。始二月二十四日。終四月十五日。略仿吳船錄入蜀記之例。而寥寥無所記載。

【兩宮鼎建記二卷】編修程晉芳家藏本。明賀仲軾撰。仲軾字敬養。獲嘉人。萬歷庚戌進士。初萬歷二十四年。建乾清坤寧兩宮。仲軾父工部營繕司郎中賀盛瑞董役。後京察。坐冒銷工料罷官。仲軾因詳述其綜覈節省之數。作此書以鳴父冤。下卷並附以歷年所修諸工。末錄盛瑞京察辨冤疏。陳繼儒書刻入普祕笈中。改題曰冬官記事。而佚其辨冤疏一篇。此本爲朱彝尊曝書亭所鈔。猶完軾也。

【北行日譜一卷】兩淮鹽政探進本。明朱祖文撰。祖文字完夫。自號三復居士。長洲人。都督先之孫。少負氣節。與周順昌善。順昌以閹禍被逮。祖文間行詣都。爲納餽粥湯藥。及微賊令急。又爲之奔走稱貸。順昌輟歸。祖文哀痛發病死。後人以配食順昌祠。明史亦附載順昌傳中。此書乃其北行時所手記。其子壽陽所刻也。

【鑿勞錄一卷】山西巡撫探進本。明孫傳庭撰。傳庭字伯雅。小說或書其名爲傳庭。字之誤也。代州鎮武衛人。萬歷己未進士。官至兵部尙書。督師征流寇。沒於柿園之戰。事蹟具明史本傳。傳庭自崇禎九年

三月受命撫秦。至十一年十二月。其間攘寇清屯。自以爲所有勞績。無不仰遵帝鑒。隨時紀錄。積以成帙。因題曰鑿勞錄。卷前後俱有傳庭自識語。知當時業經付梓。今惟存鈔本耳。傳庭以功高叢忌。數語爲樞部督過。雖朝命賜褒。廢格不行。卒以蜚語被逮。觀於是編。可以見明政之不綱矣。

【定變錄六卷】浙江鄭大節家藏本。明許徽編。凡六種。皆副都御史銅梁張佳允事蹟也。滑縣擒盜記。

一卷。黎陽盧柎撰。靖皖紀事一卷。雲間莫如忠撰。宣撫降詞記一卷。太原王道行撰。定浙二亂志一卷。吳郡王世貞撰。浙鎮民變傳一卷。姑蘇錢有威撰。浙鎮兵變始末一卷。山陰鄭舜民撰。其中關於浙江者三。徽浙人也。故序而彙梓焉。

【南征紀略二卷】編修勵守謙家藏本。國朝孫廷銓撰。廷銓字伯度。又字次道。益都人。前明崇禎庚辰進士。入國朝官至大學士。諡文定。順治辛卯。廷銓奉使祭告禹陵及南海。此乃其紀程之書。上卷自出都至杭州。下卷自杭州至會稽。迄南祀畢而止。其間遊覽古蹟。多因以追論史事。同時酬贈諸詩。亦竝載其間。

【李贄一卷】兩江總督探遜本。國朝胡文學撰。文學有疏棄。已著錄。是編乃其爲真定推官日。自敘其政績十八事。推官稱司李。故題曰李贄。每事多先舉古人遺蹟一二條。而後自敘。使若先後媲美者。縱言不盡誣。亦頗嫌於自譽也。

【蜀道驛程記二卷】內府藏本。國朝王士禎撰。士禎有古懽錄。已著錄。康熙壬子。士禎爲四川鄉試正考官。記其來往所經。上卷自京至成都。下卷自成都至河南新鄉縣止。蓋士禎是年於新鄉聞訃旋里。未



及還京故也。中多辨證古事，較士禎他行記頗爲精核。蓋他行記一時筆錄，此則越二十年，至康熙辛未始補成之，檢閱修改，歷時既久，考訂自爲詳密耳。

【南來志一卷】內府藏本 國朝王士禎撰。是編乃康熙甲子，士禎官少詹事時，奉使祭告南海，記其驛程所經，全仿范成大吳船錄體，所載自京師至廣州而止，故曰南來。

【北歸志一卷】內府藏本 國朝王士禎撰。是書乃士禎於康熙乙丑二月至廣州，四月初一日始還，記其歸途所經，至六月十六日至其家新城而止。是時其父與勳猶在，以便途歸省也。所記山水名勝，較南來志爲詳，蓋使事已竣，沿途得以遊覽云。

【秦蜀驛程後記二卷】內府藏本 國朝王士禎撰。康熙丙子，士禎以戶部左侍郎奉使祭告西岳，西鎮江濱，續記其往返所經，爲此書。上卷自京至華陰，迂道至汧陽吳山，所謂西鎮也。由汧陽乃至成都，下卷自成都至其家新城止。

【粵遊日記一卷】山東巡撫採進本 國朝王鉞撰。鉞號任菴，諸城人。順治己亥進士，官廣東西寧縣知縣。是編爲其世德堂遺書之第二種，記其自家赴西寧任時途中所經，始於康熙己酉正月二十四日，終於四月初八日，仿陸游入蜀記之體。案日記載敘述頗簡潔而無所考證。

【使琉球記一卷】大學士英廉驛進本 國朝張學禮撰。學禮字立庵，鑲藍旗漢軍，官至廣西道監察御

史。是編乃康熙元年，學禮以兵科副理事官與行人司行人王垓奉使冊封琉球國王時所記。前敘請封遣使始末，及往來道路之險，後爲中山紀略，則載其土風也。時琉球國王尙賈繼，故明勅印，舉國內附，故

學禮等有是役。蓋國家遣使東瀛。此爲始事云。

【治禾紀略五卷】內府藏本。國朝盧崇輿撰。崇輿字斗瞻。廣寧人。康熙二年。官嘉興府知府。尋遷台州。巡道。因輯其在郡文移條約讞語。及禾民籲留狀牒。合爲此編。

【粵西偶記一卷】大學士英廉撰。進本。國朝陸祚蕃撰。祚蕃字武園。平湖人。康熙癸丑進士。官至貴州貴東道。是編多述其督學廣西時。道路險阻之苦。及爲守土有司所不禮事。大抵皆瑣屑細故。不足紀載者也。

【海岱日記一卷】直隸總督探進本。國朝張榕端撰。榕端字樸園。磁州人。康熙丙辰進士。官至內閣學士兼禮部侍郎。是編乃康熙丙子。榕端奉命祭告所作。以是年正月出都。登泰山。歷東鎮。沂山。東海。往返凡四閱月。逐日記其道路所見。附以詩歌。於山川古蹟。無所考證。而工於點綴景物。敍致時有可觀。其詩則已列入寶齋堂集。此爲複出矣。

【何御史孝子祠主復位錄一卷】浙江巡撫探進本。國朝毛奇齡撰。奇齡有仲氏易。已著錄。初蘆山有德惠祠。祀宋縣令楊時。以報開湘湖之功。明尙書魏驥。以修築有勞。亦附祀於祠。後御史何舜賓。以清釐侵佔被禍。其子競殺身以復讎。亦竝得附祀。歲久祠圯。併僑祀於門廡下。迨修祠之後。楊魏二主入祠。而何氏父子主未入。奇齡建議復舊章。魏氏子孫遂與奇齡互愬於官。此其案牘訟牒。奇齡錄而存之者也。

【漢行日記二卷】通行本。國朝李澄中撰。澄中字渭清。號漁村。又號雷田。諸城人。原籍成都。康熙己未。召試博學鴻詞。官至翰林院侍讀。是編乃康熙庚午。澄中典試雲南時。途中所記。凡八十有四日。於山川

風土古蹟故實無不詳載而考證之處差少殆行篋無書之故耶。

【塞程別紀一卷】通行本 國朝余燾撰。燾字同野，山陰人。其書記自京出古北口，至喀爾倫，一千五百

餘里。其時道路初開，未能有所考證，僅述風土氣候、山川草木之屬而已。

【塞北小鈔一卷】大學士英廉撰。國朝高士奇撰。士奇有春秋地名考略，已著錄。是書乃康熙癸

亥六月癸未，士奇扈從聖駕北巡，會士奇遘疾，行至鞍匠屯而返，記其途中恩遇及往來所經，以成是編。

自鞍匠屯以後，駐蹕之地，仍案日恭載。至閏六月丁酉回鑾，宣示塞外所得盤羊、夜光木諸事，亦竝錄焉。

自序稱奉職七年，巡幸所至，各有紀錄。次第成編，而上所諮詢，以及恩遇之隆，則慎而不書。偶檢明金幼

孜北征錄，見其凡有賜予，纖悉必載，亦不忘君恩之意。故是編載錫資顧問，比他記特爲詳悉。至所考塞

外古蹟，以今核之，多不甚確。如以喇嘛洞爲臥如來館之類，尤涉附會。蓋身所未經，而僅據明以前人之

典籍，宜其依稀影響爾。

【瀟遊記一卷附記一卷】兵部侍郎紀昀家藏本 國朝畢日溥撰。日溥字秋岐，益都人。康熙中，由貢生

官任縣知縣，是編乃日溥父忠谷官雲南布政司參議，日溥省親時所作。案日記載道路見聞及旅中雜

事，自三月十六日起，至十月十一日止，而序文及卷首俱不詳其爲何年。殊嫌疎漏。考日溥所作蒼洱小

記，有孫寶文題詞，其序稱丙子臘日，日溥邀飲，欲讀瀟記云云，則作於康熙丙子以前也。其附記一卷，則

途中所見土風，不可分繫某日者，故總錄於末云。

【漢行紀程一卷續鈔一卷東還紀程一卷續鈔一卷】大學士英廉撰。國朝許纘曾撰。纘曾字孝

修號鶴沙。華亭人。順治己丑進士。官至雲南按察使。漢行紀程。其赴雲南時所作。東還紀程。則自雲南歸途所作。皆述所見山川古蹟物產土風。大抵志乘所有也。

【南征紀程一卷】編修勳守家藏本。國朝黃叔瓚撰。叔瓚號玉圃。大興人。康熙己丑進士。官至常鎮揚通道。是編乃其爲監察御史時。巡視臺灣。自京師至閩所記。始於康熙後壬寅正月。而迄於是年六月。分日記載。

【鹿洲公案二卷】江四德撫探進本。國朝藍鼎元撰。鼎元有平臺紀略。已著錄。此其知普寧縣時所識諸案。自敘其推鞠始末。爲二十四篇。

【念貽賸紀一卷】傳講劉亨地家藏本。國朝周宜智編。宜智自號鏡亭老人。長沙人。初張獻忠躡湖廣時。宜智曾祖繼聖。聚鄉勇自守。獻忠招授僞官。繼聖不從。劫繫其母馬氏。妻吳氏。及其弟繼珩。妻陳氏。繼隨妻項氏。以脅之。馬氏及三婦皆罵賊死。繼聖亦被斷腕。後潛逃。以免。卒伺隙破賊。復讐湖廣總督何騰蛟。上其功。授教授。事載湖廣通志中。乾隆壬午。宜智哀其行狀墓銘之類。共爲一編。而以繼聖遺詩十二首附焉。

【東遊紀略二卷】馮璣寺少卿曹學閔家藏本。國朝張體乾撰。體乾字確齋。浮山人。官刑部郎中。是編乃其家居時。自山西河南東游泰山。往來紀行之作。逐日記載。見聞於古蹟。頗有考訂。途中吟詠二百餘首。亦卽附於逐日之後。其詩規仿白陸。時亦具體。

右傳記類。雜錄之屬。五十八部。一百一十二卷。皆附存目。

【安祿山事蹟三卷】

兩淮鹽政採進本

唐姚汝能撰。汝能始末未詳。陳振孫書錄解題稱其官華陰縣尉。未詳里居。則宋時已無可考矣。是書上卷序祿山始生。至元宗寵遇。起長安三年。盡天寶十二載事。中

卷序天寶十三四載。祿山搆亂事。下卷序祿山僭號被殺。竝安慶緒史思明史朝義事。下盡寶應元年。記述頗詳。世所傳祿山櫻桃詩。卽出此書。葉夢得避暑錄話常摭以爲笑。其瑣雜可知矣。

【張邦昌事略一卷】

編修程晉芳家藏本

舊本題宋王稱撰。核其文卽東都事略僭傳也。摘其一卷別立名目。又改王僞爲王稱。可謂愈僞愈拙。曹溶收之學海類編。蓋偶未考也。

【僞豫傳一卷】

兩淮鹽政採進本

宋楊克弼撰。述劉豫降金僭號始末。其序稱以豫逆臣。不當稱僞齊。故削其國號而名稱之。以示貶也。傳中載豫阜昌八年。遣宜義郎楊克弼乞師大金。克弼他辭。乃改差韓

元美。是克弼亦嘗仕豫。豫廢後乃復歸宋耳。陳振孫書錄解題作逆臣劉豫傳。楊堯弼楊載等撰。與此本不同。克堯字形相近。未知孰是也。

【徐海本末一卷】

戶部尙書王際華家藏本

明茅坤撰。坤字順甫。歸安人。嘉靖戊戌進士。官至大名兵備副使。事蹟具明史文苑傳。坤好談兵。罷官後值倭事方急。嘗爲胡宗憲招入幕。與共籌兵計。此編乃紀

宗憲誘誅寇首徐海之事。皆所親見。故敘述特詳。與史所載亦多相合。袁駿以此書與汪直傳合刻入金聲玉振集中。題曰海寇後編。今析出各著於錄焉。

【汪直傳一卷】

戶部尙書王際華家藏本

不著撰人名氏。記嘉靖中汪直引倭入寇海上。及總督胡宗

憲以計誘殺直事。所以歸功於宗憲者甚。至或其幕客所爲也。

【劉豫事蹟一卷】兩淮鹽政探進本。國朝曹溶撰。溶有崇禎五十宰相傳。已著錄。是書本楊克弼僞豫傳。又雜採他書附益之。視原傳所述較詳。

右傳記類別錄之屬。六部八卷。皆附存目。

案以上皆逆亂之人。自爲一傳者。命曰別錄。示不與諸傳比也。其割據僭竊之雄。別附載記。征討削平之事。別入雜史。均不與此同科。

## 卷六十五

史部二十一

史鈔類

帝魁以後書。凡三千二百四十篇。孔子刪取百篇。此史鈔之祖也。宋志始自立門。然隋志雜史類中。有史要十卷。註漢桂陽太守衛胤撰。約史記要言。以類相從。又有三史略二十卷。吳太子太傅張溫撰。嗣後專鈔一史者。有葛洪漢書鈔三十卷。張緬晉書鈔三十卷。合鈔衆史者。有阮孝緒正史削繁九十四卷。則其來已古矣。沿及宋代。又增四例。通鑑總類之類。則離析而編纂之。十七史詳節之類。則簡汰而刊削之。史漢精語之類。則採摭文句而存之。兩漢博聞之類。則割裂詞藻而次之。迨乎明季。彌衍餘風。趨簡易。利剽竊。史學荒矣。要其含咀英華。剔除冗贅。卽韓愈所稱記事提要之義。不以末流蕪濫。責及本始也。博取約存。亦資循覽。若倪思班馬異同。惟品文字。婁機班馬字類。惟明音調。及三國志文類總

匯文章者，則各從本類，不列此門。

【兩漢博聞十二卷】兩淮鹽政探進本。明嘉靖中黃魯曾刊本，不著撰人名氏。案晁公武讀書志，乃宋楊侃所編也。侃錢塘人，端拱中進士官至集賢院學士，晚爲知制誥，避真宗舊諱，更名大雅，是編摘錄前後漢書，不依篇第，不分門類，惟簡擇其字句故事，列爲標目，而節取顏師古及章懷太子註，列於其下。凡前漢書七卷，後漢書五卷，雖於史學無關，然較他類書採摭雜說者，究爲雅馴。後漢書中間有引及前漢書者，必標顏師古字，而所引梁劉昭續漢志註，乃與章懷註無別體例，未免少疎。至所列紀傳篇目，亦往往多有訛舛，然如四皓條下，引顏師古註曰：四皓稱號，本起於此，更無姓名可稱。蓋隱居之人，匿蹟遠害，不自標顯，祕其氏族，故史傳無得而詳。至於皇甫謐圈稱之徒，及諸地理書說，竟爲四人安姓字，自相錯互，語又不經。班氏不載於書，諸家皆臆說，今並棄略，一無取焉。云云。明監本漢書註，竟佚此條，惟賴此書幸存，則亦非無資考證者矣。

【通鑑總類二十卷】安徽巡撫探進本。宋沈樞撰，樞字持要，德清人，紹興間進士官至太子詹事。光祿卿諡憲敏，是書乃其致仕時所編，取司馬光資治通鑑事蹟仿冊府元龜之例，分爲二百七十一門，每門各以事標題，略依時代前後爲次，亦間採光議論附之，所分門目頗有繁碎，如賞罰門外，又立貶責功賞二門，外戚門外，又立貴戚一門，近習門外，又立寵倖一門，隱逸門外，又立高尚一門，積善門外，又立陰德一門者，不一而足。又如安重榮奏請隄分，不過驕蹇，乃以此一條別立僭竊一門，則配隸不確。東周下迄五代，興廢不一，乃獨取申徹論燕必亡，黃泓論燕必復二條，立爲興廢一門，則疎漏太甚。然通鑑浩博，猝

難盡覽。司馬光嘗言。惟王勝之曾讀一過。餘人不能數卷。卽已倦睡。則採摭精華。區分事類。使考古者易於檢尋。其書雖陋。亦不妨過而存之也。嘉定中。鈔版潮陽樓。鑰嘗爲之序。元至正中。浙江行省重刊。周伯琦又序之。二人皆博物君子。而冒以文章。弁其首。殆以操觚數典。尙有一壺千金之用歟。

【南史識小錄八卷北史識小錄八卷】浙江巡撫探進本 國朝沈名蓀朱昆田同編。名蓀字潤芳。錢塘

人。昆田字文盎。秀水人。蓀尊之子也。是書仿兩漢博聞之例。取南北二史。摘其字句之鮮華。事蹟之新異者。摘錄成編。不分門目。惟以原書次第臚列。而各著其篇名。亦不加調釋。惟摘取數字標目。以原文載於其下。著是語之緣起而已。文獻通考載陳正敏之言曰。李廷壽作南北史。相得作史之體。故唐書本傳亦謂其刪略穢詞。過本書遠甚。然好述妖異。兆祥謠識。特爲繁猥。又引司馬光之言。亦謂李廷壽書於譏諷。諷嘲小事。無所不載。蓋自沈約宋書以下。大抵競標藻采。務摭異聞。詞每涉乎儷裁。事或取諸小說。廷壽因仍舊習。未盡消除。宜爲論者之所惜。然揆以史體。固曰稍乖。至於賦手取材。詩人隸事。則樵蘇漁獵。摭拾靡窮。此譬如枵瘠爲病。而製枕者反貴其文理也。名蓀等摭其精華。以備選用。使遺文瑣事。披卷燦然。其書雖作自近人。其所採錄。則皆唐以前事。與藝文類聚諸書。約略相似。存以備考。愈於冗雜之類書多矣。

右史鈔類三部四十八卷。皆文淵閣著錄。

史鈔類存目

【史記法語八卷】浙江巡撫探進本 宋洪邁編。邁字景廬。鄱陽人。紹興乙丑中博學鴻詞科。官至端明



殿學士諡文敏事蹟具宋史本傳。是編於史記百三十篇內。自二字以上句法古雋者。依次標出。亦間錄舊註。蓋與經子法語等編。同以備修詞之用。書錄解題載之類書類。稱十八卷。此本乃止八卷。似非完書。然卷末有題識一行云。淳熙十二年二月刊於婺州。是當時刊本。實止八卷。書錄解題所載。衍一十字明矣。

【南朝史精語十卷】浙江汪啟淑家藏本

宋洪邁撰。邁於諸書多有節本。其所纂輯。自經子至前漢。皆

曰法語。自後漢至唐書。皆曰精語。此所摘宋齊梁陳四朝史中之語也。凡宋書四卷。齊書三卷。梁書二卷。

陳書一卷。其去取多不可解。卽以卷首宋本紀考之。如桓元與劉邁書。有云。北府人情云何。近見劉云何

所道。乃獨摘北府人情云何句。宋順帝反正詔曰。故順聲一唱。二溟卷波。英風振路。宸居清翳。乃獨摘二

溟卷波句。高祖北討。加領征將軍司豫二州刺史。以世子爲徐兗二州刺史。下書有云。今當奉辭西施。有

事關中。弱嗣叨蒙。復忝今授。乃獨摘復忝今授四字。又如加高祖九錫策文。駢詞麗句。疊出不窮。乃獨摘

出藩入輔。鋒無前對二句。蓋南宋最重詞科。士大夫多節錄古書。以備遣用。其排比成編者。則有王應麟

玉海。章俊卿山堂考索之流。巾箱祕本。本非著書。不幸而爲人所傳者。則有如此類。後人以其名重。存之

實非其志也。以流傳已久。姑存其目。實則無可採錄。惟其中所錄宋書本紀第一。列傳第二。第三。志第四。

志。反在列傳之後。考劉知幾史通曰。舊史以表志之帙。分於紀傳之間。降及蔣宗肇。加釐革。沈魏繼作。相

與因循。今北監版魏書志在列傳後。是其顯證。與史通合。而宋書則移其次第。列於紀傳之間。觀邁所序

猶從古本。知幾之言不妄。是則可資考證之一端。十卷之中。惟此一節足取耳。

【十七史詳節二百七十二卷】浙江巡撫採進本。宋呂祖謙編。祖謙有古周易。已著錄。此蓋其讀史時刪節備檢之本。而建陽書坊爲刻而傳之者。凡史記二十卷。西漢書三十卷。東漢書三十卷。三國志二十卷。晉書三十卷。南史二十五卷。北史二十八卷。隋書二十卷。唐書六十卷。五代史十卷。前冠以疆理世系紀年之圖。所錄大抵隨時節鈔。不必盡出精要。如東漢晉二史內四言贊語。於本書已屬贅拇駢枝。乃一概摘存。殊爲冗濶。又如北史紀傳。爲隋代而作者。業已併入隋書。乃獨四夷一傳。仍及隋事。而隋書內遂刪去之。爲例亦間有不純。然南宋諸儒大抵研究性命。而輕視史學。故朱子作貢舉私議。欲分年試士。以史記兩漢爲一科。三國晉書南北史爲一科。新舊唐書五代史爲一科。蓋虛談無實之弊。朱子亦深慮之矣。祖謙雖亦從事於講學。而淹通典籍。不肖借程子玩物喪志之說。以文飾空疎。故朱子稱其史學分外仔細。附存其目。俾儒者知前人讀書。必貫徹首尾。卽所刪節之本。而用功之深。至可以概見。則此二百七十三卷者。雖不能盡諸史之全。而足以爲宋儒不廢史學之明證也。

【東漢精華十四卷】新聖公孔昭煥家藏本。宋呂祖謙撰。是編乃其兩漢精華之一。卽范氏之書。摘其要語而論之。或比類以明之。於光武明章和四帝紀。尤爲詳悉。所略者。惟表志耳。然不具事之始末。所論每條僅一二語。略抒大意。亦不申其所以然。蓋是書乃閱史之時。摘錄於冊。以備文章議論之用。後人重祖謙之名。因而刊之。與洪邁經史法語。均非有意著書者也。

【諸史提要十五卷】內府藏本。宋錢端禮撰。端禮字處和。臨安人。吳越王俶六世孫。榮國公忱之子。少以恩廢入仕。累官至參知政事。兼樞密院事。以莊文太子妃父。罷爲資政殿太學士。再知寧國。移紹

興復以觀文殿學士提舉洞霄宮卒諡忠肅事蹟具宋史本傳是書乃取諸史之文可資詞藻者按部採摘彙集成編各以一二語標題而分註其首尾於下凡史記一卷前漢書二卷後漢書二卷三國志一卷晉書三卷南史一卷北史一卷新唐書三卷五代史一卷其著錄於宋史藝文志者與此本卷目相同前有其門人劉孝睦序不著年月詳其詞意蓋端禮爲參政時所刊行也其體例頗與洪邁史漢法語諸史精語相近陳振孫書錄解題嘗議其泛然錄鈔毫無義例蓋南宋最尚詞科以妃青儷白相高故當時有此鈔書之學也

【漢雋十卷】江蘇巡撫採進本 宋林越撰案陳振孫書錄解題載此書卷數與今相符而註稱括蒼林鉞處州府志亦載林鉞此本則皆作林越未詳孰是也其書取漢書中古雅之字分類排纂爲五十篇每篇卽以篇首二字爲名亦間附原註前有紹興壬午越自序稱大可以詳其事次可以玩其詞然割裂字句漫無端緒而曰可詳其事其說殊誇後有延祐庚申袁桷重刻跋稱漢雋之作蓋爲習宏博便利斯爲定論矣

【元史節要十四卷】兩淮鹽政採進本 明張九韶撰九韶字美和清江人洪武十年以薦爲國子助教陞翰林院編修是編因當時所修元史版藏內府人間多不得見於是仿會先之十八史略例節其要爲一書其編年繫事則仍用通鑒之體前有洪武甲子自序一篇然紀載多不具首尾未爲該備且此書成於洪武間而順帝紀內多有稱明太祖高皇帝者疑其經後人所改竄非九韶原本也

【兩晉南北奇談六卷】兩江總督採進本 舊本題宋王渙撰渙爲仁宗慶歷末睢陽五老之一王闢之

灑水燕談稱其官爲太子賓客。祝穆事文類聚載錢明逸五老會詩序稱爲太原人。其事蹟則未詳。然世僅傳渙五老會詩一首。不聞其著此書。鄭樵以下諸家書目亦不著錄。考太學進士題名碑。宏治丙辰科有王渙。象山人。明史藝文志有渙所著墨池手錄三卷。此本自稱墨池王渙。與墨池之號相合。知此書爲明王渙撰。其稱太原。蓋舉郡望耳。其書摘錄晉書以下八史瑣語雜事。王士禎居易錄稱嘗見書。賈搆兩晉奇談不云誰作。疑卽此書也。

【分類通鑑四卷】兩江總督採進本。不著撰人名氏。明宏治中。河間知府施槃。刊於郡齋。亦不云誰作。

其書分類猥雜。標題舛陋。蓋卽通鑑總類之節本。又沈樞之重儷矣。

【讀書漫筆十八卷】兩淮馬裕家藏本。明方潤撰。潤莆田人。正德丁丑進士。官禮部郎中。是書上自漢

書。下迄唐書。隨筆採摘其字句。兼及訓詁。亦時論斷。其是非發明殊妙。

【諸史品節三十九卷】兩江總督採進本。明陳深編。深有周禮訓雋。已著錄。是書所採。自國語以及後

漢書。皆隨意雜鈔。漫無體例。

【史纂左編一百二十四卷】安徽巡撫採進本。明唐順之撰。順之有廣右戰功錄。已著錄。是書以歷代

正史所載君臣事蹟。纂集成編。別立義例。分君相名臣謀臣后公主戚儲宗宦幸姦篡亂莽鎮夷儒隱逸。獨行烈婦。方技釋道。凡二十四門。其意欲取千古興衰治亂之大者。切著其所以然。故其體與他史稍異。然其間詳略去取。實有不可解者。如君紀祇列漢唐宋三朝。偏安者皆不得與。而隗囂公孫述李筠李重進諸人。乃反附入於列代。宦官酷吏。鉞之極詳。固將以垂鑑戒。而唐之楊復恭來俊臣周興等。尤爲元惡。

巨憖乃反見遺。又以房瑄爲中興之相。高駉爲平亂之將。褒貶既已失平。以赫舍哩案原作乾石烈。今改正。爲人名。姓氏幾於莫辨。其他妄爲升降。顛倒乖錯之處。不可勝言。殆與李贄之藏書。狂誕相等。乃贄書世猶多相詬病。而是編獨未有糾其失者。殆震於順之名。不敢議歟。

【史記鈔六十五卷】浙江總督採進本。明茅坤編。坤有徐海本末。已著錄。是編刪削史記之文。亦略施評點。然坤雖好講古文。恐未必能刊正司馬遷也。

【史要編十卷】浙江范懋柱家天一閣藏本。明梁夢龍編。夢龍字乾吉。真定人。嘉靖癸丑進士。官至吏部尚書。諡貞敏。事蹟具明史本傳。其書雜採諸史之文。爲正史三卷。編年三卷。雜史三卷。史評一卷。自序謂學者罕睹全史。是編上下數千載。盛衰得失之蹟。大凡具在。蓋爲鄉塾無書者設也。

【左國腴詞八卷】丙府藏本。明凌迪知撰。迪知字穉哲。烏程人。嘉靖丙辰進士。官至兵部員外郎。是編採左傳國語字句。分類編輯。凡左傳五卷。爲類四十。國語三卷。爲類四十。有三所摘皆僅存一二語。既不具其始末。又不標爲何人之言。且註與正文混淆不辨。非惟不足以資考證。併不可以供擗搗。與所撰太史華句。兩漢雋言。文選錦字。諸書體例。皆仿林越漢雋。而冗雜破碎。又出漢雋之下。如以從欲鮮濟一語。列之澗溪類中。蓋誤以爲濟川之濟也。是尙足與論乎。

【太史華句八卷】浙江汪啓淑家藏本。明凌迪知編。是編成於萬曆丁丑。明史藝文志著錄。卷數與此本相同。皆摘史記字句。以類編次。司馬遷史家巨擘。其文豈可以句摘。句又豈可以華目。蓋王李割剝秦漢之風。至明季而未殄。故書肆尙鑄此等書。以投時好耳。

【兩漢傳言十六卷】內府藏本。明凌迪知編。宋林越作漢雋。所採止於西漢。迪知因仿越體例。輯後漢故實。與越書合爲一編。改題今名。自第一卷至十卷。皆林氏之舊。題曰前集。十一卷至十六卷。迪知所續者。題曰後集。採摭亦備。然不自爲一書。而補葺舊本。翹立新名。是則明人之結習矣。

【四史鴻裁四十卷】通行本。明穆文熙編。文熙有七雄策纂。已著錄。是編選錄左傳十二卷。國語八卷。戰國策八卷。史記十二卷。皆略註字義。無所發明。批點尤爲舛陋。其括此四書曰四史。亦杜撰無稽也。

【全史論贊八十卷】江蘇巡撫採進本。明項篤壽編。篤壽有小司馬奏草。已著錄。是書以諸史浩繁。難於尋究。特撮其論贊。以備觀覽。凡史記七卷。漢書六卷。後漢書五卷。三國志三卷。晉書四卷。宋書南齊書各三卷。梁書二卷。陳書魏書各三卷。北齊書後周書南史各二卷。北史三卷。隋書二卷。唐書七卷。五代史五卷。宋史六卷。遼史金史元史各四卷。然讀史必先知其事之始末。而後可斷其人之是非。今篤壽惟存其論。使稱善者不知其所以善。稱惡者不知其所以惡。仍於讀史者無益也。

案此書皆取論贊。宜入史評。然皆摘錄於諸史。非所自評也。故仍入之史鈔類焉。

【宋史纂要二十卷】江蘇巡撫採進本。明王思義撰。思義字允明。松江人。宋史極爲煩冗。是書僅刪存

二十卷。可謂約矣。然班范皆號謹嚴。而兩漢書卷帙猶富。宋之歷年。幾於匹漢。而縮爲寥寥數卷。謂事增文省。殆必不然。至以遼金史附宋之後。等諸晉書之載劉石。尤南北史臣互相詬厲之見。非公論也。

【古今彙語十二卷】浙江巡撫採進本。明汪應蛟撰。應蛟字潛夫。婺源人。萬曆甲戌進士官至戶部尚書。諡清簡。事蹟具明史本傳。是書雜錄史文。上起唐虞。下迄於元。去取漫無義例。特興之所至而已。

【史書纂略二百二十卷】浙江巡撫採進本 明馬維銘撰。維銘字新甫，平湖人。萬曆庚辰進士，官至兵部職方司主事。是書取二十一史本紀列傳，各撮取大略，彙成一編。蓋亦通史之例。然去取失宜，簡略太甚，非博非約，殆兩無所居也。

【史裁二十六卷】江蘇巡撫採進本 明吳士奇撰。士奇字無奇，歙縣人。萬曆壬辰進士，官至太常寺卿。是書節錄史文，始自春秋，迄於宋元，雜採舊論，亦間以己意斷之。既非編年，又非紀傳，隨意鈔撮而已。

【史牘十七卷】浙江巡撫採進本 明謝肇淛撰。肇淛字在杭，福建長樂人。萬曆壬辰進士，官至廣西右布政使。明史文苑傳附見鄭善夫傳中，是書摘十七史中隱僻字句，標列成編。凡一史爲一卷，謂之牘者，自序以爲解結之義，人之有疑，甚於結，故求其解而筆之也。然於史漢三國諸書，原有舊註者，所載尙爲明晰，於晉書以下，原本無註者，亦僅錄舊文，絕無考證，仍不足以釋學者之疑。則所云求其解者，亦徒虛語矣。

【讀史快編四十四卷】內府編本 明趙維寰撰。維寰字無聲，平湖人。萬曆庚子舉人，是書於諸史之中，摘錄其新異之事，始於史記，迄新唐書，割裂剪裁，漫無義例。

【史辯二十五卷】兩江總督採進本 明余文龍編。文龍字起潛，古田人。萬曆辛丑進士，官南京工部主事。其書雜錄舊史，餽釘殊甚，與讀史快編正同，但快編止於唐，此則鈔至金元耳。

【南北史鈔】無卷數 兩江總督採進本 明周詩雅撰。詩雅字廷吹，武進人。萬曆己未進士，是編摘錄南北史新奇纖佻之事，以爲談助，然不及後來沈名彥朱昆田書之有條理。

【二十一史論贊輯要三十六卷】浙江巡撫探進本 明彭以明編。以明廬陵人。萬曆中諸生。是編採錄諸史論贊。以課其子。鈔撮之學。非讀史之正法也。

【史品亦函四卷】浙江巡撫探進本 明陳仁錫編。仁錫有繫詞十篇書。已著錄。是編所錄。上起古初。下迄於晉書。或採其文。或節錄一二事。茫無義例。尤時時參以僞撰。如雲長遇害不屈一篇。不知其從何來。而劉聰辱懷愍一篇。稱聽爲漢昭烈元孫。云出續三國志。亦未見有是書也。

【讀史集四卷】江蘇周厚培家藏本 明楊以任撰。以任字維節。瑞金人。崇禎辛未進士。官國子監博士。是編摘諸史中事蹟之可快可恨。及有膽有識者。分爲快恨膽識四集。每條下略綴評語。詞多佻纖。

【宋史存二卷】浙江鮑士恭家藏本 明文德翼撰。德翼字用昭。德化人。崇禎甲戌進士。官嘉興府推官。是編採掇宋史列傳。而刪潤其文。始於宗澤。終於文天祥。蓋福王時所作。故獨寓意於紹興以後云。

【讀史漢魏二卷】浙江吳玉璠家藏本 明施端教編。端教字匪莪。泗州人。是書取史漢中字句新異者。編錄成帙。蓋仿林越漢雋。洪邁史記法語。西漢法語例。然卷帙無多。分類繁瑣。殊無益於考證。

【二十一史論贊三十六卷】浙江巡撫探進本 明沈國元編。國元字飛仲。吳縣人。是書摘錄二十一史論贊。加以圈點評識。全如批撰時文之式。以爲評史。則紀傳所載。非論贊所能該。事無始末。何由信其是非。以爲論文。則晉書以下八史。以及宋遼金元四史。豈可以爲文式哉。真兩無取也。

【三國史瑜八卷】浙江巡撫探進本 明張毓容撰。毓容字聖初。錢塘人。是書成於崇禎癸未。於陳壽三國志中擇其事蹟較著者。條分件繫。綴以評語。自漢獻帝初平元年。迄建安二十五年。分國未定。仍稱季



漢自魏黃初元年迄咸熙元年三國並建則稱三國凡晉書中事屬魏朝者亦採入以補其闕既非紀傳又非編年了無倫緒又於曹操既改稱名而編年又以爲魏主體例亦自相矛盾評語多取鍾惺之說其所宗尙可知也

【史書十卷】浙江巡撫採進本

明姚允明撰允明字汝服休寧人是書自三皇以訖元代摭採史文節

縮成編前有張溥吳應箕二序蓋亦依附復社者故書止十卷而卷首列參閱姓氏至二百八十三人其聲氣標榜可以概見應箕序至謂其撰言簡奧近尙書是何言歟

【廿一史識餘三十七卷】浙江汪啟淑家藏本

明張塘撰塘字石宗錢塘人是編一名竹香齋類書摘

錄二十一史佳事雋語分類排纂共五十七門末又附補遺一門略仿世說之體而每條下皆註原史之名其發凡譏何氏語林濫及裨官然世說新語古來本列小說家實裨官之流而責其濫及裨官是猶責弓人不當爲弓矢人不當爲矢也且所重乎正史者在於敍興亡明勸戒核典章耳去其大端而責其瑣事其去裨官亦僅矣

【史異編十七卷】兩江總督採進本

明俞文龍撰文龍晉江人其書以諸史所載災祥神怪彙爲一編

既非占驗之書又無與學問之事徒見其好怪而已

【讀史蒙拾一卷】副都御史黃登賢家藏本

國朝王士禛編士禛字子底號西樵新城人順治壬辰進

士官至吏部考功司員外郎是書取諸史新穎之語標數字爲題而錄其本文於後亦洪邁經史法語之類然書止一卷聊以寓意而已實未竟其事曰蒙拾者取劉勰文心雕龍辨騷篇童蒙者拾其香草句也

【史緯三百三十卷】內府藏本

國朝陳允錫撰。允錫字譽齋，晉江人。順治己未，以薦舉授平湖縣知縣。是書蓋仿呂祖謙十七史詳節之意。然祖謙但攝取菁華，以便省覽。允錫則多所改竄於其間，有合併重複者，如周秦以前入史記，而漢高祖以至武帝，則割入漢書。宋齊梁陳魏齊周隋八史，則與南北二史參考歸一。其餘表志紀傳互見者，亦悉從汰除之類是也。有刪削繁冗者，如宋史宗室世系，但系族譜。元史刑法志，全鈔律文，及但敍官閥，無關褒貶之列，傳是也。有更易舊第者，如退魏於蜀後，削二牧於昭烈之前，移呂布二袁劉表於東漢之類是也。有竄改舊名者，如項羽呂后武后，不稱本紀。宋留從效陳洪進，不稱世家之類是也。其他如新唐書，則點正其文句。元史食貨志，則連屬其篇次者，爲數尤多。卷帙浩繁，用力可謂勤至。然其中繁簡失度，分合無義者，亦尙不少。蓋網羅百代，其事本難。梁武帝作通史六百卷，劉知幾深以爲譏。司馬光進通鑑表，亦稱其中牴牾，不能自保。允錫此書，積畢生之力爲之，而卒之不協於體要，固其所矣。

【兩晉南北朝集珍六卷】浙江巡撫採進本

國朝陳維崧撰。維崧字其年，宜興人。康熙己未，召試博學鴻詞，授翰林院檢討。維崧以四六擅名，此書採南北朝故實，各加標目，蓋卽以備駢體採掇之用。前有自序，作於康熙丙辰，乃未舉制科之前四年也。

右史鈔類四十部，一千六百十九卷，內一部無卷數，皆附存目。

14014



省  
六

4

3-13  
700



可敬  
13

學